


Aka (Hrusso) Bible



Hruso: Aka (Hrusso) Bible (Portions) for India

Aka (Hrusso) Bible

Hruso: Aka (Hrusso) Bible (Portions) for India

copyright © 2024 Bridge Connectivity Solutions Pvt. Ltd.

Language: (Hruso)

Contributor: Bridge Connectivity Solutions Pvt. Ltd.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

6ed36eea-a167-5ded-a2d7-08d8d10b8e3c

Contents

Luka	1
Filemon	68

Luka i shi-ñu

Ĝiwbraw

Bzüga go kako ĝiwbraw na vyow vew a vetsü se ye he kako ye Luki i ĝiw cheñe, sünda he kako yo danghuda i galyiw ksü go veksüw Kristan cheñe. Ñom-niti go homeje, i utro ĝübye küĝüw go da. I Tawgyew i shi-ñu truw nüna. I Tawgyew i shi-ñu seyo Tawgyew i shürhaw ná kako ĝida. Ije Polus idra ye Kristan na chiĝa daw Tawgyew ichi chiĝa daw nüna (Kulu. 4:14, 2 Timu. 4:11; 11:1).

Ĝiwbraw i djaga

Odje 60-80 kuw.

Luka i he kako í Kesriya ge ĝilyeñe seyo Rome ge kakuñe ĝimdzoadabi. Kako ĝidaw dzaga na Betlehem, Galil, yahudiya seyo Yerusalemjo du.

Lajovo

Luka ubo yo Tawgyew i shi-ñu ye Tiyufilus í ĝiilyeda. Tiyufilus chemeje “Tawgyew i nülvo daw.” I Kristan í küĝüw ma mo i lyaĝoñ dawma se ye usu-upa yo madanghume. Luka í ĝidaw ge í “Dyewfo” cheñe 1: 3 ge ĝidaw í homeje i Roman gow babu dyew vedujo a du. Añe ge kako ngüdaw ná holaimeje he ye utro ĝübye gojo du. Ichi ĝidaw ge ana vedufodame, “Tawgyew i nüna” seyo “Tawgyew i ĝadz” (Luka 5:24; 19:10; 17:20-21; 13:18).

Ha ma a vew

Jisu iñiñ lañe trumkoige, Luka i Jisu í “Nüna üsañe” cheda. I Tiyufilus í ana ĝida, í ha ñu ná dadrüdama se na se í uw yo danghulafijodawe (Luka 1:4). Luka í ñiku-ñisüw djüngkoi ge í ĝiw yo i kristan nabo hado chemeje Tiyufilus i danghulajobi Tawgyew i shüraw na nüna mauw mow cheñe.

Ñustu gow

Jisu - Nüna uw a.

Udrüla

Jisu i saw seyo ichi kutcho shüw ___ 1:5-2:52

2. Jisu i nüna nabo chiĝa daw ___ 3:1 - 4:13

3. Jisu ĝaksüivo übraw ___ 4:14-9:50

4. Jisu i kros ge jiw ___ 9:51-19:27

5. Jerusalem ge Jisu i lüshüw paw, dzüw seyo üshükülyetcho ___ 19:28-24:53

Luka i galyiw

¹ Ñimko a ha ha lyilyedama, se ná nüna añe na galyiw ĝipüñejoñe dada.

² Sündá he ñu ná dju nudzoǵ iñiyo hohusedama se naje, seyo, Tawgyew i shi-ñu truñe kahisedaw se naje, se ñu ná ütrüyomdo ñi trukuida.

³ Sünambo, no je ütrüyomdo, he na he í, usupa yo hoksüne kalyisedaw no, süvzüw Tiyoñilus bábo, he na he í magaboliyw ġi vyeimeje ujoñe vyeda.

⁴ Hado cheholye, bá ha trudrülyedama, se ná umsowgo ba danghuweñe no vyedame.

Dzakariya ñe Elizabet

⁵ Nugo Herodes i Yahudiya ñetrü go ñetrü nugo dañe shüi ñeto ge ana lyikülye: Abiya müga go Jakariya cheñe mügaw a du. Üfum ye, mügaw Arō yo samtoliyw namko yo a, iñiñi ye Elishiba.

⁶ Sündá se naksü Tawgyew uvro ge chiñifoñe, seyo Prabhu ichi shotuko dügyew ná je da shüw. Úǵü dadrülyedaw ná je madatruw-makitrüw da shüw.

⁷ Sündá Elishiba i ügübzümdá naksü agü je ñiwbi. Sündá se naksü kewje keahubi.

Sorgomuko i yo Yohañ í sakülyew ñihowtrü

⁸ Dzakariyas i í ñeşü ná daǵań kuwñe, Tawgyew uvro ge, i ñegru ge müga chew daw.

⁹ Sündada mügaw ná daw basha yo dañe kako dzulaw ge iñiñi kakülye, Tawgyew í küǵüw ñegru ge jiñe shobrovzü foweñe.

¹⁰ Sündada shobrovzü fomkoí sese vyew na nopsü ge kahuañe küǵütsü.

¹¹ Sese Tawgyew ichi sorgomuko a ye shobrovzü fodaw südzüvyepsüǵ vyego psüǵañe ge gudzukülyedaw ye, í hohu.

¹² Sündá Jakariya í hoglye şüpo lamosha, sünda í ġew vyehua.

¹³ Seşo ye sorgomuko i í che, “Jakariya, djuǵejodawe hado chemeje bá küǵüdaw ye dzühujemme sündada bafum Elishiba yo babó saw a sakülyejome, sünda ba se iñiñi ye Yohañ ñe ñijodawe.

¹⁴ Sündá ba agü saahuñe şüpyo lüshüñe, lüshümfoajome seyo şüpyo nüna na agü sadabi cheñe lüshüjome.”

¹⁵ Hado chemeje i Tawgyew üvro ge sawlyiw chiñifoñe; seyo tsü keje matujome; seyo iyañ ulhu ge duluge yo ġulo güdraw yo güdraavojobi.

¹⁶ Seyo Israyel yo naje şüpo nüna na Tawgyew ichi ge kakultrujome.

¹⁷ I ñihow Eliya í ġulo seyo küña dafidama dañe üvro üvro kutrojome hado chemeje awu na na üdrü-ulu ye agü nachi ge tchodügyejo; seyo zew chew madzüw na Tawgyewchi ge chiñidrüñe lakujo sünda Tawgyew ibó dafimsofiw dashütrüvojo.

18 Jakariya i sorgomuko í dzü, hei no kúnda danghu-jowa; hado chemeje nobó mukroadabi seyo nofum boje mukromyadabi.

19 Sorgomuko i í trutcho, “No Gebriyalwa, Tawgyew ichi mukow kewwa sündá üdra gudzusaw ye wa; sündada nó badra chitruweñe seyo bá he ñu ye truweñe kiadaw yewa.

20 Seyo hojo dawé, he ñu ye umsow makalu kuw ba mulyo gyojome, sündá mazefijomme, hado chemeje ba nó ñu ye, i ke damdrüñe dafajoma, sei umsow mavye.”

21 Nüna na Jakariya í gyokrütsü, sündá mavyenghuahuw lyatsü, hado cheme ñegru ge aña kúnda uwalajemañe? Vyeñe.

22 Sündá i ñopsü kahuadabi abó ñu mazefibi, sündawñe na danghuladabi í ñegru ulunge hama ñita homadadañe, sündá i sei vyeğelalye seyo mulyo lyadabiñe.

23 Sündá i sehu datunofiahuñe i í ñe ge katcho.

24 Setasağa yo ifum Elishiba somafobi, sündá hubye pom kuw i nudzoğ ana cheñe müşüñe vye.

25 “Nüna nafo ge nó bümazeamedañe nobó Tawgyew i he ñeto ye ana daidawa.”

Sorgomuko i mariyam itrü a jiku

26 Elishiba agü ñiw yo hubye ge kuw sa a Tawgyewchi go sorgomuko Gebriyal i Galili iñiñi Nazrat ñetrü ge,

27 Mimsa nano makaw a ichi ge kiku. Djú Joseb cheñe Dawud í ñeşü go Muhusa a idra gulo daida, se nano makaw mimsa iñiñi ye Mariyamwa

28 Sündá Sorgomuko i ichi ge ñelunge jimyoñe che, ba hu je adjüdjüw no je ağimiw lüshütukoaiwe, Djú Tawgyew í nülwov tukoaidama! Tawgyew i badraşome.

29 I se ñu yo şüpyo gëlamoag, sündá vyemche, hei küna ñu a djüjemma?

30 Séşo Sorgomuko i í che, Mariyamya; djuğejoda, hado cheme Tawgyew í nülvo bá tukoaidawa.

31 Sündá hojodawe, ba somafojome, sündá ba saw a sakülyejome, ba iñiñi ye Jisu ñe ñijodawe.

32 I şüğlyiğjome; seyo bá Soğgro-yaloñe üsaw chejome; sündá Tawgyew i í awu Dawud i psüğa ye í djüjome.

33 Sündá i Yakub í ñeşü ge şüwa nugo da şükejome; sündá í gädzü da şükyew ye keje mamütrajome.

34 Mariyam i Sorgomuko í che, “Hei kúnda lyijowa? Nobó muhuje madanghulubi.”

35 Sorgomuko i í trutcho “ğulo güdraw ye baso ge kamyojome, seyo Toğgroyama í Ğagra ye badru ge duñgudrujome; Hado chemeje í gulo güdraw yo sakülyalaibi, Í Tawgyew üsaw chejome.

³⁶ Sündá hojo dawé, bá ñêşüĝ go Elishiba i je mukromyadabi a saw sakülyemkoiba, hei ichimsoba í na Üĝüzbüm chebabi, i so mafow hubye ĝe kudaba.

³⁷ Hado chemeje Tawgyew ichi ge ha ñu je madafiwo che ñiwme."

³⁸ Mariyam i che, "Howe, no Tawgyew i chiĝadambabi, bachi ñu trudo trüduyo dubroñe nodra ana lyimeje." Sese sorgo-muko ye itrü yo katrükralye.

Elizabet ichi ge Mariyam i jiw

³⁹ Sündaw se ñeto Mariyam i kutcho yo gudzuñe pufo go Yahudi na ñetrü a ge ji.

⁴⁰ Sündá Jakariya iñe ge jiñe Elishiba í gagañe da.

⁴¹ Elishiba i Mariyam ichi gaga chewye dzühuhuwñe, seşüĝudoye ulhu go agü yeje gog, sündá Ilishiba i ĝulo güdraw yo tukoa.

⁴² Sündá i gow yo şogzuñe che, ba mim naĝi yo süvzüfowmme, seyo balhu go sheje ye şüvzüw me.

⁴³ Sündá noje hango yo nülvojema, no Tawgyew üyañ ye notrüĝañ a jikuda.

⁴⁴ Sündá holabya bachi gaga chew ye nofu ge dzühubyo dzühuĝyowñe seşüĝudo ye nolhu go agü yeje lüshülye gogje.

⁴⁵ Sündada seiye şüvzüwmme, se í djuyo umsow vyeñe Tawgyew ichi go, ha ñu ye idra chedama, sei damsojebi.

Mariyam i Tawgyew í troi.

⁴⁶ Sese Mariyam i che, "Nodrü-nolu yo Tawgyew i troime.

⁴⁷ Sündá noĝulo ye, nó güdraw choakejo Tawgyew yo lüshü damme.

⁴⁸ Hado chemeje i í chiĝadam idru ge nülvo hoida, sündada holabya, ayo dalalye shüwa shüw pumnüşüĝi kuw nüna na nó şüvzübram chejome.

⁴⁹ Hado chemeje se bolugobraw Tawgyew i nobo chiĝa dew dew daida, sündada iñiñ ye güdraw me.

⁵⁰ Sündá i nülvo ye se nadra jome, dju í ĝeima, saltso saltsow daw kuw sünañgudrujome.

⁵¹ I í bolugow ye sheiwa, seyo dju nudzo drü-lu ge dafowşoñe daima sena daame-kiame vye.

⁵² I shotuko dümbraw na psüĝa go dügaaha; Sündá nülvodaw i udruda vye.

⁵³ Luhuşümgraado na ĝañ uwyo da djü, séso dzomo-külyimodaw na üĝzü ufobüla lyadügye.

⁵⁴ I í nüdzog aki-awu na, kulo İsrayel na ĝaksüla, hado chemeje se nülvo ye büvyesüdañe.

⁵⁵ Shüwa Abraham ñe i saltsoahuw nadra shüwa duñgudrujo, I küna ñi bupye-ñipye nadra chedama süna."

56 Mariyam i hubye dzü kuw idra g̃yoselyeñe, i ñe ge katcho.

Yohañ Baptisma djüw i sawfo

57 Sese Elishiba i samdrü kudabi, sünda i saw sakülye.

58 I g̃afopsüg-g̃ampsüg seyo i ñešüg-ñepeg̃ na sei dzühulye, Tawgyew i idru ge šüpyo nülvo dadañe, idra ye lüshütuno.

59 Sündalye ana a dadawa ñegi šügzü kuwñe se agü í fyuw ñeto kudabi sünda i ñiñi ye ichi awu Jakariya í iñiñ ye ñiweñeda.

60 Séso iyañ i che, mowwe; i ñiñi ye Yohañ ñe ñijo dawe.

61 Sünda na í che, bá ñešüg ge ana üñiñi djuchije ñiwa.

62 Sese i ichi awu i damcheñe dzü, ba iñiñi í ha ñiñoñda?

63 Sündawñe i g̃ijo kako prülañe g̃iag, iñiñi ye Yohañ me, sündawñe vyew na mavyenghuatsü.

64 Sündawñe ichi umdzu ñe zebüla naksü sešügudo ye zefikülye; Sünda i ñu zehuahuw ye Tawgyew i trokülye.

65 Sündawñe iñisa ye g̃yodo na vyew g̃emoatsü; sünda se ñu ye vyew se Yahudiya nachi ñetrü üñisa üñisa naje šügeatsü.

66 Sünda vyew dzühudo na nudzoḡ nudzoḡ drü-lu ge vyelatsü che, “He agü ye künaajoješoma?” Hado chemeje Tawgyew i ügzü ye idra dubi.

Dzakeriya i ñihow

67 Sünda iyaw Jakariya i g̃ulo güdraw yo tukoa, sünda ñihokülye.

68 Israyel go Tawgyew í šüvzüwe.

Hado chemeje i í nudzo nüna ná hokrüvo,

Sünda ná g̃aksüivo,

69 Seyo i kulo Dawud i ñe ge ñibo muchoaijo hosüw üšüvzü a lahuaida.

70 Sünambo i bzüga yomdo güdraw ñihow truw bupye-ñipye nayo, dju ñedzü üña no üña gomdo dulyisema, senayo trulyeida.

71 Chemeje ñi vyeñiw-vyeḡaw nayo, seyo ñi homsüsew nagzü yo ñi muchoaida;

72 Sei ye ñi bupye-ñipye na nülvo dañe nudzoḡ güdraw ñu i vyesüweñe,

73 Seyo se trasḡa sei, se í i ñi awu Abraham yo todaye,

74 I ñi hei djüjo, sei ye ñi vyeñido nayo kahajoñe,

75 Ivro ge chiñiw seyo güdraw g̃abo kaw ge shüdzowkuw maḡew ichi chiḡa daḡgudruweñe.

76 Seyo ba ye muhusa agüsa, Toḡgroyama i ñihobraw chejome, hado cheme ba Tawgyew ichi g̃abo dashütrüvojoñe uvro uvro kutrojome,

77 Sei ichi nüna na djumuchoawe, dju, ná lalo yo güdraw pawma.

⁷⁸ Hei ñi Tawgyew í nülvo dado yo lyijome, seiyo ñidru ge udrugo yo müsaw a dzüto-rünokülyejo.

⁷⁹ Sei ye nukuḡuw seyo dzüjo ḡabo ge ḡyodo na müsaw djü, seyo ñishi í lüshüw ḡabo gudow lakutrokewe.

⁸⁰ Seyo se muhusa angasa ye Yohañ, shülyifi shülyi seyo ḡulo ge gokülyefi gokülye seyo Israyel ge kakujo ñeto kuw i bye ge ḡyo.

2

Betlehem ge Jisu i saw

¹ Se ñeto ge ñubyu Kesar Agastas ichivye gow shotukokunu kihua, vyow Druguw-Drulyiw gow ḡadzü-ḡaḡi nañiñ ḡimyoweñe.

² He uvromashü iñiñ ḡimyow ye ñubyu Keriniyas í Siriya gow dümbraw dadaw ñetow ge daw.

³ Vyew na nañiñ í ḡimyojoñe nudzo-nudzo ñetrü ge katsüküḡatsü.

⁴ Sünda: Joseb je Dawud i ñeşü go üşü umu, sündada i Galili go Nazrat ñetrü yo kañe Yahudiya ge Dawud i ñetrü Betlehem ge ka.

⁵ I iñiñ ḡimyow, í goidaw Mariyam dju so mafoma idra jisa.

⁶ Na Betlehem ñetrü ge dulu ge, i agü sajo ümdrü kuadabi.

⁷ Sünda i agü üsaw samkyo a saa sündañe í gyeka ge ḡüşhüñe káko ge zua ve, hado chemeje nabo süge ñe ḡyojo mapa.

Fugulu ḡokrüw nabo soḡgomuko í ñu kidaw

⁸ Seyo se ñetrü a küña fugulu ḡyokrüw duma, se na ñegi ge vi ge ḡyoñe ná hokrü ḡow.

⁹ Seyo Tawgyew i sorgomukow a namḡkow ge gudzukülye, sünda Tawgyew i ḡagra namḡkow ye dubrokülyeg, sündañe na şupo ḡeatsüḡ.

¹⁰ Sündañe sorgomukow i na che, “Dju ḡejo daw; Hado cheholye chemeje, howe, no tuḡu-tumo vyow nabo şupo lüshüw ñu a trujome.

¹¹ Yow ñubyu Dawud i ñetrü ge djobo muchoaijo a sadame, sünda se i Prabhu Masime.”

¹² Sünda se ye ba chi shewme, sei ye ba agü a ye gye ḡüşhüñe seyo káko ge zuw hohujome.

¹³ Sündañe sorgomuko a üdra ye soḡgomuko upua a Tawgyew i iñiñ la troñe ana chew hohuda,

¹⁴ “Ñedzü ge Tawgyew í ḡüdzüw sünda no ge se tuḡu-tumo na ḡüdzüw djüwe djü ñedzü Tawgyew i uw veima.”

Fugulu ḡaksüw na Betlehem ge jiw

15 Sorgomuko i natrü go soŕgo ge katrallyewñe, fugulu ĝaksüw na ĝütchü cheĝi, “Tchow, ñi Betlehem jiñe he ñu chedaw i, seyo Tawgyew i trudaw í, hobo.”

16 Sünda na mekutcho djeñe Mariyam ñe seyo Joseb naksü ütrü ge anga i káko ge vedaw hohu.

17 I holyeñe na se anga ufo gow na ha trudama se ñu chedaw na truzeĝiatsü.

18 Seyo vyew dzühutsüdaw na fugulu ĝaksüvw na ñu trudaw yo mavenghuatsüg.

19 Sešo Mariyam i he ñu na üdrü-ulu ge veñe vemchepüñe.

20 Sünda fugulu ĝaksüw na ná küna trudama, sünambo vyew dzühuñe hohuñe Tawgyew i trolleyeñe lüshüñe katsütcho.

Jisu ichi fyuñe seyo iñiñ ñiw

21 Ñegi šügzü kufiahuñe, seyo i Jisu i mükraksüw fyumdrü kuadabi, sünda iñiñ Jisu ñe ñi, he iñiñ ye sorgomuko i uluhudrü ge mañilugomdo djülyedabi.

22 Sünda Musa í shotuko dalyedaw yo Mariyam i güdraw ĝyow ye ĝomdzoahuwñe sünda Joseb ñe Mariyam naksü í Tawgyew uvro ge shew Yarusalem lañe jike.

23 Tawgyew i shotuko ge ĝimbo: “Vyew saw samkyo na Tawgyew íbó güdraw vyejome.”

24 Sünda Tawgyew i shotuko dalyedaw go chemeje, “Ašüm osa ksü, momeje paĝusa üsasa ksü lañe küĝuwe.”

Simon i ñi-how

25 Se ñeto ge Yarusalem ge Simon iñiñ yo nüna a duw, sünda i güdraw nüna seyo Tawgyew i küĝüw nüna, sünda Israyel ge ĝüdzüjo i ĝyokrü, seyo ĝulo güdraw üdra dusa.

26 Sünda ĝulo güdraw yo truhua, ba Tawgyew i saw Masi í mahohulu, ba madzüvzüjome.

27 Sünda í Ĝulo Güdraw i ñegru nopsü ge jidügye; sünda iyaw ñe üyañ naksü se agüsa Jisu íbo, ahugo shotuko na dajoñe veñe lajikedaw sesse,

28 sünda Simon i angasa í lolalyeñe, Tawgyew í troñe ana che;

29 “He Tawgyewwa, ba ñu chew kudabi, bá kulo í ba ĝüdzüw yo kadügyejodabe;

30 Hado chemeje noñi yo ba muchoadügyedaw ye hohudamme.

31 Djü ba vyew druguw-drulyiw gow nüna na hovow sa a dadrü kikülyadama.

32 I utro sama nabo umsow truhoahuw müsaw da kakülyajome, sünda Israyel go djo nüna nabo lüshü-lübajome.”

33 Sünda üyaw ñe üyañ naksü ubo gow ñu chedaw yo mavenghuatcheseñgudru.

³⁴ Sündawñe Simon i í gağüzü djüñe, üyañ Mariyam í che, “Howe, i Israyel go na gaañe seyo pülyidügyejo go, seyo ana a chi shedügyejoñe gyokrüdügyeda, seifo go ñu zeğijome.

³⁵ Sündä ba gûlo je vetsü yo vudüga-vudüga dajome. He yo şüpo na drü-lu ge vedaw na truhajome.”

Hanna i yo trudaw ñu

³⁶ Sündä Asher gûbye go Fanual üsam a duw iñiñ Hanna, i ñihow trum: I şüpo mukrombi, I ülshi dzüwñe üdra gzü daw yo odje mro kuw şüfisawba.

³⁷ I odje şügzügütrü psügi gow müjem: sündä ñegru keje matrahuw ñegiw-ñetow drüpsü-ñilyi mañiw seyo kügüñe gyonggudruwba.

³⁸ Sündä i sehu ñeto süge jikuñe Tawgyew i drü-lu yo uw che, sündä vyew ná, dju Yarusalem i yo muchoajoñe gyokrüvodaw na, ifo go ñu trumyokülye.

Josep ñe Mariyam naksü ñe katcho

³⁹ Sündä na Tawgyew davyedaw shotuko ügü ye vyew damdzoahuwñe sese Galili ge nudzoğ ñetrü Nazrat ge katcho.

⁴⁰ Sündä angasa ye nugow lya, sündä bolu dukülyebi, seyo patsü-sholu tukoaha, sündä Tawgyew i nülvo üdra sa dusa.

Angasa Jisu ñegru ge

⁴¹ Üyaw ñe üyañ naksü oje drü-drü Yarusalem ge Fasa rhano ge jinggudru.

⁴² I oje gûyo ksü kuwñe, na rhano ge gîdaw ñom í daw Jerusalem ge ji.

⁴³ Sündä na vyew ñegi gyomdzolye sese katcho, se angasa Jisu Yarusalem ge gyotralye; sei üyow ñe üyañ naksü madanghu.

⁴⁴ Na ana veñ, i upu jiw nadra dusamada, ñegi a kapseajebi: sündä na í nadraw seyo na ñeşü nangko ge tchüpüñe.

⁴⁵ Sé matchülawñe na tchü-tchüñe Yarusalem ge katcho.

⁴⁶ Seyo ñegi dzü sefum ye na í ñegru nopsü ge dadrûw nangko ge gyosañe, ná ñu dzüñe seyo naje i chi dzü gyodaw hohu.

⁴⁷ Seyo küña na i ñu truw dzü gyodama, se na vyew í danghuw yo seyo i ñu hutrow yo mavenghuatsü.

⁴⁸ Sündawñe na í holyeñe mavenghualyeñe seyo üyañ i í che, “No sawwa, ba ñidra ana hado daña? Howe, baw ñiksü ba tağaw na veduw tchü ñegiaha.”

⁴⁹ I í che, “Ba no hado tchüña? Hadoma madanghuma, no nó awu i ñe ge dujobabi cheñe?”

⁵⁰ Seşo i í ha ñu chedama, i se i madzüsüla.

⁵¹ Sündawñe i üdra kasa, sündä Nazrat ge kaku, sündä na chew dzü gyosa; sündä üyañ i he ñu ye üdrü-ulu ge ve.

⁵² Seyo Jisu i patsü-sholu seyo udru ge lyifilyi sünda Tawgyew ñe nüna naksü ubo yo go shülyi.

3

Yohañ Baptisma djüw ichi shi-ñu.

¹ Nugo Tibiriyus Kesar ñetrü nugo dañe oje gütürpom kuw sese, seyo Pontus Pilatus i Yahudiya go ñetrü nugo da shüi sese, seyo Galili ge Herodes, sünda üñu Filip Ituriya seyo Trakonitis go nugo da shüw sese, sündalye Abilene ge ye Lisaniyas go nugo da shüw sese.

² Seyo sese Anasñe Kefas naksü müga gow, seta-seğa Tawgyew ichi shi-ñu ye, ge bye ge Jakariya ichi üsaw Yohañ ütrü ge dzühuku.

³ Sündalye i Yordan hu itrügañ go vyew ñetrü-ñetrü ge jiñe, lalo muchojoñe drü-lu ye vyegudoweñe baptisma ifo ye truzekülye.

⁴ Yasaya i ñihow trulyedaw shi-ñu kako ge gïdaw ye:
 “Bye ge shogzükülyedaw nüna i gïuksüwme he i:
 ‘Tawgyew i gïabo dashütrüvowe, i gïabo í gudow davowe.

⁵ Kaguğuahuw küñama kazeğiyijome,
 Seyo púsa je lüñew daajo;
 Seyo üküngüw ná gudojo, lüvzüw lüñew gïabo
 Sena gïabo rhugro lyijome.

⁶ Seyo uso duw chebiw ye vyew Tawgyew i muchoaihuw hohujome.”

⁷ Dju upu dyam na ichi ge baptisma lajoñe jihuañe jikutsüdaw na, se na i che, “He byu üsa nawa, djó dju truda, he kalai lusuvyüw yo gë jehuatsüwe che?”

⁸ Drü-lu vyegudofilaw kuw sheje lakuwe: seyo nudzoğ-nudzoğ drü-lu ge ana djuvyelajo dawwe, se ñi aki-awu ye Abrahameme; hado cheme no dju chengkoime, Tawgyew i he kunu yo je Abraham íbo mulo lakülyefijobame.

⁹ Seyo ya bo puğje ye shoñ ükrütrü ge vyedabi, sündada ha shoñ ye sheje uw yo majema, se na poskealye mi ge foahuebabi.”

¹⁰ Seyo nüna na í dzü, “Sename ñi ha dajowa?”

¹¹ I ná tru, “Djuchi ge polu ksü duma, se djuchi ge ñima se i djüwe seyo djuchi ge tsajo duma, se naje süna datsüwe.”

¹² Seyo patso-law na je baptisma law jiku, seyo í dzü, “He dadrüwwa, ñi ha dajobya?”

¹³ I ná trutcho, “Dju djóbo gïyokrüima, se í fojelüzbüw patso djulajo dawwe.”

¹⁴ Seyo rhünakew na je í ana dzü, “Ñi ha dajobya?” I ná chetcho, “Djudru ge je külü djujowe, seyo mülaw-mütraw djufojo dawwe, seyo nudzoğ chiğa dadaw ge lüshüjo dawwe.”

¹⁵ Sündá nūna na se í vyeksūñe ġyomkoi sese, seyo vyew na nadrü-nalu ge Yohañ ifo go vyemkoi, haña he ashá he i Masi mošomachañe.

¹⁶ Sündawñe Yohañ i vyew ná che, “Nobó djo hu yo baptisma djüwbame, séšoye i kalaime, dju nó cheje saw-lyiw bolufowme; no ivro ge ichi shita udro tashaijoje ugō ñiw sünabame, se i djó ġulo ġüdraw seyo mi yo baptisma djüjome.

¹⁷ Ichi chiaġi ye ichi ūgzü a me; seyo i í ñetchü ye uw yo dagüdrajosome; seyo pulgü tcholadaw na ūšaka lakeġijome, séšo ūġütchü na ye mi ge foajo se mi ye keje madzoñoajo.”

¹⁸ Sündalye i nūna na dadrüñ-dadrülye shi-ñu uw je trusejome.

Herodas i Yohañ í pache ge kiw

¹⁹ Sešoye i psüġimko yo ñetrü a go nugo Herodes í iñuw Filipus ufum Hirodiyas ifo go, vyew lalo datruw nafo se na sei í dadaw na fokülye.

²⁰ Sündada Hirodes i vyew naġi yo je i fow lalo je datru, Yohañ í pache ñe ge shü vyewe che.

Yohañ yo Jisu í baptisma djüw

²¹ Vyew na baptisma latsüwñe, seyo Jisu je baptisma lalyeñe küġü ġyo, sündawñe ñedzü müsaag.

²² Seyo ġulo ġüdraw paġusa veduw ye uso dañe idru ge ġudrokülya, sündá ñedzüdru go ñu zekülye “Ba nó sawme, ba yo no šüpo lüshüdame.”

Jisu i galyiw

²³ Jisu i shi-ñu trukülyewñe, sese i oje dzüġü kuw. I Joseb üsaw (nūna na ana vedabi), seyo i Eli ichi,

²⁴ Seyo i Mattat üsaw, seyo i Lewi ichi, seyo i Malki ichi, seyo i Jannai ichi, seyo i Yusuf ichi,

²⁵ Seyo i Mantiyah ichi, seyo i Amos ichi, seyo i Nahum ichi, seyo i Asaliya ichi, seyo Naggai ichi,

²⁶ Seyo i Mat ichi, seyo i Matiyah ichi, seyo i Simi ichi, seyo i Yosek ichi, Seyo i Yoda ichi,

²⁷ Seyo i Yohañ ichi, seyo Resa ichi, seyo i Jarubbabel ichi, seyo i Shaltiyel ichi seyo Nari ichi,

²⁸ Seyo i Malki ichi, seyo Adi íchi, seyo i Kosam ichi, seyo i Almadam ichi, seyo i Er ichi,

²⁹ Seyo i Jisu ichi, seyo i Aliyejer ichi, seyo i Yorim ichi, seyo i Mantat ichi, seyo i Lewi ichi,

³⁰ Seyo i Simon ichi, seyo i Yahuda ichi, Seyo i Yusuf ichi, seyo i Yonan ichi, seyo i Eliyakim ichi,

³¹ Seyo i Maleyah ichi, seyo i Minnah ichi, seyo i Mantat ichi, seyo i Natan ichi, seyo i Dawud ichi,

³² Seyo i Yise ichi, seyo i Obed ichi, seyo i Boj ichi, seyo i Salmon ichi, seyo i Nason ichi,

³³ Seyo i Amminadab üsaw, seyo i Arni üsaw, seyo i Henson üsaw, seyo i Peres üsaw, seyo i Yahuda üsaw,

³⁴ Seyo i Yakub ichi, seyo i Isahak ichi, seyo i Abraham ichi, seyo i Terah ichi, seyo i Nahor ichi,

³⁵ Seyo i Sarug ichi, seyo i Rawu ichi, seyo i Peleg ichi, seyo i Eber ichhi, seyo i Shilah ichi,

³⁶ Seyo i Kenan ichi, seyo i Arafzed ichi, seyo i Shom ichi, seyo i Nuha ichi, seyo i Lemek ichi,

³⁷ Seyo i Matushilah ichi, seyo i Hanok ichi, seyo i Yirid ichi, seyo i Mahallel ichi, seyo i Kenan ichi,

³⁸ Seyo i Enosh ichi, seyo i Shet ichi, seyo i Adam ichi, seyo i Tawgyew ichi üsawwa.

4

Jisu í purkya

¹ Sünda Jisu i ġulo ġüdraw yo tukoañe, Yordan hu go kakutcho; seyo ġülo yo bye ge laġüşhi laġüşhi vye;

² Seyo ñegi piġü kuw mütü na dakütso-kikütso ho. Se ñeto ge i haje-haje matsa-matuw seyo se ñeto kamdzohuñe, sese i luhuşüku.

³ Sündañe mütü ye í che, “Sünameje ba Tawgyew üsawşommeje, he kunu ye cheha odje lyaweñe.”

⁴ Jisu i í trutcho “Ġidame, nüna na odje yo aka mashüjome.”

⁵ Sündatchowñe mütü ye í la djeketcho sündalye lügañe pu udru gow vyew druguw-drulyiw go ñetrü ná shemdzoa.

⁶ Sündalye mütü chetcho, “No he na he i vyew bá übraw daweñe djüjome, sünda no ġagra djüjome, hado cheholye he na braw nobabi, seyo no dju djügoñdama djüfijobame.

⁷ Sündada ba nó küġümeje, he na vyew bachi lyajo.”

⁸ Jisu i í chetcho, “Ana ġidame: ‘Ba bá nudzoġ Tawgyew í gaga dawe; seyo í küġüjo dabawe.’ ”

⁹ Sündatchowñe i í lalye Yarusalem go küġüw ñegru ñelütsü udru ge lalyi vye, sündalye í che, “Süname ba Tawgyew üsaşommeje, babraw bá nudzoġ he ayo üla ge gaawe.

¹⁰ Hado cheme ġidabi, ‘I bábo í sorgomuko ná babo ġaksüweñe dügyejome’

¹¹ Seyo ‘I bábo ügzü yo lolajobame, hado chemeje bá gaañe kunu ge bashi í mapadügyejoñe.’ ”

¹² Jisu i í chetcho, “Ana je chedame; ‘Ba nudzoġ Tawgyew í dafimsoima djuhojo dawe.’ ”

¹³ Mütü ye í dafiyima madafima da hopüñemdzoahuñe, sündawñe memja kuw ütrü yo kahatrükralye.

Galili ge Shi-Ñi trukülyew

14 Sündatchowñe Jisu í Ġulo Ġüdraw yo tukoañe, Galili ge katcho, sündá ífo go ñu ye üñisa üñisa yo küña ñetrü duma vyew dzühuzeġiatsü.

15 Seyo i süge Tawgyew í küġüw melye ñe ge truw ñe ge shi-ñu truñgudru, sündá vyew na í trotsüküġatsü.

Nasrat ge Jisu í maġoñiw

16 Sündalye i Nazrat ñetrü ge jiku; hayo sa a í dalañe shükyedama sese; seyo í nudzoġ daw üġü dajo ge ġyogow ñeto kuwñe küġüw ñegru ge jiñe kako ngüjoñe gudzu.

17 Ñihow Yasaya í ġilyedaw kako ye í djü, sündá i kako ye tahalye, hayo sa a ġidama se i lakülye:

18 “Tawgyew í ġulo ġüdraw nodra dume,
Sündada i sapse na shi-ñu truweñe nó lakülyedame,
Seyo nó ana dawewñe kiadame, külyidaw ná shaaweñe,
Seyo üñi ġew ná hofidügyewewñe shi-ñu na truñe,
Seyo dügrülyadaw na lahuaiweñe,

19 Seyo Tawgyew ichi lüshü ġyojo oje í shi-ñu trujo.”

20 Sündalye i se kako ye pyelyealye í shürhaw üġzü ge djü, sündalye ġyoag: seyo se küġüw ñegru yo nüna na í homdzoatsü.

21 Sündawñe i ná che, “Yow he ġidaw ye djovro a damdzo-jemme.”

22 Seyo vyew na í umsolyewñe vyeatsü, seyo ha shi-ñu ye i umdzu yo zehuahima, se na i djühulye vyengatsü; sündá ná ubo chetsü, “Haña he i Joseb üsaw mowma?”

23 I na chetcho, “Djo nó he anabo zeġajobamme, ‘He mügawwa, nudzoġ í uw dagyolatchowe! No hadamje ñu dzühudaw ye ba Kafarnahum ge dadaw ná age nudzoġ ñetrü a je dawe.’ ”

24 Seyo i je chetcho, “No djó umsow cheime, djú ñihow je yow kuw nudzoġ ñetrü ge üġō mapawme.

25 No bá umsow cheime, Eliya í ñeto ge oje dzü kuw ñedzü ye pyelyeatrülye, ana lyiladjew vyew druguw-drulyiw ge luhušümoatsü, sese Israyel ge šüpyo müjem kadā dutsü.

26 Séšo Eliya í se namko ye djuchi ge je maki, Sidon go Sarfat ge Jewishñim mo müjem a ichi a aka ki.

27 Seyo ñihow Elisha i shüi ñeto ge Israyel to šüpyo ġoġo naw kadā, séšo Naman ñidaw Jewish mo Siriya go nüna yé tralye vyew na so ġüdraw madaw kadā.”

28 He ñu ye dzühubyo-dzühuġyowñe küña na se ñegru a duma, se na vyew lusvyumfoatsü.

29 Sündalye gudzulyitsüñe í na se ñetrü yo lahua, sündá ha pudru to í ñetrü ġyodama, se pudru ulodza ge la jiku, í seyošü üla ge dügaajoñe.

30 Séšo i nalumko yo kahulalye katrükralye.

Ĝulo ma uw í ñepsü ge lahuahuw

31 Sündatcholye i Galili ñetrü go Kafarnahum ge jiku, sünda ĝyogow ñeto ge nüna ná shi-ñu tru.

32 Se na í shi-ñu ye dzülye mavyenghuatsü hado chemeje í ñu ye dügyebyo-dügyeĝowdra du.

33 Melye ñe ulunge nüna a du, djuso ge ĝulo mauw kamyó ĝyodama. Se i šüpyo gow yo šogzukülye,

34 “He Nazret go Jisua, no bá ha tsünghu? Haña ba no damtrüajoñe jikuwma? No bá danghuwšowa ba djuma? Ba Tawgyew ichi güdraw üsaw ñe sakülyedaw yewa!”

35 Jisu i í züñe che, “Mazüda ĝyo sünda i yo kahuag!” Sündawñe se ĝulo mauw kamyodaw ye ilungo haje ma uw madalyew kahuag.

36 Sei holye vyew na aañiñe vyeatsüg, seyo se na naĝütchü ge ñu truĝiñe che, “He i ye küna ñu baješoma? I se ĝulo ye ñigudu yo maĝew dügyebyo-dügyeĝyoiwa, sündawñe se i je kuhuabai.”

37 Hangge je hangge je ímdo í kadang ifo truĝitsüabai.

Patras ichi apyeñe utro nüna na dagyow

38 I ñegru yo kahuañe simon í ñe ge ji, süge se Simon (Pirat) ichi apye ye uso shüñe nala. Sündada í ibo i küĝütcho.

39 I ichi üñisa a gudzulye se usso shü nadaw í züg, züwñe sese usso shüw ye gabruag sünda uwabyo-uwaĝyowñe i süge age da í datunotcho.

40 Dru guamkoi sese dju-dju sama-sama yo nomñew yo so natsüdama, se na ichi ge la jikutsü, sündawñe i ügzü ye nadru ge a a dañe vyeñe na dagyotsü.

41 Sündawñe ĝulo mauw na šogzuñe che, “Ba Tawgyew ichi üsawwa,” šüpyo nachi go kuhuatsü, séšo i se na züñe seyo ñu mazüdügye, hado chemeje na danghudabi, i Masi cheñe.

Galili ge shi-ñu truw

42 Sünda ñetoahuwñe i namko yo kahuañe ĝüdzüw ge katrükralye, sündawñe upu na í tchüsetcho ichi a kakusetcho, sünda í dügoha, nachi go djukatrükralyewewñe.

43 Séšo i ná chetcho, “No ñetrü utro ge je Tawgyew ichi shi-ñu trujo dulumme, hado chemeje nó he í daweñe kiabadamme.”

44 Sünda i Galili ñetrü go ñegru ge shi-ñu tru.

5

Jisu ichi shürhaw

1 Upu na ichi ge gapulotsüñe, seyo Tawgyew ichi shi-ñu na dzütsüküĝütsü, sünda ibó ge Gannesrat go huĝülyi üdza to gudzu, sese ana a da.

² Sese i huğülyi üdza ge lü ksü vyedaw hohu, seyo tromaw-dzükrüw na ná tromaw na tchegüdrankoi.

³ Se lü namko ye a ye, se Simon ichi ye lyimyoalye, i í hudza ge me latrülyeweñe küğüñe che, sündawñe i lü ge gyolye i nuna ná shi-ñu trukülye.

⁴ I ñu trufiahuwñe, sese i Simon i che, “Gyuw ge la jikewe, seyo tchü lügyejoñe bá tromaw ye majo dawe.”

⁵ Simon i í chetcho, “He Tabrawwa, no yakülyi ñegimütrü kuw koğiw dawye ha malügyelafibi; sedamje ba ñu cheda, tromaw mamkoime.”

⁶ Se i süna dawñe, ichi tromaw ye tchü aña-šütchüw tromaw gağalajew malgrula.

⁷ Sündaw i í draw utro lü ge gyodaw na, age djeñe latunoweñe naje damche: seyo se na djekutsüñe, se lü ksü ye gudze-gulüšüahuw lagu vye sünda lü yeje mülajo ladjew latchuğyo vye.

⁸ Se na holyebi Simonñe Patras naksü Jisu üshitrü ye gaañe, seyo che, “He Tawgyewwa, notrüğań yo katrülyewe, hado cheme no lalo nünabame!”

⁹ Hado chemeje aña šütchüw tchü lügyeladaw í holyeñe i seyo üdra ayo na mavenghuatsüdabi;

¹⁰ Seyo sünatchombo Jabdi í üsaw Yakub ñe Yohań naksü je, dju Simon í shürhawma, mavyenghuatsü dawñe Jisu i Simon í chetcho, “Djuğejodawe, ayogo ba nuna ná üshü tsüłajo dawe.”

¹¹ Sündawñe na lü ye hudza ge lakulye seyo sa a tralye ífum ífum kase.

Ġoġo í güdraw daihuw

¹² I utro ñetrü ge dulu sese, se süge ġoġo yo tsafoahuw nuna a ye jiku, sünda i Jisu í hohulye uvro ye gakülyea, sündalye küğüñe che, “He Tawgyewwa ba dagyojoñe vyedameje nó ba muchoadügyefijošome.”

¹³ I ügzü ye djüñe dadülye che, “Bá muchogüdraweñe, no vedame.” Sündawñe ichi se ġoġo tsadaw ye sešügudo ye kagüdrüatsü.

¹⁴ Sündawñe i í trudrüse, “Djusaje djutruwe, séšo kañe babraw ba mügaw na shewe, seyo ba kunda güdraw mucholawma se fo ye, se hadamje Musa i djüvyelyedama se í djüwe ifo gow trufijoñe.”

¹⁵ Séšo íbo gow ñu šüpyo tüğa-zeğitsü, seyo šüpyo nünapu ye ichi ge shi-ñu dzüjoñe seyo sonaw na dagyolajoñe ichi ye keğitsü.

¹⁶ Séšo i nuna ñiw ge utroga kagañe küğüñgudru.

Jisu i külyi-ğüdjew naw í dagyo

¹⁷ Ahua ye ana a datcho, i shi-ñu trumkotchoi sese, Farisiñe dakyew kikyew na sa a ġyoda, dju Galili seyo Yahudiya go kũña ñetrü duluma sego na, seyo Yarusalem go jiku; sünda naw na dagyoijoye Tawgyew í ġagra gokyew ye idra ye duse.

¹⁸ Seyo howe kagua na külyi-ġüdjew naw nũna a ye, ñelütsüdrü ge lalyi, seyo na í ġütrü ge la jikuñe lamyoañe seyo Jisu ivro ye vyejoñe daahi.

¹⁹ Seyo na upu mutchusübyeñe ñelunge la majimyofiwnẽ, na ñelütsü udru ge lyilyiñe seyo ñeltsü tahalye, í ġütrü nadra ye Jisu uvro ge ulungko ye kikülyeaha.

²⁰ Jisu i na umsow lutuksüw vyedaw ye holyeñe che, “He nũna bá lalo ye muchoajemme.”

²¹ Sündawñe shizew-ñuzew nañe Farisi naġütchü cheġi, “He i djubajema, Tawgyew í mow uw zehi ye? Tawgyew í tralye dju lalo na muchoifiwa?”

²² Jisu i nalu ge vyedaw danghulye ná che, “Djo djolu ge ha vyemkoiya?”

²³ Hado vyedoña? Ana chejoma, ‘Djo lalo ná muchoadama,’ semome ana ma ‘Gudzuñe seyo kutro djeg?’

²⁴ Séso ye ana dadá djo danghujo dawwe nũna üsaw í druguw-drulyiw ayo lalo muchoaifiwme.” I se külyi-ġüdjewa nado í che, “No ba chemkoi me, gudjuwe seyo bá ġütrü ye lalye ba ñe ge la kabi.”

²⁵ I jeañe ütrü a gudzu, seyo hayo sa a í gudru dama se í lolalye, Tawgyew í troye í nudzoġ ñe ge kajebi.

²⁶ Sündawñe vyew na mavyenghuatsüñe Tawgyew í trotsü, sündalye šüpyo ġeñe che, “Yow ñi sama a ñu hohujemme.”

Matti í balaw

²⁷ Seyo sefum a i ñepsü ge jihua, seyo Leviñe ñidaw a ye patso-law nũna ye patso ñe ye ġyodaw hohu, sünda í che, “Nófum kasewe.”

²⁸ Sündawñe i vyew tratsülye ífum kase.

Lalo nadra tsasaw

²⁹ Sünada Levi i í ñe ge ava tsaw rhano a djü; seyo sünda se patso-law nañe seyo nũna utro a upua nañe üša ġyoñe ava tsa, šüpyo upu dyam.

³⁰ Seyo Farisi nañe seyo shizew-ñuzew nañe í shürhaw ná ana cheñe zekütso-zemrhü “Djo patso-law seyo lalobraw nadra hado ġyoñe üša tsa-tu daiya?”

Luhušüw-lukrow ġyow ge Jisu i dziw

³¹ Jisu i na chetcho, “Müga ñachi ge so manaw na majijome, séso sonaw na jijome.

³² No nũna ġüdraw na mowme, lalo duw ná nadrü-nalu lagudoijojñe balaw kakuwme.”

³³ Seyo na í chetcho, “Yohań í shürhaw na ye şüpyo uw yo matsa-matuw küğüñe ġyoiwa, seyo sünambó Farisi nachi go na je, séšo bá shürhaw na ye tsa-tuiwa.”

³⁴ Jisu i ná chetcho, “Hawa ba name gzü jiw nūna ná gzübraw ye nadra dulu sese, matsa-matudügyefijoma?”

³⁵ Séšo se ñeto je kakujome, sayo sa a gzübraw ye nayo utroga dajome, sese na se ñeto ge matsa-matuw dajome.”

³⁶ Ná i zeğaw a ze tru, “Dju nūna yo gye ükün ye tağañe dju matüpsüwme, semome ükün ye tağajobabi sedamje se tüpsüdaw ye je gye üme üdra makamyogįjo.

³⁷ Seyo dju je tsühu ükün ye dzaği üme gye mapyujō, semome tsü ükün ye se dzaği üme yebó byoğalye kasuajo, seyo dzaği je mau lyajo.

³⁸ Séšo anggur uhu ükün ye dzaği ükün ge pyujō dume.

³⁹ Kagua nūna na tsühu üme ye tulye ükün ye matuğōñjo, hado chemeje na truibī, üme ye ufomdodašo cheñe.”

6

Jisu Sabbat go Tawgyew

¹ Sündalye ġyogow ñeto sehu i vi goşü dañe kamkoi sese, seyo í shürhaw na pu ye trüküyelalye, ügzüku yo şhükrüñe tsa-tsa ka.

² Sese Farisi namko yo na hadamje chekülyetcho, “Djo süna chiğa hado dawwa hai ye ġyogow ñeto ge madafiwjoma?”

³ Jisu i ná trutcho, “Hawa djo he í mangüma, nugo Dawudñe üdra ayo na luhuşüda sese ha dawma?”

⁴ I kündañe Tawgyew ichi ñe ge jima, seyo lapsü djüdaw go odje na lañe tsa, se na bó mügaw ná tralye djusaje matsafijo, seyo ídra yo naje djüdalubi?”

⁵ Sünda i ná chetcho, “Nūna üsaw ye ġyogow ñeto ge je Tawgyewbamme.”

Ġyogow ñeto ye sonaw ná dagyow

⁶ Sünda ana dañ ahua ye ġyogow ñeto kuw sese i ñegru ge jiñe shi-ñu trutchoñe da ġyo; seyo sa a nūna a duw ye ügzü fuvro go krosdzüada.

⁷ Shizew-ñuzewñe Farisi na í hadamje zeñe ñu jojoñe hoksü ġyo, i ġyogow ñeto ge dagyoahima madagyoima hojoñe.

⁸ Séšo ibó nalu vyedaw dāhuñda; sündada i se ügzü kroadaw nūna í che, “Pülyiñe, umko a gudzug.” I pülyiñe gudzu.

⁹ Jisu i í chetcho, “No djo he dzüime ġyogow ñeto ge ha dafijowa, uw dajo veima mo mau dajoma; şhüw ná ġaksüjoma mo mağaksüjoma?”

¹⁰ Seyo i vyew ná hozeğiatsülye, se nūna í che, “Bagzü ye vro ge djüwe.” I süna da, sündawñe ügzü ye muchoañe uw lya.

11 Séšo se na ñepsü ge kuhuatcholye lusvyuñe nağütchü poğitcho, ñi he Jisu idra ha dañelye?

Shürhaw ġü yo ksü

12 Seyo se ñeto bó i pudru ge küğüw katrükralye, seyo akülya ñetow Tawgyew í küğü ñetoaha.

13 Ñetoahuwñe, í í shürhaw ná balalye namko ye ġü yo ksü ye pola, sündalye ná shürhawñe che.

14 Sünda se na heimme; Simon í ñiñi ye i Patras ñe je vye; seyo í ñuw Andriyas, seyo Yakub, seyo Yohañ, seyo Fillipus, seyo Bertulme,

15 Seyo Matti, seyo Tomas, seyo Halfais í saw Yakub, seyo Simon dju í Jeletes je chewma,

16 Seyo Yakub í saw Yahuda, seyo Yahuda tcho Iskariyoti, se í í tsadrüahuw lyikülye.

Jisu i nüna ná truñe dagyow

17 Sündawñe na ídra kagalye no üpra a ye gudzutsü, sünda ichi shürhaw na upu mutchu, seyo vyew Yahudiya na, seyo Yarusalem, seyo Sor seyo Sidon go sütügülü üdza ge küña ñetrü ma sego şüpyo nüna upu na je,

18 Dju i shi-ñu truw í seyo ġulo ná muchoañe dagyojoñe ichi ge jikutsüdama, süge dutsü. Seyo chigüje na maw da vyedaw na je uw dagyo.

19 Seyo vyew na í kidüğyoñ vyetsü, hado cheme íso go ġagra na kahuañe ná muchoahí.

Gağüze shi-ñu

20 Sündawñe í í shürhaw nachí ge hoñe che,
“Şüvzüwme bá, ñeto daw ye,
Hado cheme Tawgyew ichi ñetrü ye bachime.”

21 “Şüvzüwme bá je, dju luhuşüdama,
Hado cheme ġaksüjome,
Şüvzüwme bá, dju ksei ma;
Hado cheme tchüjome.”

22 “Şüvzüwme bá, dju nüna üsaw íbo
Bá mau dajome,
Seyo bá lahuajome, seyo bá tchüğö-hoğojome,
Seyo bá ñiñi danghulye vyetsü djojome.

23 “Sehu ñeto lüshüñe gyojo dawé, hado cheme hojo dawé, babó soğgo ge lapsü dume. Í bupye-ñipye ñihow kew nadra je süna dawbamme.”

Dzüngawhuw shi-ñu

24 “Séšo tui me djo, dju bo-luko duma,
Hado cheme djo djolu vyew apyew pajebi.”

25 “Tuime djó dju hesahe ġaksüwdadama,

Hado cheme luhušüjome.”

“Tuime djó, dju hesahe tchüima,

Hado cheme duhu pajome seyo ksejome.”

²⁶ “Tui me djó, nüna na djodruge uw chejome,

Hado cheme ná bupye-ñipye na mülaw ñihow nadra je ana dawbamme.”

Vyeñiw na je nülvowe

²⁷ “Sešo dzüvodo djó no chei me, bá vyeñido na nülvow dawwe; bá dju mau daiba sena uw dajo dawwe.

²⁸ Bá dju chemui ma, sená gağüzü djüjo dawwe; bá dju zeamei ma, senábo küğüijo dawwe.

²⁹ Dju bákrumo ge tcheima, ichi ge krumo a go je djüwe; seyo dju bachi güfaw lağaima, se í bá polu djulawe djuchewe.

³⁰ Dju damje bá prüima sená djüwe; seyo bachi gañ lağaimaje, í djuprüwe.

³¹ Seyo ba nüna ná bá küna dawewne vyedama, baje ná süna dajo dawwe.

³² “Sešo ba bá nülvow dai ná akasa ba nülvow dame je, ba ha dew dawwa? Hado chemeje lalo dado na je, ná dju nülvow daima na je sená nülvow dašoi.

³³ Ba bá dju uw daihi ma sená akasa uw daijobame, bá ha dew chejowa? Hado chemeje lalo daw na je süna bó dašoi.

³⁴ Sešo ba í chi gudzumeje, nachi go patchojoñe vyemeje, bachi ha uwwa? Hado cheme lalo daw nağütchü je chi bó gudzušoi.

³⁵ Sešo bá vyeñido nadra nülvow dawwe, seyo uw dawwe, seyo patchojoñe mavew chi gudzujo dawwe; seyo babó dew lapsü lyijome; seyo ba Tawgyew í üsañe chejome, hado chemeje i se nabó dju mašüvzdügyejome, dju kew nadru ge nülvoi me

³⁶ Baw küna nülvosüwma, sünambo ba je nülvojo dawwe.

Udru ge dju truchoawe

³⁷ “Külü dju jowe, sündame badru ge je külü majojome; trudañe djuchewe, badru ge je truda machejome; aloijoda, sündameje bá je alojome.

³⁸ Djüjo dawwe, sündame bá je djüjome: nüna na düsdzü-düsdzüñe seyo so-soñe seyo gusuañe badru ge suiijome, hado cheme ha chi yo ba tsoima, se chi yo babó je seiyo tsojome.”

³⁹ Sündatcholye i ná zeğaw a yo chetcho: “Hawa ñiğew ye, ñiğew í ğabo trufijoma? Hawa naksü noğü ge magaaajoma?

⁴⁰ Shürhaw na nudzoğ chi dadrűw na yo madewfojome, sešo djudamje dagro dama, i í chi dadrűw imbó vyedujome.

⁴¹ Ba bá ñuw ichi iñi go gashüsaw shobosa í hado hoiya, seyo bá nudzoğ báñi go sholbosa duw ye maholama?

⁴² Seyo ba bá nudzoḡ bañi go sholbosa mahomeje, ba bá ñuw ichi í kúnda chefijowa, ‘No ñuwwa, mola bañi go gashüdaw ye lahuajoma?’ He dakulyutchüwba, uvromashü bachi iñi go sholbosa lahuavzúwe, sündameje sese bachi üñuw ichi iñi go gashüdaw ye hohulye lahuahifjome.

Shoñ í hosüjo ye üje yo

⁴³ “Ha shoñ uw a je ñime, dju sheje ha madaḡiw jewma, seyo ha madaḡiw shoñ je ñime, dju shejo uw jewma.

⁴⁴ Shoñ küña duma, nudzoḡ üje yo hosüwme; hado cheme nüna na gralye go lufuje mapyowme, seyo küfsüje go angur mapyofjome.

⁴⁵ Nüna uw na nudzoḡ lu go ñu uw chehuahi; seyo nüna mau na nudzoḡ lu go mau ñu na mau yo chehuajome; hado cheme lu ge ha gudama se i namdzu go kahujome.

Ñe daw nüna sama ksü yo duw

⁴⁶ “Ba nó ñu chew ná madzüjomeje, sünameje hado nó ‘He Tawgyewwa, he Tawgyewwa,’ cheiya?

⁴⁷ Dju damje nochi ge jikuima, seyo nó ñu í dzühulyeñe zew dzüima, no djo trujome, na dju vyeduwma?

⁴⁸ I se nüna i vyeduwme, dju ñe damkoi sese nogüdzü ye ḡyuw chigalye kunu ge ñekrü dzuñe, seyo hutchuḡo-ḡolüşü ye idru yo da kaa, séšo í madañifjome; hado chemeje i lyow yo dada.

⁴⁹ Séšo dju dzhutcholyeñe zew madzüma, se i se nüna i dambo vyeduwme, dju nogüdzü ye ñekru lyow madaw dadama. Se udru ge hutchuḡo-ḡolüşü kame, i sebyo-seḡyo ngüañe seyo se i gaañe ganü-gaḡaaha.”

7

Kulokyew ichi umsow vyedaw ye Jisu i vyelamoa

¹ I í ñu ná nüna na trumdzoalyeñe Kafarnahum ñetrü ge jiku.

² Sünda mükaw a ichi kulom djú i, í ñeşümbo veduw vewma, usso nañe dzüjo veduw lyada.

³ Jisu iñiñ hutraw-notraw dzühulyeñe Yahudi ñetrü go nungow na ütrü ge í kulo í jikuñe dagyoïwe cheñe ki.

⁴ Na Jisu ichi ge jikuñe ishitrü ge gaañe ana che, “Ba ibo he i daijo daw

⁵ Hado chemeje i ñi ḡübye na nülvo daw, sünda ñi melye ñe ije i daihu.”

⁶ Jisu i nadra nadra hutro jisa, sünda i ñe yo aña üḡa ñibisa sa a, mükaw i üdraw na yo ana cheñe ki, “He Tawgyewwa, ba ñikuñisüw djudajodawe, hado chemeje nochi ge übadzü ñime, ba no ñelütsü pudaw ge jimyojo.

⁷ Sündada nudzo no bachi ge jikujo übadzü duñe mavemme, sé ba bá ñu i truñe no kulo usso dagyoiijodawe.

⁸ Noje nuna na üla yo nünabame; sünda shipashi na nogzü geme, sünda nuna a í ‘Kab’ chewñe se nuna ye kaw, sünda ütro a í ‘age kab’ chewñe i kaku; sünda no kulo na ‘He i da’ chewñe na se chiğa i daag.”

⁹ He ñu í dzühulye Jisu i lumashüw vea, sünda i ufum ge nuna upu kalasalai nachi ge tcholtruğiañe cheñ, “No djo he trungkoi heme, Israyel ge je no ana veksüw mapame.”

¹⁰ Sünda nuna kidaw na ñe kaku hobanda, kulo usso nadaw i dagyovodabi.

Dzúdo í shüdügye

¹¹ Me ñegi fum sa a i Nayan cheñe ñetrü a ge ji, ichi shürhaw nañe seyo nuna upu üdra jisa.

¹² I se ñetrü gow fûta ütrü iñisa jiku, hojodawe, nuna na ñimo a í ñepsü ge la kahuangkoi; se ye üyan üsaw akasa ba, sünda i müjem: sünda ñetrü gow şüpo nuna aña üdra dusa.

¹³ Í hoñe Prabu üdrapra-ulupra na, sünda i cheñ, “Dju ksewe.”

¹⁴ Südawñe i iñisa ge jikuñe ñimo vedaw i ki; sünda gidaw na gogog jebi, südawñe i cheñ, “O muhumya, No ba chengkoime, pakülyejodawe.”

¹⁵ Südawñe se dzüdaw ye pakülye gyo, sünda ütrü zekülye: sünda i í üyañ i djülye.

¹⁶ He yo vyew na gëatsü, sünda na Tawgyew ibo gow troñe ana che, “Ñimko a şüpo dyew ñihow truw a kakülyadame, sünda Tawgyew i í nülwov í nuna na she.”

¹⁷ Sünda ibo gow ñu ye vyew Yahudiya seyo iñisa gow vyew ñetrü ge truzeğiatzü.

Yohañ Baptisma djüw í dzüw

¹⁸ Sünda Yohañ i í shürhaw na he ñu na trutsü.

¹⁹ Südawñe Yohañ i í shürhaw nangko yo ksü i balalyeñe Prabu ichi ana dzüw ki, “Kakujo ye babamma, mo no utro na gëyokrüjoma?”

²⁰ Na ichi ge jikuñe cheñ, “Yohañ baptisma djüw i ñi bachi ge ana a dzüw kidame, se ye kakujo ye babamma, mo no utro gëyokrüjoma?”

²¹ Sa yo sa a i şüpo na usso naw yo seyo duhu yo lahuaida; sünda mütü kamyodaw seyo şüpo iñi giw na iñi djü.

²² Sünda i í che, “Djo ha ha hohuñe dzühudama, kañe Yohañ i trujo dawew; iñi gëyew hohungkoimme, üshi lyew kahungkoimme, gôgo nadaw i dagüdrajemme, ufu vaw dzühungkoimme, sünda dzüdaw ye üshükülyejemme, sünda sapse na Tawgyew i shi-ñu trujeme.

²³ Tawgyew i şüvzüw djudra duma na ushi mahütrüjome.”

24 Yohañ i kidaw nūna na kawñe, Jisu i Yohañ ubo gow nūna na ana tru, “Djo bye ge ha how jiña? Ha, ñedzūlyiw yo age ngüa süge ngüa daw müsüg i?”

25 Nameje djo ha how jibaña? Ha, nūna gye howsa shedaw í? Howe, dju gye-ġuwo uw sheima sūnda ñe uw ge gyoima, na mahal ge ġyowwa.

26 Nameje ha how jimdobaña? Ha, djuma a ñihow í? Am, no djo trungkoime, ñihow truw ije dyewfo.

27 He ye sebamme, djubo ġidama: ‘Howe, no muko í bavro bavro kijome, dju bavro ge kañe ġabo gudow davojome.’ ”

28 “No djo trungkoime, mim naluhu yow sadaw na, namko ye Yohañ i dyewfo djuje mome sé dju Tawgyew i ñe ge imisafo dama, i se ije dyewfo me i.”

29 Sūnda vyew nūna na seyo patso-lavow naje dzühuñe Yohañ ichi gow baptisma lañe Tawgyew i umso ve.

30 Sé Farisi seyo shotuko-kunu davow na ichi baptisma malañe Tawgyew i ġabo shedaw i madzü.

31 “Sündada: no he shülsongkoi gow nūna na ha üdra tsojowa? Na ha veduda?”

32 Na se angasa na veduw dju bajar ge ġyoñe naġütchü ġuksuġiñe ana cheġiw, ‘Ñi babo bzüva viw, se ba ñuksu je mada, sūnda ñi duhu dawgeje ba kseje makse.’

33 Hado chemeje Yohañ baptisma djüw i odje je matsaw kakülyada seyo tsü je matuw kakülyada, sé ba cheiye, usso ge mütü du.

34 Nūna üsaw na tsa tuñe kakülyahume; se ba chewye, ‘Howe, tsaġotüw sūnda tsü tujetchüw nūna nawa, patso-law üdraw seyo lalo gifuġuw nadraw.’

35 Sé patsü-sholu ye nasaw nachi í umsoñe da veda.”

Simon Faresi ichi ñe ge lalobram í muchoahuw

36 Sūnda Farisi a ye í üdra ava tsasaweñe bakuda; sündawñe: i se Farisi i ñe ge jiñe ava tsajone ġyoha.

37 Süge se ñetrü yo lalobram a ye, i Farisi i ñe ge ava tsaw jikuñe ġyoda che danghulye, kunulübzü yo daw shüve a ge šowsa šow uhu lajikuda.

38 Sūnda üshi ütrü ge, fum gow gudzüñe kseñe üshi i üñiñü yo daġüñe sūnda nudzo ükye gow ükyetü yo dügüdra sūnda üshi ge umdzu yo tsa tsañe, šowsa šow uhu yo šüi.

39 He í holyeñe, se Farisi dju í baladama, üdrü-ulu ve vemche, “I ñihow truw nūnan meje i danghujobi, dju i kingkoima, se ye djuma seyo küna mimma cheñe? Hado chemeje ibo lalobrambabi.”

40 He í dzühulye Jisu i hutrolañe cheñ, “Simonña, no ba hadamje a chejome.”

41 “Bo djüw a ichi gudzuvaw ksü duw, a ye lumu yo bosüñ fo pom, seyo utro a ichi ge lumu yo bosüñ pomgü duw.

42 Ichi ge domgütchojo ñiahuñe, sündawñe i naksü maksü i ujobammeñe traaha. Sünda: naksümko a dju í nülvo fo vejowa?”

43 Simon i cheñ, “no vew ge, i djü añe traafodama.” I í cheñ, “Ba uw vebadamme.”

44 Sünda se mim ichi ge tcholtrüñe i Simon i che, “Ba he mim i homa? No ba ñe ge jikuwbi sé ba nó üshi chejo hu je madjü, se i noshi i iñišü yo dagzüida, seyo i nudzo ükyetrü yo dügüdraida.”

45 Ba no umdzo yo bubu matsa, se no jikuw yo i noshi i umdzo yo bubu madamdu.

46 Ba no kye ge tel je maşüi; se i noshi ge şowsa şow uhu şüida.

47 “Sündada no ba chengkoime; i lalo şüpo duw ye, muchoi-humme, hado chemeje i şüpo nülvo dada; sé djuchi mesame muchodama, i nülvow je mesame dawba.”

48 Sünda i mim í che, “Ba lalo muchoajemme.”

49 Sündawñe üdra a ava tsaw gýosadaw na, nadrü-nalu ve vetsü, “He lalo na muchoihu ye djubajema?”

50 Se i mim i che, “Ba kügüw ye ba gaksüi damme, lüshüw yo kajodabe.”

8

Jisu ichi shürhaw na

1 Se yo na ñetrü ñetrü shi-ñu tru ka, seyo Tawgyew í ñe gow shi-ñu na truñe kahi, sünda i nadra shürhaw gü yo ksü duse,

2 seyo mim üchea naje djuso gow mütü na lahuañe so naw na dagyodama, se iñiñ ye Mariyam Magdalini chewme, djuso gow mütü mro kahuadama.

3 Seyo Herodes i hokrüvow Kuja ufum Yoanañe Susana seyo şüpo mim na í ná gañ-miği yo na kulom na hotunovow.

Iği truw ichi zeraw

4 Nüna upu jikyegüatsüwñe, seyo ñetrü ñetrü gow na je ütrü ge jikutsüwñe, i zeğaw tru:

5 “Üsü traw nüna a ye üsaw traw jihua: trangkoi ye üsü üchea ye gâbokutru ge gaa, sünda dügrüprag, seyo ñedzü gow musu na pilag.

6 Seyo üche ye kunuka udru ge gaa, sünda shükülye, séşo hu gzüw mapawtro graha.

7 Üchea ye tsü namko ge gaa, sünda tsü na üşa üşa shüsañe i şümüla.

8 Seyo üchea na no uw ge gaada, sünda shülyilyeñe sheje fuğua dzaw djüda.” Ana chefialyeñe i gow yo ñu che, “Djuchi ge dzüjo ufu duma dzüsawe.”

Zeġaw yo trudriiw

⁹ I shürhaw na i dzü, “He zeġaw ichi hawa?”

¹⁰ I cheñ, “Djo Tawgyew i ñe go ñu na dzüsüdügýewbi, se utro na zeġaw go trujome, hado chemeje na hohuñe mahohujome, seyo dzühuñe je madzüsüjome.”

¹¹ “Zeġaw í chemeje ana me: üsü ye Tawgyew í ñume.”

¹² Ġabo üdza ge ġyodaw na dju dzühudama; sündawñe mütü na jikuñe nadrü-nalu gow Tawgyew í ñu i lañe katrükralye, hado cheme ana malyajoşoma na Tawgyew i küġuñe na ġaksüw pajo.

¹³ Kunnu udru ge duw na, dzüñe lüshüw yo shi-ñu bo laşoi, séşo ükrü ñiw tro ye na umso mesame kuw ve, sünda muchow ge gaaha.

¹⁴ Dju kusu ge gamyoadama, se na, dju dzüi na, sé vro ge kañe vesumow seyo bo-luko seyo shüng-dongkoi ge duhu ge gamyojome, sünda na sheje mañujo.

¹⁵ Sé no uw gow na he me, dju shi-ñu lu-drü lümyew yo dzüñe veima, na se yo sheje lakufijome.

Mitrü yo zeġaw

¹⁶ “Djuje müsaw tchüholyeñe boġtom yo pelye mavejo, seyo buġo ufum ge mavejo, sé mütchü ubo ge vejo, hado chemeje nuna jikudaw na müsaw pajo.

¹⁷ Haje mamüşüme, ha ye matruhoajoma; seyo haje trumşüw ñime, se ye madanghujome sünda müsaw mapajoma.

¹⁸ Sündada ġüdzüw ġyowe, ba ha vego dzüngkoima? Hado chemeje djuchi ge dumañe vedama, i djüpyojolume; seyo djuchi ge ñima, ichi gow se ije laġajome, ha ye ichi nudzoġchiñe vedama.”

Jisu ichi ñeşüġmüsaw

¹⁹ Üyaññe uñuw naksü ütrü ge jiku, sé nuna añe duw tro sa í matüvafilye.

²⁰ Sünda í tru, “Baññe bañuw naksü ba tüvajoñe ñepsü ge gudzudame.”

²¹ I í ñu i hutrolañe che, “No aññe no ñuw he bamme, dju Tawgyew i shi-ñu dzüñe seyo umso vewma.”

Şüw-lyiw law kaw í daġüdzüahuw

²² Sesüyo ahua ye i seyo i shürhaw na lü ge gyolyi, sünda i ná cheñ, “Age djebya, hu dügepsü ge jibo.”

²³ Sündawñe: na lü í shaa.

²⁴ Sündawñe na jiñe í dapüñe, sünda cheñ, “Tawgyewa! Tawgyewa! Ñi mauwfimauf lyangkoimme. Sündawñe i pakülyeñe ñedzü şüw-lyiw seyo hu i lashüraw i miġi sündawñe na damudoañe ġüdzüw lyaha.”

²⁵ Sündä i na che, “djo kügüi ye hanga?” Se na gëaglye seyo mavenghuañe nağütchü cheği, “He djubajema, ñedzü şüw-lyiw seyo hu naje dügyeiye, sündä na i chew dzütsü.”

Ġuló mauw na lahuahuw

²⁶ Sündä Giraseni na ñetrü ge jiku se ye süge pseğ ge Galili hu ütrü iñisa ge.

²⁷ I hudza ge jikuwñe, se ñetrü go nuna a í tüva, djuso ge mütü kamyodama. Seyo şüpo üğaluw gomdo gye-ğuvo je mashew seyo ñe ge je mağyow nuğu ge aka gýow.

²⁸ I Jisu i hoñe şogzu, sündä uvro toi gaañe gow yo ñu che, “He Toğgroyama Tawgyew üsaw Jisu! No badra ha dajo duwa? No ba chengkoime, no ñiku-ñisüw djudjüjodawe.”

²⁹ Hado chemeje i mütü í se nuna usso go kahuaawe cheñe dügyengkoi, sündä i üdra gow lyanggudrulai. Sündä nuna na í sülyeñtchü seyo sülyebu yo vogo vew, sedamje i se sü na gokyoaha, sündä mütü ye i sümbye ge sagañgudrudügye.

³⁰ Jisu i í dzü, “Bañiñ hawa?” I cheñ, “Upu,” hado chemeje şüpo uğulo na usso ge kamyolyedabi.

³¹ Sündä i í cheñ, “No noğu ge djukadügyejowe.”

³² Süge puge vo upulo dyew a tsamroñe gýoda, sündä: i í cheñ, “No nalung ge kamyodügyewe.” Sündä: i í kamyodügye.

³³ Sündawñe se uğulo ge nuna usso go kahuañe vo usso ge kamyoağ sündä se vo upulo ye gô ge gúañe husu ge gamyoñe gamüla dzüag.

³⁴ Fugulu gýokrüw na se dagjew i holyeñe gë djeshükralyetsü, sündä ñetrü ñetrü ge kañe he ñu i trutsüküğa.

³⁵ Sündä nuna na se dajew i how jihuatsü, sündä Jisu ichi ge jikuñe dju nuna usso go uğulo mauw lahuadama se ye Jisu ishitrü ge gye sheñe gýodaw i hohuñe gëag.

³⁶ Sündä hohusadaw nuna na ná tru, se üğulo mauw ye nuna i ñiku-ñisüw da vedaw í kundañe uw dagyodama.

³⁷ Sündawñe Giraseni ñetrü üñisa gow nuna na Jisu i cheñ, ñichi ayo kahuañe; hado chemeje na gëmgëkyoatsüdabi. Sündä: na lü ge gyolaye katrükralye.

³⁸ Djuso gow uğulo mauw lahuadama se nuna ye í che, no badra gýokyejodawe, séşo Jisu i kadügyelye cheñ.

³⁹ “Bañe ge kañe nuna na truwe, Tawgyew i kundañe babo aña şüw-lyiw chiğa dadama.” I kañe vyew ñetrü ge trüzeğiatşüg, Jisu i nobo küña şüw-lyiw chiğa dadama.

Sonaw mim seyo dzüdaw mimsa naksü dashütcho

⁴⁰ Jisu i Galili ñetrü go kalai sa a, nuna na lüshüw yo i tüva; hado chemeje na í gýokrüñe gýow.

⁴¹ Sündäñe howe, Yayir cheñe nuna a iñiñ dju ñegru go dyewma, i jikuñe Jisu ishitrü ge gaañe cheñ, “Noñe ge jisawe.”

⁴² Hado chemeje ichi oje ġüyo ksü yo üsam akasa a duw ye dzüasalaibi. I jingkoi ge nüna ishitrü ge gaatsü.

⁴³ Sünda mim a dju oje ġüyo ksügomdo šü lu ġyowma sünda dju nudzo shüw-duw na so naw dagyow nadru ge tratsüdabi sedamje djugzū gow je i madagyofibi,

⁴⁴ fum gow jiñe i gye üdza ge kig sündawñe sešüġdo a i šü luw ye lumudoag.

⁴⁵ Se yo a Jisu i cheñ, “No dju kidüġña?” Vyow na makitsüñe chetsüwñe, Patras seyo üdra ayo dusaw na cheñ, “He Tawgyewwa, bá he nüna fupulodaw na düñe badru ge gaiwa.”

⁴⁶ Séso Jisu i cheñ, “Djudamje a no kidawa hado chemeje no danghudabi nochi gow mu kahuajewaw.”

⁴⁷ Mim ye holyeñe no mamušufijobañe vewñe, usso som-sokyo jikülye, sünda ishitrü ge gaañe vyew nüna navro se trukülye, i hado kima, sünda kündeñe mekutcho dagyogdama.

⁴⁸ I í cheñ, “Nosamya ba küġüw ye ba dagyodašoñe, lüshüw yo kajodawe.”

⁴⁹ I trungkoibalubi ye, ñegru go müġaw i nüna a jekuñe che, “Basam dzüdamme: müġaw i duhu djujüwe.”

⁵⁰ Jisu i dzühuñe cheñ, “Djuġejodawe; küġüjodabuwe; i basüjošome.”

⁵¹ Ñe ge jikuñe i üdra ye Patras, Yohañ, Yakub seyo mimsa üyow-üyañ na tralyeñe djuje ütrü üñisa ge majidüggew da.

⁵² Sünda vyew na ubo kse-ñiġitsü, séso i cheñ, “Djuksejodawe; I madzüme, i drumubadame.”

⁵³ Nüna na i dzüdabi che danghuñe, i chedaw i dzüñe tchüg.

⁵⁴ Sé i ügzü í kigolañe ġuksuñe che, “He akoa pakülyebi.”

⁵⁵ Sündawñe ġulo üshükülyeñe pakülyeg; sünda i na dügye í tsajo hadamje djüwe che.

⁵⁶ Üyawñe üyañ naksü mavenghutsüg, sé i ná cheñ, he ha dajema se i djuje djutruwe.

9

Shürhaw ġüyo ksü ná jidügyew

¹ Sündatcholye i na ġüyo ksü shürhaw na balañe ná ġuló mauw seyo so naw na dagyow dajo gow bó vye.

² Sünda ná Tawgyew i ñe go shi-ñu uw truw, seyo so naw na dagyowe cheñe ki.

³ Sünda i ná che, “Jiw ge haje djulawe: shobo je djulawe, kapüġa je, odje je, bo je seyo polu ksü ksü djulawe.

⁴ Seyo dju ñe yedamje ba ġyogoima, se a ġyojodawe; sünda se yo kahuaodawe.

⁵ Dju bala maġokyema se ñetrü yo kahuañe ishigo ñelümo na pafiaodawe, hado chemeje nadru ge na je truksüfijo.”

⁶ Sūnda: na jihuañe ñetrü, ñetrü shi-ñu uw tru kaahi, seyo nūna ná djuje djuje dagyoñe kaahi.

Herodas í velamow

⁷ Seyo ñetrü go psügi fum yo nugo Herodes i he í dzühulyeñe mavenghuag, hado chemeje küña nūna na trudabya, Se i Yohañ dzüdo go üshükülyetchoda cheñe.

⁸ Sūnda küña nūna na he i, se Eliya i hohuda: utro na ana je chetcho, ahugo ñihow truw mügaw namko yo djuma üshükülyetchoda.

⁹ Sešo Herodes i che, “Yohañ ükye bo no poskeadügyembi, he ye djutchoa, djufo go ana ñu dzühumkotchoiya?” Sūnda i í hoñoñikülye.

Nūna hadza pom ná gyew

¹⁰ Sūnda í shürhaw na kakuñe na ha ha dalyedama ná í truatsü. Sūnda i ná utro ge lagañe, Betseda cheñe ñetrü a ge lañe kakye.

¹¹ He i danghulyeñe nūna na ufum fupuloatsü, sūnda í ná lüshüw yo tüvatsü, seyo ná i Tawgyew i Nogoyo shi-ñu trukye, sūnda djú dagyodügyeñoñdama, ná dagyo.

¹² Ñeto kapsealaibi a, se í shürhaw güyo ksü jikuñe che, “Upu na kadügyejodabe, kañe na ñetrü ge ná gyojo seyo tsajo bühohidame, hado chemeje ñi güdzüw ñetrü ge dume.”

¹³ I ná che, “Djo ná tsajo djübalabya.” Na cheñ, “Ñichi ge odje pom seyo tchükro ksü yo haje ñime; sé ñi jihuañe vyow nabo tsaw-tuw prülameje, se ye dujome.”

¹⁴ (Hado chemeje sa yo sa a muhu fo pom kuw du.) Sūnda i í shürhaw na che, “Ná pom gü, pom gü dañe gyodügyewe.”

¹⁵ Na süna dabadába, seyo vyow ná gyodügye.

¹⁶ Sese Tawgyew i ülgü odje pom seyo tchükrosa ksü í la, seyo ñedzüdru ge hotroñe na gagüzü djü, sūnda tchekuği, tchekuğiñe í shürhaw na djü nūna na hawe cheñe.

¹⁷ Sūnda: vyow na tsalyeñe tsaşelatsüdabi, seyo godza daw yo mo gü yo ksü guw trügula.

Patras i Jisu í Tawgyewñe vyew

¹⁸ Se i akasa güdzüw ge kagañe kügümkoise, seyo idra ye ichi shürhaw na idra dusa, sündawñe i ná dzü, “Nūna na nó ha cheiya?”

¹⁹ Na che, “Yohañ baptisma djuí ye, seyo kagua na mügaw Eliya, seyo kagua na chew ye ahugo ñihow truw mügaw nangko yo a üshükülye da.”

²⁰ I ná dzü, “Sešo djo nó ha cheiya?” Patras i che, “Tawgyew i üsaw Masi.”

²¹ Sündawñe Jisu ná züpsügeñe che, “He ana djúje djuchewe.”

Jisu i í nudzo dzüjo í ñihow tru

22 Sündä i che, “Nüna üsaw í duhu paketrajobamme, seyo dasüñejome seyo kew mügaw na seyo mügaw sawlyiw seyo shizew-ñuzew na í hosügaw vyeñe shijobamme, sünda i ñegi dzü ye üshükülyetchojome.”

Jisu ufum kasaw ye

23 I vyow ná che, “djuma no fum kasajo vedama, nudzoğ yo makasajoñe trawe seyo shüwa nudzo shokru i gilañe no fum kasajodawe.

24 Hado chemeje dju yo nudzoğ shüw ye fupojome vedama na shokru í moajome, sé djudamje nobo nudzoğ uluvyu takyoima se iyo í fupojome.

25 Nüna na vyow druguw-drulyiw í patsülameje, seyo nudzoğ uluvyu ye takyoame, semome ñiku-ñisüw pa, se yo ha palajowa?

26 Djudamje no yo seyo no ñu yo ñimtchüñjema; nüna üsaw ye je ichi seyo i awu ichi sünda güdraw sorgomuko ichi lüshüw pawñe, ije ñimtchüñjome.

27 No djo umso trungkoime, dju ayo ha a gudzudama, namko he a üchea na ana dame Tawgyew i ñetrü mahohumdoluye, na dzüw ye künama madanghujome.”

Musa ñe Iliya naksüdra Jisu

28 He ñu na chelye ñegi şügzü fum sa a Patras, Yohañ seyo Yakub na üdra küğüw pu a ge lañe jike.

29 I küğüngkolui ye, ukrumro utro a lya, seyo i gye ye grobülaşüksüñe lüna-lünakülye.

30 Sese, muhu ksü se ye Musa ñe Eliya naksü üdra ñu chitrungkoi.

31 Na ğulo güdrawdra hohu, sünda i dzüjo go ñu poği, se ye Yarusalem ge dajo.

32 Patras ñe üdraw na drumuğonatsüdabi, sünda na pakülyewñe, i ğulo güdraw; seyo se nüna ksü ye dju üdra gudzüsadama, hohu.

33 Na ichi yo kajoñe dawñe, Patras i Jisu í che, “He übrawwa, ñi ha a ğyow ye uwme: sünda: ñi lañe ulüğü dzü dajome, a ye babo, a ye Musa ibo, seyo a ye Eliya ibo.” I madanghu, i ha chengkoima.

34 I ana chengkobaiye, ná mumu yo boshiğigag, ná mumu yo bolyangkoi ye na ğeatsüg.

35 Sünda se mumu yo ana ñu a zekülye, “He ye nosaw seyo no i golawme, i chew dzüwe.”

36 He ñu i dzühungkoi ge, Jisu i akasa hohuda; sünda i mazüda ğyoda, sünda ha hohudama, se ñu í se ñeto ge djuje malakülye.

Muhusa í ğulo mauw yo lahua

37 Seyo se draha na pu gošû kagaahuñe, upu dyew a í jiñe tüya.

38 Sündawñe, upumko yo nûna a ye šogzuñe che, “He dadrüwa, no ba chengkoime, nosaw i nûlvow hoijodawe; hado chemeje i nosaw akasame.

39 Sûnda howe, ĝulo mauw a usso ge kamyo, sûnda i ülya akaye šogzukülyeg; seyo i se í ana ĝüşhülyiĝiada, se i üga ge üzetcho fegukülye; seyo í ana damgzüw yo ñiku-ñisüw da tra.

40 Seyo no bachi shürhaw ná che, í lahuawe; séšo na malahuafi.”

41 Jisu i che, “He maküĝü seyo bolu datchüw shürhaw nawa, no djodra küña kuw ĝyofisajowa, seyo djó daw na vejowa? I muhu i cheñ, basaw i age la jekuha.”

42 I jimkolai ye ĝulo mauw ye í lola padubug, sé Jisu i ñișgzüñ ĝulo í miĝiñe seyo muhusa í uw dagyoñe uyow ügzü ge djü.

43 Sündawñe vyow na Tawgyew i gow yo mavenghutsü. Sé vyow na í ha ha chiĝa dadama se na trongkoiye, sese i í shürhaw na che.

44 “He ñu ye djo djofu ge vejodawe, hado chemeje nûna üsaw í nûna nagzü yo kigo ladügyejome.”

45 Sé na he ñu i madzüsü; se i í madanghdügye; seyo na he ñu ífo go idra dzüjoje ĝetcho.

Vyow namko yo dyewfo djuwa?

46 Sûnda shürhaw naĝütchü ge ñu a kakülye, se i ye nangko a dju dyewfoma?

47 Sešo Jisu i nalu ge vedaw í danghula, sûnda muhumsasa a í lañe idra a gudzudügye,

48 Sûnda i che, “Dju damje noñiñi yo he muhusa i hutroima, se i nó hutrolawme; seyo dju nó hutroima, se na nó kidaw na je hutrolawbamme, hado chemeje djomko yo imisa yo imisafodama, se ye dyewfobamme.”

Dju maveñisama, na udrašome

49 Sündawñe Yohañ i che, “He übrawwa, ñí nûna a ye bañiñi lañe ĝulo mauw í lahuahuw hohudame, sûndada ñi í gohame, hado chemeje i ñidra ñisañe bafum makasa.”

50 Jisu i ná che, “Í djugohajo daw; hado chemeje dju djo mauw madama, na djodra dujome.”

Jerusalem ge jiw

51 Se í sorgo ge lalyimdrü ñeto kakusalaibi sese, sûndawñe i Yarusalem ge jijoñe vye.

52 Seyo i ivro ge mukow ki: i Samariya na ñetrü a ge ji, ibó ĝyojo dashütrüvojoñe.

53 Sé na i magyogadügye, hado chemeje i Yarusalem ge jingkoida.

⁵⁴ Se i hoñe í shürhaw Yakub ñe Yohañ naksü che, “He Tawgyewwa; ba ha tsüda, se i ñi dügye, se i ñedzü go mi gaañe ná damyaweñe ma?”

⁵⁵ Séso i tcholtruñañe na ze, [Seyo che “Ba madanghuwa ba ha uñulo yo ma. Hado chemeje nüna üsaw ye nüna nachi luvyu ye damütrajoñe madaw se í ñaksüijoñe kakuwme.”]

⁵⁶ Sündalye iñe i shürhaw na ñetrü utro ge jitrükralye.

Jisu ufum kasaw chemeje

⁵⁷ Se i ñabo jimkoi ge, se djuma a ye í che, “Ba hange hange jiyima, no bafum kasajome.”

⁵⁸ Jisu i í che, “Selü ichi uksu seyo ñedzü go musu nachi üdrü duwme, sé nüna üsaw ichi ükye vejo je ñe ñime.”

⁵⁹ I utro nüna a i che, “Nofum jisawe.” I che, “He Tawgyewwa, nó uvromashü kadügyevzüwe, no awu í ñuavzüjome.”

⁶⁰ I í che, “Dzüdaw na ná nudzoñ dzüw í büñudame, sé ba jiñe Tawgyew ichi ñetrü go shi-ñu trujodawe.”

⁶¹ Utro a ye je che, “He Tawgyewwa, no bafum kasajome; sé uvromashü nó kadügyevzüwe no nochi ñe go nüna na yo müññ kajoñe.”

⁶² Jisu i í che, “Djudamje nudzo ügzü i luksungkuñu ge kiñe fum ge homeje, i Tawgyew i ñetrü ge ñyofiwjome.”

10

Shürhaw mroñü ná kiw

¹ Seyo he ñu nafum sa a Tawgyew i nüna mroñü lapyo, sünda ha ha ñetrü ge i jiyoma, süge ksü, ksü dañe ivro kibrañitsü.

² Sünda i ná che, “Rhamu kiw aña dume; séso chiña daw mesame duba sündada vi übraw i küñuwe chejodawe, se i í nudzoñ vi í tcholajo vi nüna kiwe.”

³ Jiwe; howe no djó fugulu vyeduw dañe fumsu namko ge kijome.

⁴ Sündada dzulngasaje djulawe, kapüña je, seyo shita je; sünda ñabo ge je nüna ná dju je gaga djudawe.

⁵ “Dju ñe ge jihima, uvromashü chevzüwe, ‘He ñe ge ñüdzüw djuwe chewe.’ ”

⁶ Süge djuma ñüdzüw pafiwo dumeje, ba ñüdzüw djüdaw ye üdra dusajome, momeje bachi ge kakutchojome.

⁷ Se ñe ge ñyowe, sünda ichi go ha paima, se í tsa-tuwe, hado chemeje chiña daw nüna na ná shishü patsüw; ñetro-ñetro djukahijodawe.

⁸ Seyo ha ñetrü ge jiyima, sügow nüna na hutrovowñe, se bavro a ha vedama se i tsajodabuwe.

⁹ “Sügow sonaw ná dagyojodawe: sünda ná chewe, ‘Tawgyew i ñetrü ye batrü iñiñisa ge kakudamme.’ ”

10 Sé ba ha ñetrü ge jimyoima, seyo sügo nüna na bá mahutrovolaime, ná bodzağ ge jeñe ana chewe,

11 “ ‘Djo ñetrü yo ñelümo naje, ñishi ge güdrüsadow na, ñi djovro a pafiamkoimme, sedamje he í danghujodawe, Tawgyew i ñetrü djotrü iñiñsa ge kakulaimme.’

12 No djo trungkoime, se niyay ñeto se ñetrü ye Sadom ñetrü i je mofokaw gijo lyajome.”

Üdrü-ulu mavyegudow ná tui

13 “Tui Kurajiña! Tui Betseda! Dju dyew chiğa dafiw ye djo ge dadama, sese í Sor ñetrüñe sidon ñetrü ge dameje, na ke ge gye güpañe seyo kütsesüpu ge ğyoñe na kye ge dru-lu vyegudoñjemma.

14 Sešo, melye gzuñe cheğiyi sehu bafo vyego yo yeje Sor ñe Sidon naksü vyego ye vyeksufofijome.

15 Seyo Kafarnahum ñetrü, hawa ba soğgo kuw lüvzüw dalyijoma? Ba bó noğu üla ge kuw üla kaajome.”

16 “Dju ba chew dzüima, se i no chew dzüjo, sünda ba dju mauw daima, noje i mauw dajome; seyo dju no mauw daima, se ye no kiadow i je mauw dajome.”

Shürhaw mroğü na kakuw

17 Se shürhaw mroğü yo ksü na lüshüw yo kakutchoñe che, “He Tawgyewwa, ba üñiñi yo se ğuló mauw na je ñichi pudupuña ulunge pumódame.”

18 I ná che, “No mütü í ñedzü lüğaw veduw ñedzü go gaahu hohuime.”

19 No djó byu na seyo mütü güdzü na dügrüdzagofijo djüwme, seyo vyeñiw nachi go vyew mau dafiwjo ná madafijo pudupuña djüwme; seyo ha gañ yo je djo naw madafijomme.

20 Sé sünašo cheñe djulüshüwe, se ğulo mauw na djo pudupuña yo pumoda cheñe, sešo djo lüshüjo dawwe se djo ñiñi Ñedzü ge ği vyedotro yo.

Üsaw udru yo uyow í duw

21 Sa yo sa a i ğulo güdraw yo dañe lüshüdzoalye, seyo che “He Awa, Ñedzü ñe No i Tawgyewwa, no ba ulu yo uw cheime, se ba he ñu na danghu-kinghuw nüna seyo vyesü-vyelüw na yo müşüñe veda, sünda angasa natrü ge duda. Am, he Tawgyewa, hado chemeje bá he í uw veda.

22 No awu i nó vyow nodru ge traadamme; seyo djuje madanghu se saw ye djujema, awu aka danghuba seyo awu djujema se je dju madanghu, se i ye sawchi gemdo aka seyo se djudru ge saw i dujoñe vyedama.”

23 Seyo í shürhaw nachi ge tchoñe akasa ge che, “Şüvzüwme se iñi ye, se he ñu ná se ba hoiwa hoiye,

24 Hado chemeje no djo chemkoime, šüpo ñihow truw na seyo ñubyu na tsüdaw ye, se ba ha ñu ye hoima howe; sé maho seyo ha ñu ye ba dzüima dzüwe, sé madzühu.”

Samri nüna uw a i zeĝaw

25 Sündawñe nüna a gudzulyi; sünda ana cheñe í küna daima hopüñew che, “He shotuko-kunu go dadrüwa, shüwa shüw shüjo ibo ha dameje ujowa?”

26 I í che, “Shotuko-kunu ge ha ĝida? Ba künda ngüña?”

27 I trutcho, “Ba Tabraw bá nudzoĝ Tawgyewchi go vyew nudzoĝ drü-lu seyo nudzoĝ kräše seyo nudzoĝ budzu vyew se nadra nülwov vyejodawe; seyo nudzoĝ ĝafopsüĝi-ĝampsüĝi go ná nülvojo dawe.”

28 I í che, “Ba umso chedaba, he ana dabya sündame üshü ĝyojome.”

29 Sé i í nudzo í usu dajoñe veñe Jisu í dzü, “Nameje nochi ĝafopsüĝi-ĝampsüĝi na djuwa?”

30 Jisu i che, “Nüna a ye Yarusalem yo Jeriko ge jimkoi ye ñigudu tsaĝaw na djeshiĝiaña i gye í na shalügülag, sünda gü-shü dañe atrü dzüw datralye katrükralye.

31 Sünda ana da, se ĝabo ge mügaw a kamkoi, séšo í holye ĝeaglyeñe djetrükralye.

32 Ana vedumbo Lewi a ye je sešü katcho, ije í holyeñe ĝeaglye djetrükralyetcho.

33 Séšo djudamje Samari ñetrü a go sa a kakukülye, sünda í hohulyeñe nülvo vyela.

34 Sünda itrüĝañ ge jikuñe seyo ichi üshi ge luvuhu seyo tsühu prüñe gyeche-gyelye yo pyogo, seyo í güĝedru ge gy-odügyelyeñe ñe ĝyow ge lajiky e sünda í uwyo hoivo.

35 Se draha í lumu yo bosüñ ksü lahuañe se ñebraw i djüñe che, ‘I uwyo hoivojodawe, seyo bachi go küña kapyoima, se ye no kakuwñe doajome.’ ”

36 Hesahelu he ba vyew ge se na ñigudu-tsaĝaw süna ge lyalahado, nadzüngko a dju ichi ĝafopsüĝi ĝampsüĝi go na ñe veiya,?

37 I che, “Se i dju í nülvodama.” Jisu i í che, “Kai, baje kañe süná dajodawe.”

Marta ñe Mariyam

38 Sündatcholye Jisuñe i shürhaw na jimkoitchoi ye, se i ñetrü a ge ji, seyo Marta cheñe mim a ye í iñe ge balada.

39 Seyo Mariam cheñe uñum a duw, i Tawgyew ishitrü ge ĝyoñe i shi-ñu dzüw.

40 Sé Marta chiĝa da dañe mavenghua sünda itrü iñisa ge jikuñe che, “He Tawgyewwa, ba haje mavema, noñum í no

akasa chiğa dawene traadaw ye? Sündada í chetcho, nó datunowe.”

⁴¹ Tawgyew i í trutcho, “Marta O Marta; ba şüpyo ñu ha vejema venglyene seyo mavenghu lyaha.”

⁴² “Sêso ñu a ye umsone, seyo se chiğa uw í Mariam i golame; se i ichi go malağafijomme.”

11

Tawgyew Kügüw í dadrűw

¹ Sündatcholye ahua ye i nolu a ye kügüngkoi. Seyo i se kügüfiahuwne, ichi şürhaw namko yo a ye í che, “He Tawgyewwa, Yohań i í şürhaw ná küna veduw kügüdrüdama baje ñi süna veduw kügüdrűwe.”

² I í che, “kye damje djo kügümkoime, sese chejodawe: ‘He Awa, Bańiń güdraw vejome, ba ğadzű kakűlyawe.’ ”

³ “ ‘Ñichi muhu muhu yo tsajo-tujo í ñi djűijodawe.’ ”

⁴ ‘Seyo ñi lalo na muchoaijo dawe, Hado chemeje ñi je, ñi mauw dado na muchoaijome, Sűnda ñi mauw uw dajo yo ğaksűiwe.’ ”

Prűnggudruwe

⁵ Sűnda Jisu i ná che, “Djumko ye üdraw a duw ye djuwa, sűnda i ñegimko ge pakűlyene ichi ge ji í chewe, ‘He drawwa; nó odje ũka dzű djűwe.

⁶ Hado chemeje, kasew-bişew go draw a ye nochi ge jikuda, sűnda ivro ge vejio nochi ge haje ñime.’ ”

⁷ Sűnda i ulung goşű ñu tru, se nó afafsűw djudjűwe; yabó ñegüdrűşű je dugoadammje, sűnda nosa ye nodra buĝo ge ğűsadame, sűndada no bá pakűlyene haje madjűfijomme.

⁸ No ba trungkoime, se üdraw duń sese je í pakűlyene haje madjűfisabamme, sedamje i ñimtchűń ye tralye prűdo ye í kűña tsűdama sűña pakűlyene djűjoşo.

⁹ Sűnda no djó cheime; prűmeje, djo djűjome; tchűmeje djo pajome; dűmeje, djobo voaijome.

¹⁰ Hado chemeje dju prűima, ná pajome; sűnda dju tchűima, na pajome; seyo dju dűima, nabo voaijome.

¹¹ Djomko ye dju ana awu duwa, se ũsaw ye odje prűme, se í kunnu djű, seyo sűndalye tchű prűmeje, se tchű madjűw byu djű?

¹² Semome jeje prűlaime, se í mütű güdzű djű?

¹³ Sűnda, ba mauylene je basa ná ğań uw djűjo danghumeje, se djo ñedzű go Awu, i ichi nudzoĝ nűna prűi ná hado ğulo güdraw madjűjowa.

Jisu ñe mütű na go dyewfo

14 Sündatcholye Jisu i ügadow ġulo mauw a í lahuatcho; se ġulo mauw ye kahuahuñe, ügadodo ye ütrü zekülye; sünda nüna na mavenghuatsü.

15 Séšo namko ye küña na cheda, “I bó ġuló mauw nachi go dyewfow mütü ichi datunow yo lahuabaiwa.”

16 Utro na í dafidama hojoñe í ñedzü udru ge hadamge sheweñe cheshew shewe che.

17 Séšo Jisu i, nadrü-nalü ge vedaw i danghulyeñe, na che, “Ha ha ñetrüġüfo ge braġidama, se ñetrüġüfo ye mütrüajome; sünda ha ñe ye braġidama, se ñe ye je mümyajome.

18 Seyo sünda mütü ye í nudzo íbo magotchow dame, se ichi ñetrüġüfo kúndañe dujowa? Hado chemeje djo nofo go ana chešoibi, se mütü i datunow yo se mauw ná lahuabaibi cheñe.

19 Senameje no mütü i datunow yo ġuló mauw ná lahuabaimeje, se djó agü na dju tunow yo kakülyebaiya? Sündada ná djo niyay djüw nüna chejome.

20 Séšo no Tawgyew udruyo yo uġulo mauw na lahuameje, Tawgyew i ñetrüġüfo ye djotrü ge kakujome.

21 Nüna gow na nachi ñe i ġaksüw chiaġi pyogoñe ñe í hokrüimeje, se ichi gañ-miġi na ġüdzüw dujo.

22 Sešo ije gofotchow na djuma a í tumuvojoñe í dafoahuñe, í se chiaġi na ha ye i veksüdama, sena laġalag seyo ichi gañ-miġi na laġañe habraġiame.

23 Dju nodra ñima se i no mavyewme, seyo dju nodra dukyeġiyima se i trabraġiajome.”

Ġuló ñišgüzüñ ye ñe tchüw

24 “Nüna usso go ñišgüzüñ ġulo kahuahuñe nokro ge ġyogojo tchüġijome, sünda mapawñe i chejome, no ha ñe yo kahua dama se ñe ge kamyotchojome.

25 Sünda kakuwñe i ġümsa-ġümġañe howsa hohujome.

26 Sündawñe i idra ye í je mofokow uġulo mauw mro ye idra ye lakujome, sünda na ilunge kamyoñe sayo sa ġyojome, sünda se nüna ye uvro gow ije mokofow mauw lyajome.”

27 Sese i he ñu i trungkoi ye upumko go mim a ye gow yo che, “Ŝüvzüwme se uluhu ye hayo sa a ba ġyodama seyo se apu ye ha ye ba mütsüdama.”

28 I che, “Am; séšo Ŝüvzüwme i, dju Tawgyew i ñu dzüñe i chew dzüima.”

Ñedzü go ñu prüw

29 Se Ŝüpyo upu kyeġipyo dawñe, i che, “He ñishü yo nüna na maume; na chishew tchünggudru; se ná Yona i chishew í tralye seyo haje chi mashejome.

30 Yona í küna veduw Ninwe ñetrü go chishew vewma, sünambo nüna üsa ye he ñishü yo nüna na chishew vedujome.

³¹ Müdzavye go nugom niyay djüw se ñetomüdrü ayo nūna nadra gudzuñe, í datrűwñe chejome, hado chemeje i Suleman i ñu dzűjoñe druguw-drulyiw udza go jikuda, sűnda holabya he ayo he a Suleman ije dyewfo a du.

³² Ninwe go nūna na Niyay djűw ñetomdrű ye hesalu yo nūna nadra gudzuñe, naso ge truchoaijome; hado chemeje na Yona i ñu tru í dzűñe nadra-nalu muchoagye sűnda howe, age Yona ije dyewfo a dume.”

Ussó go mütrű

³³ “Dju nūna je bela ge mütrű tchűhoñe ġumşű ge seyo ñeshű ge mavewme, seşo mütrű ubo ge dzugo vewme hado chemeje nūna jikui na hohujoñe.

³⁴ Baso go mütrű ye bañi ye me, sűndada bañi ġűdrameje, se basso naje vyow müsajome; seşo se ye maumeje, basso ge je nukuġujome.

³⁵ Sűndada ufu je ksű-űñi je ksű dañe ġyowe, se müsaw ye baso duweye nukuġuañeme.

³⁶ Sűndada baso ye vyow müsazeġiame, seyo se ichi hangeje manukrumeje, se sűndame se vyow na müsajome, sűna vye-duw ñeto ge dadawa, se mütrű ye ichi lűnaw yo djó müsaw djűiwa.”

Mim na seyo Farisi na gohaw

³⁷ Jisu i ñu trungkoi ye, djudamje Farisi a ye i che, se nochi ge jiñe ava tsawe; sűnda í ñelu ge djemyoñe ava tsajoñe ġyoag.

³⁸ Farisi na basha go na ava matsalu ũshi-upo machew í holyeñe mavyenghua.

³⁹ Tawgyew i í che, “O Farisi, ba bekasa seyo bela na udru udru go ġűdrawşo, seşo balung ge vyesbiw seyo mauw vyesumokradama.

⁴⁰ Budzu ñiw nawa, dju ñepsű go vye ye dadama, hawa se i ulung go i madaima?

⁴¹ Am seşo, ulung go gañ-miġi duw na chi djűajo dawew, sűndameje bábo vyow ġűdraw lyajome.”

⁴² “Se Farisi nawa, djo tui me! Ba pudina ñe sudab yo, seyo vyow ñomñow sheġe baġűdo yo ũlye ġű tronguaña djűsoma, seşo Niay i seyo Tawgyew i nűlvo í mahutroiwa; tsűwbo tsűda hena je dañgudru seyo sena je tratcho.

⁴³ Farisia nawa, djo druge tui me! Djo ñegru ge nugo buġo uw vye seyo badzaġ ge ye djó gaga tsűw.”

⁴⁴ “Djo tui me! Hado chemeje djo se pelyado nuġu vedudame, sűġe nūna na udru ge dűġrűñe kahi, se madanghuw nuġu du cheñe.”

⁴⁵ Sűndawñe műkyew a ye í che, “Dadrűwa, he ana cheñe ba ñi tchűġoime.”

⁴⁶ Jisu che, “Oi shotuko-kunu dakyew nawa, djoje tui me! Djo ana lojemalofi w gañ me, nūna nadrü ge joşoi seşo yabó djo djogzűtsű a je madadű.”

⁴⁷ Djo je tui! Djo se ñihow truw na nuġu chiw, dju djo aki-awu na shilyedama.

⁴⁸ Sűnda: djo truksűw nūna me, seyo djo aki-awu na dalyedaw yo uw vye; hado chemeje na bó ná shidabi sűnda djo ná nuġu í daw.

⁴⁹ Sűndada Tawgyew i patsű-sholu je chedame, se no nachi ge ñihow truw seyo shűrhaw kiajome, seyo na naġiyo kűña na shijojema seyo kűña na daşe-damejojema.

⁵⁰ Se i ye kűña ñihow truw duma naşű í he druguw-drulyiw í dakűlyejobo a fualyedame, vyew na ġilyedo ye he ñefo ayo nūna nachi yo lajodawe.

⁵¹ Habil í ũşű yo dalalye Jakaria í shiw kuw se psűġańe műgańe naksűmko ye shiw: no djo umso truime; ichi ġido ye he ñefo syo shűdo nūna nachi go lajome.

⁵² Shotuko-kunu dakyew djo tui me! Se djo je patsű-sholu veġiw bo ladaşome, seşo djo djoluvyo makakume, seyo kakujońe dado na dugo vye.

⁵³ Sűndalye i sa yo kahuahuńe, sese shizew-ńuzew nańe seyo Farisi şűpyo ifum kase seyo i dagtso-damrhűńe, ha ha ñu bűtruluweńe da, se i şűpyo ñu ufo bűtruluweńe

⁵⁴ sűnda na i ha ñu chehualaima ġyokrű ġyo, se umdzu yo ha damje ñu zetruahuw ye kigolajońe.

12

Ġivow seyo Farisi na dambo djulyawe

¹ Ańa a sese hadzaġ-hadzaġ dzaw nūna fuguńe, ańa ana kuw naġűtchű tcheġi-lűgyeġi da, se i uvromashű í shűrhaw ná che, “Farisi nago loġańoġe yo ũġa ġyojodawe.

² Vyojo haje dűmyońe maveme, madanghujo haje műşűńe maveme.

³ Sűndada ba ha damje nukuġuw ge chedo ye, se i műsaw ge dzűhujome; seyo ñeġűń ulung ge ufu ge ha aşesa yo chedama, se ye ñelűtsű udru go yo trujome.”

Iyo ġewe

⁴ “Seşo no djo trungkoime, nodraw nawa, dju usso i shifi-dama se na seyo ha madamńefijomme, ná djuġejo dawe.

⁵ No djo trumchemjome djo djű ġejoma, dzűwńe djű chigűje ge lańe djoafima, se í ġejo dawe; no djo trupangkoitchoimme, se í ġejodabuwe.

⁶ Hawa ajolya ksű yo sülyisa pom madrűafima? Sedamje Tawgyew i namko ye a ye je makoşoa.

⁷ Bakye go vyow ükyetrü duw naje ngümdzo vedame, sündada: djuêjejo dawé, ba sülyisa na dafowme.

Jisu í matsüñe chewye hama

⁸ “No djo chengkoime djudamje no nûna navro ge nó noşobiñe danghumeje na je nûna üsaw ye je Tawgyew i sorgo-muko uvro ge êşobijome.

⁹ Séşo dju nûna navro ge no hopseğiahima ije Tawgyew í sorgomuko uvro ye hopseğiajome.”

¹⁰ “Dju nûna üsaw ütûma mauw truima, i datrudaw í muchoaijome. Séşo dju ġulo ġüdraw ütûma mauw trüima, í datruw í mamuchoijomme.”

¹¹ “Nûna na ba mügaw-ñegru seyo mükyew seyo damikyew navro lakuwñe, ba navro ge ha chemeje ujojema seyo kûna chejojema se na djuvengüajodawe.

¹² Hado chemeje ġulo ġüdraw ba sayo sa a ha chejome zedrûjome.”

Nûna nugo a ye veduw

¹³ Seyo upu go nûna a ye í che, “He dadrüwa, noñuw í awu í bo-luko ná noje hawe chejodawe.”

¹⁴ I í che, “Nûna nawa, nó dju niyay djüw seyo bağüğiw nûna boña?”

¹⁵ Sünda i í che, “Uw yo ho ġyojodawe, seyo tsağa-lağaw süna yo basü ġyojodawe; hado chemeje nûna na şhüw ye dju bo-luko duw yo mashüwme.”

¹⁶ I í zegaw a tru, “Tümbum nugo a í no ge rhamu şüpo kakülye.

¹⁷ Sündawñe i ulvyu ge no hadajojemmañe ve, hado chemeje nochí ge bo no dakülyedaw rhamu na vejo buğó je ñi.

¹⁸ Sünda i che, ‘no ana dajobabi: no nó ñetchü í tashalyeñe dyew dalajo; sünda no rhamu seyo bo-luko na vyow süge vejo;

¹⁹ sünda no ġulo i chejo, ġuloa, bachi ge oje şüpo üğalaw kuw bo-luko vewme; ġyogowe, tsawe, tuwe seyo lüshüw yo ġyowe.’

²⁰ Seşo Tawgyew i í che, ‘Chi madnaghaw nûna! He ñegimdo ñegi a ba lutuw ye lutukyoadügyejomme; sündawñe ba kûña dashütrüñe vedama, se ye djuchi lyajowa?’

²¹ Ana je nûna duwme dju nudzo ubo bo-luko dashütrüñe ve, sé i Tawgyew iñigzü ge nugo mo.”

Ha ñu yo je duhu djudajo dawé

²² Sünda i í şührhaw ná che, “Sündada no djo trungkoime, nudzo şhüjo-dujo ubo djuvewe, no ha tsajojemañe; seyo nudzo usso ubo je ha gye-ğuvo shejojemañe.

²³ Hado chemeje tsaw-tuw í şhüw ye, seyo gye-ğuvo í dyewfo usso yeme.

24 Pülġam na hojodawew; na zuje mazuw seyo ñetchü ge rhamu je mapaw; sedamje Tawgyew i ná tsakyewŝo. Bá musu na fow go aňe dufowme.

25 Djomko ye dju duwa, dju vengaw yo nudzo i shüngkoi ge ganta a ña damje shafijo ye?

26 Sündada ba imisa fo chiġa íje madafimeje, hado utro ñu ná laňe vemyoňña?

27 Bye go shoba ná hojo dawew, na kúndaňe shülyima; na chiġa je madaw chitra je madaw; sedamje no djo chengkoime, Suleman je í küña übadzü gidama, namko ye ana veduw gaň a je magime.

28 Sündada Tawgyew i no go suso-mütchü namaje yow gye sheida sünda draha ná boti shüw ge joaňe, anambo gye-ġuvo sheňe veihume; Tawgyew ge mesame veksüw nawa, djo kúnadaňe aňe masheijowa?

29 Sünda djo ha tsajojema ha tujojema süna ve djuġyowe, sünda meaje mavemyow djudajodawew.

30 Hado chemeje he druguw-drulyiw ayo go vyow tuġu-tumo na he ana veduw bostu na tchüנגgudruwme sünda ba Awu danghudame djo he bostu na šüpo tsüda cheňe.

31 Séšo ichi ġadzü i tchüjodawew, sündameje, he bostu naje pajome.

Bo-luko ná hange dashütrüňe vejowa?

32 “Nüna imisa nawa, djuġejodawew; hado chemeje ba awu i bá ġadzü paweňe vedame.

33 Nudzo ichi fuň-voň na draalyeňe tunoajodawew; sündalye nudzo ubo ana dalajodawew, ha ye üme malyajoma, sünda soġgo ge ana bo-luko dashütrülajo dawew ha ye makaajoma, djutrü iňisa ge tsaksutchüw naje majikujo seyo bulu naje mauw madajo.

34 Hado chemeje hange bachi bo-luko duma, badrü-balu he süge dujome.

Dashütrüjo ġyovojo dawew

35 “Djotsü na pyogo vejo dawew, seyo dju mütrü na dzodügyejo dawew.

36 Sünda djo se kulo na veduw dajo dawew, dju nudzo dadrü í gzü jiw go ke kakujojemaňe ġyokrü ġyow veduw; i kakuňe ñegüdrüşü düwňe mekutcho djeňe voa.

37 Gaġüzewew se kulo í, djú dadrüw ye kakuňe madrumuvow hohudama; no djo umso trungkoime, i ütsü ge pyogolaňe ava tsajoňe ġyojo, sünda üňisa jiňe í hoijo.

38 I ñegi ge ülye ksü seyo ülye dzü ñepüñew ge je pakülyew hohumeje, se kulo ye gaġüzebamme.

39 Djo he i danghujo vejo dawé, ñe übraw ye tsaksutchüw na tsaksuw ke jikujoma se í danghubammeje, i pakülye ġyobjamme, sünda nudzo ñe ge majimyogyejome.

40 Baje dashütrü ġyobjadawé; hado chemeje ha homoi ye jikujoñe mavew se homoi ge nüna üsaw jikujome.”

Veksüfiw kulo djuwa?

41 Sündawñe Patras i che, “He Tawgyewwa, ba he zeġaw ye ñi aka bama mow vyow naje truwma.”

42 Tawgyew i che, “He veksüw seyo patsü-sholu hokrüw ye djuwa, djuchi dadrüw ye ná tsaw-tuw homai ge djüweñe kulo-kutro boñe ve.

43 Se kulo ye gaġüzeme, djú í dadrüw ye ana dangkoiye hohudama.

44 No djo umso cheime; I í nudzo ichi vyow bo-luko ge zeġiw veyobjamme.

45 Séso se kulo ye ulu ge ana vemeje, no dadrüw ye üġalaw ge kakujobañe veñe, sünda kulo seyo kulom na ġüñe seyo tsañe tuñe tukrañe ġyomeje.

46 Se kulo i dadrüw ye ana ñeto a ye, i madanghuw ñeto a ye, i í maġyokrüngkoi ye, seyo i madanghuw homai ye, kakujo sündañe í sojai djüñe í usu maw ge ngüañe vejo.

47 Seyo se kulo dju nudzo dadrüw í véw í danghuñe, seyo madashütrüvoñe seyo í vew kuw ge makasabammeje, šüpo tsalajobjamme.

48 Séso dju madanghuñe ġüw tsalajo chiġa dadama se ye me tsalajobjame, sündada dju añe djüdama, í añe prüjome; seyo dju šüpo boñe vedame, ichigo añe lajome.

Ġüdzüw dušome

49 “No druguw-drulyiw ge mi dahow kakülyahume; sünda ha tsüdawa chemeje hesalu mi dzomzoaweñe!

50 No baptisma lajome; sünda no malamdolu kuw no küna mauw ñiku-ñisüw ge ġyobjema!

51 Ba vedaw ye no he druguw-drulyiw ge ġüdzüw kaku-dañe vedama? No ba chengkoime; mome, no dabraġiahuw kakülyahume.

52 Hado chemeje hesalu yo ñe ge nüna pom naġüтчü ge magaġijome, dzü ye ksü üdra seyo ksü ye dzü üdra.

53 Awu ye saw üdra, seyo saw ye awu üdra maveġijome; añ ye sam üdra seyo sam ye añ üdra, apye ye safu üdra, seyo safu apye üdra maveġijome.”

Ümdrü í hosüw

54 Sünda i upu naje che, “Mumu íje druguw go kalyiw hohumeje, djeañe ñedzü šüjo chew; sünda süna dabaibi.

⁵⁵ Sūnda mūdza gow ñedzū lyiw hohuñe cheibi, ñedzū shūw lyijome, sūnda sūna dabyo-daḡyotcho.

⁵⁶ Loḡa-loḡe nūna nawa, djo ñedzūñe no naksū í utroñe danghudameje, hado he shūw-duw ubo kūndañe madanghufia?”

Nudzo ñu duw ná chebruawe

⁵⁷ “Ba hesalu ba nudzo yo hado ñu mavelafia?”

⁵⁸ Ba bá fodaw nūna ūdra mukow ichi ge jingko ye, ḡabo ge ñu chegūdrajo dawē, momeje ba í mukow ichi ge šūñe lajikyeñeme, sūnda mukow i bá shipashi nagzū ge djūñe seyo shipashi na bá pache ge shūñeme.

⁵⁹ No djo trungkoime, ba ajolya ajolya dañe magimdzoalu kuw, ba makahuafijome.”

13

Vegudolawe mome mütrajobamme

¹ Nūna ūchea sayo sa a djeku, seyo Jisu í Galiliyo nabo go ñu dzūngkoi, djušū í Pilatus i í kūḡūw ge djūasadamma.

² He í dzūhuñe Jisu i na che, “Djo ana veima, he Galili na utro Galili ná lalofoñe, hado chemeje nadru ge ana veduw ñiku-ñisūw djūda che?”

³ No djo trungkoime, mowme; séšo djo djüdrü djolu mavetülumeje djo vyow he ñom yo mütratsüjobamme.

⁴ Mow djo ana vedama, Shilom ge nūna ḡütrü šügzü djüdrü ge post gaañe trüalyañe dzüdama: na vyow Yarusalem ge kūña tuḡu-tumo shütsüdama ná lalofoma?

⁵ No djo trungkoime, mowme; séšo djo djüdrü djolu mavetülumeje djo vyow he ñom yo mütratsüjobamme.”

Lufuje üyañ üje majew

⁶ Sūnda i he zeḡaw ije tru, “Djuchidamje anggur vi ge lufuje üyañ a zuñe veda: i sayo sa a sheje thcüw jikuda, sé í mapa.

⁷ Sūnda i vi ḡyokrüw nūna i che, ‘Howe oje dzü gomdo no he lufuje üyañ go sheje tchüw jikunggudru, sé keje mapa, he í chepyojo dawē, i hado no í ḡyokrügejowa?’

⁸ Í í ana che, dadrüwa, í oje a kuw ḡyokrülüwe; no ūdza ūdza ge no chiguḡuañe nobi sujome.

⁹ Sūndañe, drawha ge sheje jelaimeje uw; se molaimeje chepyojo dašobe.”

Mim utsubo kuw í dagyow

¹⁰ Ḡyogow ñeto sehu Jisu kūḡūw ñegru a ye truñe ḡyoda.

¹¹ Süge mim a du, dju oje ḡütrü šügzügomdo ksuw kaw mütü a kamyoda, sūnda i utsubo kuw lyada, sūnda i keje gudow magudzufiwbi.

¹² Jisu i hohuñe balayeñe, che, “O mimya, ba bá hamalyiw yo kahuajemme.”

13 Sündä i ügzü í udru ge ve, sündä i djeañe gudow lyajebi, sündä Tawgyew í trokülyejebi.

14 Hado chemeje Jisu í gýogow ñeto sehu dagyoda, mügaw na seyo nugobraw na nuna na che, “Ñegi gë duw me, sa yo sa chiğa dajo dawë, seyo se ñeto ye jikuñe dagyojo dabuwe; séšo Sabat ñeto ge djudawe.”

15 He í dzühulye Tawgyew i che, “Loğa-loğë nuna nawa, gýogow ñeto sehu djo djó nudzo fulhu seyo giğá na ñe tashalyeñe hu tuw lañe majikewma?

16 Seyo ha ye madafijo cheña, he mim Abraham üsam djuso ge oje gütürü şügzügomdo mütü ye pyogodama, se í gýogow ñeto ye vogodaw i kihuaño?”

17 Ná he ñu na chewñe, í ubo mauw dai na ñimtchüñ lyatsü, seyo vyow upu na se uw chiğa dadaw ubo lüshütsü.

Pemdu üsü seyo pa í shipyew

18 Sündä Jisu í chetcho, “Tawgyew í gädzü dju veduda? Seyo no í ha shipyew üdra djüsejowa?

19 I pemdu üsü a veduwbame, djú nuna na lañe ná vi ge trawma; sündä i shülyiñe shoñ lya; sündä ñedzü go musu na ufotsa ge guñe gýow.”

20 I sündä chetcho, “No Tawgyew í gädzü í dju vedu dañe vejowa?

21 I pa vedudame, djú mim a ye lañe oje ulumo tola dzü ge gülüşügia, sündä ñu-ñuñe oje ulumo ye pa lya.”

Ñegüdrüşü imisa

22 I ñetrü-ñetrü jiñe dadrüşü Yarusalem ge ji.

23 Sündä djudamje a í che, “He Tawgyewa, nuna mesame basüafijobama?” I í che,

24 “Ñegüdrüşü imisa yo jimyojodawe, hado chemeje no djo trungkoime, şüpo nuna na jimyojoñe dajome, se majimyofijome.

25 Ñe ubrow gudzulyiñe ñegüdrüşü dugoahuñe, seyo ba ñepsü ge gudzuñe ñegüdrüşü düñe che, ‘He Tawgyewwa, nobo vojodawe,’ sündä i sügow no ba madanghume, ha hanggowa?

26 Sündawñe ba chejo, ‘No ba how ge tsa-tuw sündä ba ñi bodzağ ge dadrüda.’

27 Séšo i chejo, no djo chengkoime, ‘No madanghume djo hanggoma. Mütü chiğa daw nuna nawa, djo vyow no yo üğa gýojodawe.’

28 Süge ksew seyo utu trashügrüjome, ba Abraham, Isahak seyo Yakub seyo vyow ñihow truw ná Tawgyew ge gädzü ge gýodaw hohuñe nudzo í ñepsü kahuahuw hohujome.

29 Sündä druguw seyo drulyiw; tchüsa seyo müdza go nuna na jikuñe Tawgyew i ñetrüğüfo ge dusejome.

³⁰ He i danghulajo dawé, küña ná fum ge duma, na uvro ge dujome, seyo küña na uvro ge duma, na fum ge dujome.”

Herod i vyeñi na

³¹ Sa yo sa küña Farisi na jikuñe í chejea, “Ayogo kahuañe kajo dawé; hado chemeje Herodes í ba shijoñe vedame.”

³² I ná che, “Kañe se šelü í trujodawé, howe, no yow je seyo draha je uġulo na lahuañe seyo usso naw na dagyojolume, sünda ñegi dzü ye no chiġa damdzoajome.

³³ Sedamje no yow, draha seyo pülha kuw jijome, hado chemeje dju ñihow truw na Yarusalem í ñepsü ge madzüfijome.

Yarusalem ubo duhu

³⁴ “He Yarusalem! He Yarusalem! Ba se ñihow truw ná shiye, seyo bachi ge dju kiima ná kunu yo trümoahiye; no ana veduw küña tsüda, joñi i üsa ná utupro ulung ge küna tchelaime, sünambo noje basa ná lakyeġiajoñe daw, sé ba he í matsü.

³⁵ Howe, bañe babo kabra-kasaġijjome, sünda no djo chengkoime; ba ‘Ná üdrü-ulu yo uw cheime, se nüna ye gaġüzü dume dju Tawgyew iñiñi yo lañe kakuima,’ machemdolu ba nó keje mahohujome.”

14

Ġyogow ñeto ge dagyow

¹ Sünda í ġyogow ñeto sehu djudamje Farisi nágo nugo a i ñe ge odje tsaw ji: sünda ná í usu yo hopasa.

² Süge í veduw muhu a du, dju usso dalfuñe nada.

³ Jisu í Farisi seyo shotuko-kunu damivro ná che, “ġyogow ñeto ge dagyomeje ujo ma mow ma?”

⁴ Sé na madañda ġyo. Sündawñe Jisu í í ügzü kiñe dagyo, sünda kadügye. Sünda i í ügzü kidüñe dagyo, sünda kadügye.

⁵ Sünda i ná che, “Djongko ye dju duwa, djusa seyo fulhu ye kalü ulung ge gamyoya sünda ġyogow ñeto ye kutcho malahuaajo.”

⁶ Sé ná he ñu ge haje machefibi.

Tumowna ná hovow

⁷ I hobanda, tumona baladaw na uw uw buġo tsatchüñe lai sünda í se ná hoñe zeġaw ze,

⁸ “Djuma djo ġü ge balai ye, buġo dyew tsatchüñe djuġyodawé, asha baje dyewfo tumona baw je dufijome.

⁹ Sünda dju ije seyo baje badama, bá jikuñe ana chemeje, ‘í buġo djüjo dawé,’ sündawñe ba ñimtchüñ lyañe ülafo buġo ge ġyow dujobamme.

¹⁰ Sé bá bawñe, ülafo buğo ge jiñe gyojo dawe, bá badaw nuna ye jikuwñe, bá ana che ‘Drawa, uvro ge kalyiñe gyoa,’ sündawñe badra a gýosadaw navro ge udru kalyijome.

¹¹ Hado chemeje dju nudzo yo dyew dalaima, se ye imisa lyajome; seyo dju nudzó í imisa dalaima, se ye dyew lyajome.”

Dakülyew

¹² Sündawñe Jisu í í baladaw naje che, “Djo ñeto ge damje ñegi ge damje ava tsaw ge, nudzo draw, ayo-ñuw, ñeşü seyo nugo na djubajodawe, ana dañeme, naje djo balañe dağuiñeme.

¹³ Sé ba ava tsakelai ge sapse, hamalyiw, üshilyew seyo iñiğew ná bajo dawe.

¹⁴ Sündawñe ba gağüzebamme, hado chemeje nachi ge djó djüjo haje ñiwme, séşo djó ná güdraw yo üshükülyejo go kügüijome.”

Tsaw-tuw dyew go shipyew

¹⁵ Üdra ava tsasangkoí go nuna a ye he ñu ná dzühulyeñe che, “Gağüze nadra dujome, dju Tawgyew í gädzü ge odje tsaima.”

¹⁶ Ná i che, “Djudamje nuna a ye ava dyew tsakeñe seyo sünda şüpo ná ba.

¹⁷ Tsaw-tuw dafihuñe, í í kulo ná tumona baladaw ná cheñe ki, ‘Age djebe; tsaw-tuw dafiadamme.’

¹⁸ Sé vyow na chetsü, ‘uvro go ye í che, no vi a prülawme, sünda no se í hojo dume; no ba chengkoime, no maf daijo dawe.’

¹⁹ Utro a ye che, ‘No fulhu fulshi pom lawme, sünda no he na dañe how jingkoime; no ba chengkoime, no maf daijo dawe.’

²⁰ Sünda a ye che, ‘No gzü dawme, sündada no majikufijome.’

²¹ Se kulo ye jekuñe í ñe übraw í he ñu ná trutsü. Sündawñe se ñe ubraw ye lusuvyulalye í kulo í che, ‘ñetrü go bozağ seyo gabo ge kutcho jeñe sapse, kiği, üshilyew seyo iñiğew ná age lañe kakuwe.’

²² Kulo ye che, ‘O übrawa, ba küna chedama, süna damme; sé yaje buğo ufo dulumme.’

²³ Übraw ye kulo í che, ‘Gabo ge seyo füta duw ge djeñe nuna ná künadamje lañe kakujodawe sündameje noñe gujome.’

²⁴ Hado chemeje no djó trungkoime, se tumona badaw ná no tsaw-tuw í tsapüñeje matsapüñejeome.”

Dju Jisu í kulo lyafijowa?

²⁵ Sünda upu na ufum kasawñe, sünda Jisu í fum ge tchoñe ná che.

²⁶ “Djudamje nochi ge jikuñe, seyo nudzo awu, añ, ufum, agü, ñu seyo ñum seyo nudzo şüw-duw naje mahosübammeje, í no şürhaw mowme;

²⁷ Seyo dju nudzo shokru íje magilama; sünda nofum makameje; se je no shürhaw madafijome.”

²⁸ “Djomko ye dju post dzuğõndama, seyo uvromsahü bo küña kajoma, damdzojo kuw nochi ge duşoma ñima mahow?

²⁹ Ana dawñe, i shobo dzugoñe ñekru makrufiwñe, sündawñe hovow nüna na vyow í tchüğõjoşo,

³⁰ ‘He nüna ye damyowbo damyodaşowa, sé madamd-zofiwa?’

³¹ Mo dju ñubyu duwa, utro ñubyu nadra tumo daw jiw, sünda uvromashü gyoñe mavemchevzüme, se hadza büsha kulo lañe nodrü ge tujovodawye no hadza gü lañe üdra dağufijoşoma mo mowma?

³² Mowmeje üga gyodamje, mukow kiñe ñu güdzüagyefijo.

³³ Ana veduw djo nudzo ichi küña duma ná nobo ma-trafimeje, se ye no shürhaw malyafijome.

Tsamtsalyow ġu

³⁴ “Ġu bo udame, sé ġu tsamğüw lyameje, se í ha yo ġu lüw dajowa.

³⁵ Se ye no ubo je seyo nobi ubo je chiğã ge makakujomme: se í nüna na ñepsü ge joajohubamme. Djuchi ge dzüjo ufu duma dzülasajodawe.”

15

Fugulu moahuw i shipyew

¹ Vyow patso-law na seyo lalo ubraw ná ichi ge dzüw jikuw.

² Seyo Farisi na seyo shizew-ñuzew na dubyoğunguñe che, “I bó lalo ubraw ná tüvañe seyo nadra ava je tsasai.”

³ Sündawñe i ná he zeğaw í tru:

⁴ “Djongko ye djuwa djuchi fugulu fuğua duma, sünda namko sa a moahuñe se sütü gütürü sütü ná nodo ge tralye, se a moadaw í matchülalu kuw tchü gyo?

⁵ Sünda tchülawñe, i şüpo lüshüw upostu ge trütalañe ka.

⁶ Sünda ñe ge kakuñe draw seyo ñeşü na bakeğiañe che, ‘Nodra lüshüsaawe, hado chemeje nochi fugulu moadaw ye tchüladamme.’

⁷ No djo truime; ana veduw ñedzü ge je lalo a dju vyegudoladama ubo lüshüjome, küñambo sütüğütrü sütü nüna güdraw dju ulu mavegudojo duma nabo madama.

Bosüñ moahuw i shipyew

⁸ “Ana mim dju dujowa, djuchi ge bosüñ gü duw, sünda namko ye bosüñ a moadabi; sündawñe i matchü uw mütrü tchühoñe seyo ñe na süñe, dju uw yo matchüjowa?

⁹ Sünda tchülawñe, i üdram na seyo ñeşü ná balañe che, nodra lüshü-lübasawe nochi bosüñ moadaw ye tchüladamme.

¹⁰ No djo truime; ana veduw, lalo nūna a í ulu vyegudolaw ge Tawgyew í sorgomuko ná ana lüshüjome.”

Saw tsağudroahuw i shipyew

¹¹ Sünda Jisu i che, “Nūna a ichi saw ksü duw.

¹² Naksümko ye kiğiw ye uyow í che ‘Awa, nobo go bo-luko duw ye, no djüjo dawe.’ I í ichi bo-luko na hağiag.

¹³ Sünda ñegi aña makulu fum ye üsaw kiğiw ye vyow dashütrü lalyeña ñetrü üğa a ge katrükralye, sünda süge bo-luko duw na vyow tsağudroamdzoag.

¹⁴ I vyow damdzoahuña, se ñetrü ge nokrow kaku, sünda i usso ufobüla lya.

¹⁵ Sünda i se ñetrü go nūna a ichi ji, se nūna ye í í vi ge vo na ava gyew ki.

¹⁶ Sünda i ve uluhu í gudugyejoña se votsa pago go vo na tsa; hado chemeje í djuje haje madjü.

¹⁷ Í vepalawña, sünda che, ‘No awu ichi küña vi daw ná tsaw-tuw aña paw, seyo no age luhuşüw yo dzüangkoibi.

¹⁸ No gudzulyiña no awu ichi kaña í chejo, awa no ñedzüña ba how ge lalo datroadashomme.

¹⁹ No basaw chejo haje matramme, no ba vi daw a veduw vejodawe.’ ”

Saw tsağudroahuw í kakutchow

²⁰ “Sünda i gudzulyiña, i awu ichi ge ji: üğa gudzudalu sa a uyow i í hoña nülvo veag, sünda gyojeña í krumogo lag, seyo şüpo chuma tsa.

²¹ Üsaw ye í che, ‘Awa, no ñedzü í hovow seyo ba how ye lalo dadamme; sünda hesalu basaw chejo go ñimme.’

²² Sé uyow i í kulo ná che, ‘Kutcho shedra uw yo je uw laña í sheijodawe, sünda ügzütsü ge gütsülye lyeijo dawe, seyo ishi ge shita duijo dawe,

²³ Sünda rhano a dajo dawe, sünda me ñi tsa-tuña lüshüfijobi.

²⁴ Hado chemeje nosaw ye dzüwmme, sünda üshükülyedamme: moahumme, hesalu tchülatchodamme.’ Sünda í lüshü-lübaw da.”

Saw nugow i shipyew

²⁵ “Sé üsaw nugow ye vi ge du. Sünda í kaña ñe kakulai ye, i nuğuw dagruw seyo ñuksu daw dzühu.

²⁶ Sünda i kulo a í balaña dzü, ‘He ha dangkoiya?’

²⁷ I í che, ‘Ba ñuw kakudamme, sünda ba awu i tsa-tuw dyew vedame, hado chemeje i í nūna uw hohuda.’ ”

²⁸ “Saw nugow ye he í dzühulyeña i lusuvyumfoag seyo ñe ulung makamyogoñ lyag: séšo uyow i ñepse ge jihuaña í nü.

²⁹ I uyo i che, 'Howe; no aña ojegomdo bá ġaksüñe ġyow, sünda ba chew keje madzügaahuw, nodraw nadra lüshü-lübaw dajo, ba no yow kuw küşüsa üsa adamje madjülü.

³⁰ Séšo he basaw ye ba bo-luko ná utroñiw mim nadru ge djoañe kakuwñe, ba ubo aña dyew tsaw-tuw dañe gyew.'

³¹ I í che, 'Sawwa, ba shüwduw nodra dusaw; seyo nochi ha duma se vyow bachibamme.

³² Séšo hesalu lüshü-lübajodume hado chemeje he ba ñuw ye dzüñe üshüküyetchodabi; moadabi, se hesalu tchülatchodabi.' "

16

Budzu duw nūna

¹ Sünda Jisu je í shürhaw ná che, "Nugo a ichi ge hokrüġiw a duwme, sünda nūna na i howye se hokrüw í i bo-luko ná tsagüdroahime cheñe usso ge trutchoañe ve.

² Sünda nugo ye í balañe che, 'He hawa no babo go ñu dzühuiye? Ba hokrüšo cheñe shewe; momeje ba hokrüġiw ge maġyofijome.'

³ Sündawñe hokrüġiw ye vemchepüñe, 'Hesalu no hadajobya? Hado chemeje no übraw ye hokrüġiw go no lahuangkoibi: noje no machifi; seyo no tsatuġujoje šüpo ñimtchüñ vei.

⁴ No danghudaba no ha dajoma: nó hokrüġiw go lahuahuwñe nūna na nó nañe ge lajo.'

⁵ Sünda i übraw i chi gudzüdaw ná a a balañe dzüpüñe, no ubraw ichi ge ba küña dojo duwa?

⁶ I che, 'Fuġua tsow psüw tel du,' sünda i í che, ba kutcho ġyoañe kako ge pomġü ġijo dawe.

⁷ Sünda i utro a í dzütcho, 'Bachi küña dojo duwa?' I che, 'Pu ulumo fuġua tsow dume,' sündawñe i í che, 'Bá kako lañe šügzüġü ġijo dawe.'

⁸ "Übraw ye se machiñiw hokrüġiw í tro, hado chemeje i budzu yo chiġa dadabi; hado chemeje he druguw-drulyiw go nūna na ná ñeto go nūna nadra chiġa dasaw ge, müsaw go nūna ná fow budzu du.

⁹ Sünda no djo cheime, mauw go bo yo ba nudzo ubo üdra dalajo dawe; hado chemeje i kaahuñe, bá na shüwa-shüw lüshüw ge lamyosajo.

¹⁰ Dju imisa yo je imisa ge usuima, ná aña ge je usu-jobamme: seyo dju imisa yo je imisa ge usu mowma: se na aña ge je usu mojome.

¹¹ Sündada ba he druguw-drulyiw ayo bo-luko ge usu mowbammeje, bo umso dju djüjowa?

¹² Sünda ba tuġuda-ġuvodzü i bo-luko ge je usu mowbammeje, ha ye bachi ma, se í dju djüjowa?"

13 “Dju kulo ye je übraw ksü í mağaksüfijome hado chemeje i a í mahoğon dajo seyo a í nülvo dajome; mome a udra gaagijo seyo a üdra magağijo: ba Tawgyewne bo-luko naksü í mağaksüfijome.”

Tawgyew í gadzü i go

14 Farisi na, dju tsağotüdama, he na dzühulyeñe Jisu í maw-uw zekülye.

15 I ná che, “Djobó nüna na how ge uw dañe she, séso Tawgyew í djodru djolu ná danghuwme, hado chemeje ha gañ ye nünan na how ge dyew dama, se ye Tawgyew i iñigzü ge imisame.”

16 Yohañ í kakuw kuw, shotuko-kunu seyo ñihow truw naje ná chiğa daw. Sehu ñetogomdo Tawgyew i ñetrüğüfo go shi-ñu truñe kaw, sünda vyow nüna na süna datsü.

17 Ñedzüñe no naksü í kabrağiahu ye shotuko ütra a yo lyajobame.

18 “Dju nudzo ufum udra brağilyeñe utro nadra gzü daima, se na lalo dawme, seyo dju brağine gyodaw mim í gzü daima se ye lalo dawme.

Nugo nünañe sapse Lajar

19 “Nugo nüna a duw dju djüw rong seyo gye uw shewma, seyo shüwa-duwa lüshü-lübaw dañe gyonggudruw.

20 Sünda Lajar iñiñ yo sapse seyo tsadu yo guñe í molgi ütrü toi tralye.

21 Sünda í vew, nugo í tsamyew djoadaw yo uluhu í tsaşelajo; momeje şulyo na je í tsadu í kañe tsalowba.

22 Sünda se sapse ye dzütrükralye, sünda sorgomuko na í Abraham ichi laku. Seyo nugo ye je dzüdañe zuadabi,

23 Sünda noğu üşü ge şüpo naw yo iñi voaño üğa go hobanda, Lajar í Abraham í udru ge ggyodaw hohu.

24 Sünda i guksuñe che, ‘He Awa Abrahamya, no nülvo veñe, Lajar í kiñe, ügzütsü üdza ge hu pagzüñe nozelbüla í ngüadügyejo dawwe, hado chemeje no he mi ulbu dzongkoige dzahiimme.’

25 Séso Abraham i che, ‘Sawwa vehujodawe, ba bá şhülye ge gye-ğuvo uw shehulyewme, sünambo Lajar i gye-ğuvo mauw, seşo i hesalu age güdzüw pangkoimme, sünda ba namoahibi.

26 Sünda he ñu na traañe no seyo ba, ñiksüngko ye go dyam a dzühadame, ago dju bachi ge jilağon dama, na majilafijomme, seyo sügo dju age nochi ge jikuğondama na majikufijomme.’

27 Lajar i che, ‘He awa, no ba chengkoime, ba no awu iñe ge kiyajo dawwe,

²⁸ Hado chemeje no ñu pom duwlume, i na hovrow ge he ñu na trume ujome, mowmeje na he anambo ñiku-ñisüw no ge kakuñeme.’

²⁹ Abraham i í che, ‘Nachi ge Musa seyo ñihow truw ná kako duwbase, na se í chew бүдзүда.’

³⁰ I che, ‘Awu Abrahamya, mowme; nüna dzüw a nachi ge jikülyameje, na nadrü-nalu vyegudoğijome.’

³¹ I í che, ‘Na Musa seyo ñihow truw na chew maje madzübi se í, nüna dzüw namko yo djudam üshükülyeñe jiadamje, na madzüjomme.’ ”

17

Zehaw

¹ Sünda Jisu i í shürhaw ná che, “He ye umsoma ha ñu ye lalo yo ma, se ye kakujome, séšo se nüna í lalome dju yo kakuima.

² Dju he ġato kunu namko ye djudamje a í düğaima, ibo shedra psüm yo udum ge pyogolyeñe, huġi ge djoahuye ufo-jobamme.

³ Vemcheñe ġyojodawe; bañuw datrulaimeje, zehajodawe, seyo vepalaimeje í muchoaijo dawe.

⁴ Í ahua ye ülye mro datrudamje bachi ge ülye mro jikuñe che, no datrudašomme, sündawñe ba í datrudaw í muchoaijo dawe.”

Bá veksüw küña dyewda?

⁵ Sündawñe í shürhaw na Tawgyew i che, “Ñí veksüw í damñeijo dawe.”

⁶ Prabu i che, “Bachi ge pemdu üsü ütraña kuwdamje veksüw dumeje, ba he kumtchü iyañ í ükrüğomdo taprülañe huġi ge shüwe chejo, sündameje i ba chew dzüjo.

Chiñiw kulo

⁷ “Sé djomko ye ana dju chejowa, dju kulo ye no chi momeje fugulu ná saw, sünda í vi go kakuwñe, sünda í che, ‘Kutcho age jeñe ġyoñe ava tsabe?’

⁸ Haña i ná machejoma, no ava dashütrübe: no tsangko tungkolui kuw toi bašümpe í kidzagolalyeñe no hoiwe; sünda se fum ye baje tsa-tuwe.

⁹ Haña i se kulo í ulu yo vejoma, hado chemej i í dügyedaw chiġa í aka dabada?

¹⁰ Anambo ba je, se vyow chiġa dügyedaw ná damdzoahuñe, baje chewe, ‘Ñi machiñiw kulome; ñi ha dasajo duma se í aka dabadame.’ ”

Tabüñ naw a í nülvo

¹¹ Sünda ana da, Jisu Yarusalem jiw ge Samariañe Galili ñetrü yo jipseañe ji.

12 Sündá ñetrü a ge jimyongkoi ge í súdzüm gû gôgô nadaw na tüva, dju na üga gudzudama.

13 Sündá i üga ge gudzüñe, gó yo che, “He Jisu, he dadrüwa, no nülvojo dawel!”

14 Jisu i í hoñe che, “Jebe; sünda bá nudzo í mûgaw ná shejo dawel.” Seyo kabyo-kağyowñe güdrajebi.

15 Sündawñe namko yo a ye hoñe dagyolagdabi, gow yo Tawgyew í troñe katrükralye.

16 Seyo Jisu ishitrüge gaañe ukrumro yo ishi ge drüñe, ulvyu yo uw che; sünda í nüna uw.

17 He íbo Jisu i che, “Haña na gû güdraw malyama, nameje se sütü ye hanga?”

18 Haña he tuğuda-ğuvodzü í tralyeñe dju ñimma Tawgyew í trojo?”

19 Sündawñe i í che, “Gudzüñe kabi; ba veksüw ye bá dagyodamme.”

Tawgyew í ġadzü kakülyahuw

20 Farisi namko yo a í Tawgyew í ġadzü ke kakülyajowa che dzüñe, Jisu ná che, “Tawgyew í ġadzü ana holaw dañe makakülyajome.”

21 Sünda nüna naje ana machejome, age howe, age dume, süge dume. Hado chemeje, Tawgyew í ġadzü djumko ye dume.

22 Sündawñe i shürhaw ná che, “Sé ñeto je kakujome, hai ba nüna üsaw í hoğoniw dzüajo, sé mahohujome.

23 Nüna na ba chejome, ‘Howe, süge dume!’ Mome ‘Howe age dume!’ Séso ba djujejo dawel sünda nafum je djudajo dawel.

24 Hado chemeje ñedzü-lüğaw ye ñedzü üdza a yo utro üdza ge kuw müsakumbo, nüna üsaw ye je í ñeto kuwñe kakülyejoşome.

25 Séso uvromashü i şüpo ñiku-ñisüw gilajome, seyo he şhülyiw yo nüna na í matsüñe chejome.

26 Nuha i ñeto ge küna dadama, sünambo nüna üsaw i ñeto ge je dajome.

27 Nuha i lü ulung ge magyomyolu kuw, nüna na tsa-tu ġyo, seyo namko ye gzü dañe ġyo; sündawñe hulüşü kaküñe vyow mauw damdzoa.

28 Seyo Lut i ñeto ge dambo veduw, nüna tsa-tuñe bumdzu dağiw, shobro zuñe seo ñe daw.

29 Séso ha ñeto Lut í Sodom ge kadama, sehu ñeto ñedzü go mi seyo ecid şükülyañe vyow mauw damdzoag.

30 Nüna üsaw í kakülyahu ge je ana dajobamme.”

31 “Sehu ñeto, dju ñelütsü ge duma; seyo na gañ ñe ulung ge du, na se na law ulung ge djukamyowe, sünda sünambo dju vi ge duma na fum ge djukawe.

32 Lut ufum í vehujodawel!

³³ Dju nudzo í ĝaksüjoñe veima na maĝaksüfijome, seyo dju nudzo shüw í maĝaksüfima na basüjome.

³⁴ No djo trungkoime, se ñegi nüna ksü buĝo a ye üša dujome, a í latrayemjomme, seyo utro a í traalyjome.

³⁵ Mim ksü ye ĝato üša ĝüjome, a í latrayejo, a í traayejome.

³⁶ [Nüna ksü vi ge dujome, a í latrayejo seyo a í traayejome.]”

³⁷ He ná dzühuyeñe na í dzü, “He Tawgyewwa he na hai dajowa?” I ná che, “Hai ñimo duma, süge kurkukiñ dujome.”

18

Müjemñe mauw zevow

¹ Sünda Jisu i ná he ubo go zeĝaw a trulyeñe udrü-ulu maga-ada, mamuduw küĝuweñe che:

² “Hange damje ñetrü a ye mukow a ĝyow; dju Tawgyew ije maĝew seyo nüna nabo je mavew.

³ Sünda se ñetrü ye müjem je a ĝyow: dju ichi ge jikunggu-druñe í chenggudru, ‘No insaf djüiyeñe nobo ĝaksüiijodawe.’

⁴ I üĝaluw kuw madzü séšo fum ye ulu ge vepüñeñe che, ‘No Tawgyew ije maĝew, seyo nüna nabo je mavetunow;

⁵ Sedamje he müjem ye no matraa, sündada ubo insaf djüijo, mowmeje i nochi ge jikunggu-druñe no ĝüdzüw maĝodügyejo.’”

⁶ Tawgyew i che, “Dzüwe, he magüdraw mukow ye ha cheima?

⁷ Nameje: haña Tawgyew i í nüna basü ladaw ná mamutchoaijoma, dju ñegiw-ñetow í küĝuñe ĝyowma; seyo i ná üĝaluw vejoma?

⁸ No djo chengkoime, i mekutcho ná mutchoijome; sé nüna üsaw kakülyahuñe, i he druguw-drulyiw í umso vefijosoma?”

Dju güdrawñe chejowa?

⁹ Seyo Jisu i shürhaw na dju nudzo í güdrawñe veksüw veima, sünda utro na mauw daima ná ana zeĝaw che:

¹⁰ “Nüna ksü ñegru ge küĝüw ji; a ye Farisi seyo a ye patso-law nüna.

¹¹ Farisi i gudzulyiñe üdrü-ulu ge ana küĝü, ‘He Tawgyewwa no ba ulu yo uw cheime, no utro nüna na dambo tsaksulaksuw, mütü chiĝa daw, seyo mim ĝubuw, seyo he patso-law na dambo nüna mowme.’

¹² No sopta ye ülye ksü tsaw-tuw matsaw ĝyowme, seyo no bo-luko dalaw gow üchea je djüwme.”

¹³ “Séšo patso-law nüna ye üĝa gow gudzuñe, ñedzü ge je iñi maholyi dá i ülüjetchü ge güñe che, ‘He Tawgyewwa, he lalobraw no nülvoijo dawe!’

¹⁴ No djo cheime, i ufum yo mowme; séšo he nüna ye güdrañe ñe ge kajeme; hado chemeje dju nudzo í dyewñe veima,

i imisa lyajome; seyo dju nudzo í imisañe veima, i dyew lyajome.”

Tawgyew í ġadzü anagasa na vedumbo

¹⁵ Sündá nūna ná na sa naje ichi ge lañe jikeñe nagzü Jisu udru ge vefijoñe; sündá shürhaw na hohuñe ná goha.

¹⁶ Jisu i angasa ná ichi ge balañe che, “Angasa ná nochi ge jigyejo dawé, seyo ná djugohajo dawé: hado chemeje Tawgyew í ġadzü he nambo nabome.

¹⁷ No djo umso truime, dju Tawgyew í ġadzü í angasa na dambo malama, ná keje süge majimyofijome.”

Nugo nūna a Jisu í ñu dzü

¹⁸ Djudamje dümbraw a ye í dzü, “He uw übrowa, no shüwa-shüw shüjo ye küna dameje ujowa?”

¹⁹ Jisu í i che, “Ba nó hado uw chewwa? Djuje uw mowme, nūna a akasa uwbame, se ye Tawgyewme.

²⁰ Ba shotuko-kunu í bo danghušo: ‘Mim dju ġubuwe, djushiwe, djutsakšuwe, mülaw-mütraw djutruwe, nudzo awuñe nudzo añ naksü í chew dzüwe.’ ”

²¹ I che, “Nobo he ná vyew angasa ulvyu ladañe vewbame.”

²² He í dzüwe, “Jisu i ná che, bachi ge yaje ñu a ñilumme, bachi vyew ha duma ná draatsülyeñe sapse ná hatsüwe; sündá bá ñedzü ge lukó pajome, sündá kakuñe nofum kasajo dawé.”

²³ He í dzühulyeñe í šüpo duhu da, hado chemeje i šüpo nugo.

²⁴ Jisu í i holyeñe che, “Bo-luko duw na Tawgyew ichi ġadzü ge šüpo atağa yo kamyofijobame.

²⁵ Tawgyew i ġadzü ge bo-luko duw na kamyoyo í bo ut í sütrü üšü yo kamyow je ufojomabe.”

²⁶ Sündá dzühu daw na che, “Nameje djú basüafijowa?”

²⁷ I che, “Haye nūna yo madafima, se ye Tawgyew i dafi-jome.”

²⁸ Patras i che, “Howe, nobó ñe-vi je tralyeñe bafum kasawme.”

²⁹ I í che, “No bá umso truime, ana djuje ñime, dju Tawgyew í ġadzü ubo, ñe, mim-kiği, ñu, awu-añ seyo saw-sam ná trahuw.

³⁰ Sündá sa yo sa a na haje aña djupawe; seyo dzüwñe druguw-drulyiw ge shüw lüshüw pajodawe.”

Dzüñe üshü lyajo go ñihow

³¹ Sündá Jisu na ġüyo ksü shürhaw ná üdra lañe ná che, “Ñi Yarusalem ge jingkoime, sündá küña ñu nūna üsaw ibo ñihow truw na ġi vedama, se na vyow datsüjome.

³² Hado chemeje i tuğuda-ğuvodzü nagzü ge djüjome, sündá na í tchügoñe-hoğojome, sündá zehu je müdrüdzajome.

³³ Sündá na í ġüjome, sündá shijome, sündá i ñegi dzü ye üshükülyetchojome.”

³⁴ Sūnda na he ñu namko ye haje madzūsū sūnda he ñu na namko ye mūsūtsū, sūnda ha trudama se ye na madzūla.

Iñi ġew í iñi

³⁵ I Jeriko ñetrū ütrū üñisa jikulai sa a, iñi ġew a ye üdza ge tsatuġuñe ġyoda.

³⁶ Sūnda i upu na dügrū jiw dzūhuñe dzüpuñe, “Ayo a ha dangkoiya?”

³⁷ Na í tru, “Jisu i Nasri ge jingkoime.”

³⁸ Sündawñe i ġuksuñe che, “He Jisu, Dawud i üsaw, no nülvojjo dawē.”

³⁹ Dju vro-vro jeima, na í madañda ġyo cheñe ze, sé i umsow šogzukūlye, “He Dawud üsawa, no nülvojjo dawē.”

⁴⁰ Sündawñe Jisu i gudzulyiñe í ichi ge lañe jikuwe che, sūnda i iñisa jikuwñe, i í dzü,

⁴¹ Bá ha tsüda, “No babo daijome?” I che, “He Tawgyewa, nó hofidügyewe.”

⁴² Jisu i í che, “Hojodabe, ba veksüw ye ba dagyojemme.”

⁴³ Sūnda í djeañe hohu; sūnda Tawgyew í troñe, ufum kase, sūnda vyow nūna na hohuñe, Tawgyew íbo trotsü.

19

Jisu Jakariya ichi ñe ge

¹ Jisu Jeriko ge jimyolye jimkoi sese.

² Süge Jakkai cheñe nūna duvo, i patso-law go mukyew sūnda nūgo je nūgo.

³ I Jisu í hoġoñ vyew i djuma cheñe? Sešo upungda sese mahofi. Hado cheme i üchesada.

⁴ Sese i í hojoñe vye uvro ge gyo djeñe lufuje shoñ udru a ye lyilyig, hado cheme Jisu i se ġabo kajoda.

⁵ Sese Jisu se a jikuñe, udru ge hotrolyiñe í che, “He Jakkai, kutcho lyiga; hado cheme yow no bá ñe ge ġyojo dume”.

⁶ I kutcho yo lyigalye lüshüldzulalye í ichi ñe ge la kake.

⁷ He í hohulyebi nūna na zeġi, “I bó se lalo nūna ichi ñe ge jijebe.”

⁸ Jakkai i gudzuñe Tawgyew í che, “He Tawgyewwa, No nó bo-luko üchea ye ñiw ná djüjome, seyo üchea ye sena djüjome djuchi go no laġamüñeda ma se na no psüġingua fow djüpyojome.”

⁹ Sese Jisu i í che, “Yow he ñe a muchoahuw jikudame, sündada he i je Abraham ichi sawbamme.

¹⁰ Hado cheme nūna üsaw ye moadaw ná tchüw seyo ná basüaijo kakuwme.”

Bosün uvyu ġü

11 Sese i he ñu ná dzümkoï sese, i zeğaw a ze, sündada chedawa i Yarusalem ütrüañ a duda, seyo i vyesüw je vyesüw, se Tawgyew ichi ġadzübraw ye hesahe kakudalaibiñe.

12 Sündä: I che, “Nüna nugo a ye ge ñetrü üğa ge ka sügo nugo pafiñe kakutchofijo.

13 Seyo i í kulo naği yo ġü ye balalye ná bosün uvyu ġü djü, seyo ná che, ‘No kakuw kuw bumdzu davojo dawew.’

14 Sešo í ñetrü ge ġyodaw na í mahoğon daw, seyo ífum ge muko kiñe ñu che ki, se i ye no matsüme, se i ñidru ge ñubyu dañjo.”

15 “I ñubyu lyibiñe kakutchow sese, i ana a da, ichi se kulo ġü ye dju í bosün uvyu ġü djülyedama, se na itrü a balaku sündä danghujoñe vyeñe se na se í yo küña ha ha dashaladama.

16 Sese uvromashü yo a ye jiku che, He übrawwa bachi djüdaw bosün uvyu ġü yo dañe ġü müñew damñeladame.

17 I í che, ‘He kulo ülüksüfowwa, bá šüvzüw me, ba šüpyo mesame sese ba umsowda kakülyeda, ayo ba ñetrü ġü yo übraw dabei.’

18 Sefum yo a ye jikuñe che, ‘He übrawwa, hošoa, bachi bosün yo uvyu pom dashamüñewme.’

19 I í chetcho, ‘Ba je ñetrü pom yo übraw dabei.’

20 Sefum ye a ye jikuñe chetcho, ‘He übrawwa, hošoa, bá bosün ye he duw ye, he í no nó gye ġüpaw üdza toi pyogoñe vyedaw he.

21 Hado chemeje no bá ġedabi.’

22 I í che, ‘Mauw kuloa, no bamdzu yo bá no trudañe chei he me.’ Ba nó danghuwbi nüna mügzütchüwñe, ha ye no ma vyema se í dzula, seyo se no ma zuw, se í djoahuwme;

23 Ba nochi bo ye bo dashabraw ná hado madjüña, se í no kakuñe sashadaw ye lakeğijobi?

24 Seyo dju nüna na üñisa gudzdudama, se na í che, ‘Se bosün ye ichigo latchojodawe, seyo djuchi ge bosün ġü duma se í djüpyojo dawew.’

25 Na í che, ‘He übrawwa, ichi bosün ġü bó dušo.’

26 ‘No bá chemkoime, se djuchi ge duma, í seyo djüpyojoluwe; seyo djuchi ñima ichi go se í je lajodawe se ichi ha dusama.

27 Sešo nochi se fugulu ná se vyeñidaw na se no nadru ge ñubyu dame, se na age lakuñe noñisa a shiwe.’ ”

Jerusalem ge fojelübzüw kakuw

28 Jisu i he ñu na chelye i Yarusalem ge navro-navro ka.

29 Seyo se i Jetun üñiñi yo pu sa a Betfage ñe Betniyah üñisa ge jikuwñe, sese i í shürhaw naği yo ksü ye ana cheñe ki,

30 “Üñisa yo ñetrü ge jijo dawew, seyo süge jikubyo jikuğyoñe ġiğe ichi üsa a udru ge djusa je magyoluw, pyogo vyedaw bá pajome, se í tashalye lakuwe.

³¹ Seyo djudamje bá dzülaimje, hado tashamkoiya chemeje, se a ana chejodase, se Tawgyew i he í tsüdame”

³² Se kidaw ná, na jikuñe í ná ha chesedama, süna pabadabi.

³³ Se na giĝe üsa ye tashamkoi se, ichi übraw ye ná dzü, “He üsasa ye hado tashamkoiya?”

³⁴ Na che, “Tawgyew í he í tsüdame.”

³⁵ Na í Jisu ichi ge la kaku seyo nudzoĝ gye ye tapualye se udru a ñeilye Jisu í giĝe udru ge gyodügye.

³⁶ Sünda na kamkoi sese, na nudzoĝ polu ye ĝabo toi ñevoñe ji.

³⁷ Seyo üñisa kakulye se i Jetun pu i ĝo ge kaku, sese shürhaw na vyew upua na vyemoñe chiĝa dadaw ibó i hohuda na, lüshüldzuañe gow yo ñu zeñe Tawgyew ibo trokülye:

³⁸ Šüvzüwme se ñubyu ye, dju Tawgyew iñiñi yo jikuma! Sörgo ge ĝüdzüw seyo ñedzü ge lüshüwme!

³⁹ Sese upu na yo süña Farisi na í chengkoibi, “He Danghubrawwa, bá shürhaw ná zea.”

⁴⁰ I ná chetcho, “No djomko a chemkoime, he i maziw ĝyome, kunu na šogzukülyejome”.

Jerusalem íbo ksew

⁴¹ Se Jisu üñisa kakuñe se ñetrü í holye ubo kse.

⁴² Sündalye che, “Ha ye ujowa, he ba; am, ba bába, he ñeto ai lüshüjo ñu danghudama, séšo se i yabó bañisa yo mušiadabi.

⁴³ Hado cheme se ñeto ye badru ge kakujo se bá vyeñiw na sülyeñtchü pyogoñe bá djetuĝujome, seyo djetuĝulye bá ñujome.

⁴⁴ Seyo bá seyo badra ayo a ná bachi angasa ná, nogüdzü nadra gülyiajome, seyo badru ge kunu yo je kunu matrüjome; hado cheme ba süna dajo ye kye badru ge nülwov vyeñe hojema sei madanghuje”.

Ñegru í dagudrahuw

⁴⁵ Sese Jisu i ñegru ge drüñe ĝyodaw ná nopsü ge lahuatsü.

⁴⁶ Seyo ná che, “Ĝidame; ‘Nochi ñe ye küĝüw ñejome,’ séšo djo he í tsaĝa-laĝaw nachi ñe da joadamme.”

⁴⁷ Seyo i muhu-muhu ñegru ge shi-ñu truñgudru: seyo se müga sawlyiw na seyo shizew-ñu zew na vyew djekeĝiñe í shijoñe tumuñgudru.

⁴⁸ Séšo haje ĝabo matchüla; he í küna dañe dajojema, hado chemeje vyew na dru-lu djübyo djügoñe ichi ñu dzüñgudru.

20

Yahudi na Jisu í ñu dzüw

¹ Ahua ye ana a da, jisu i sese ñegru ge shi-ñu trumkoi sese, mügaw dew seyo shi zew-ñu zew kew nadra jikuñe sese gudzu.

² Seyo chemkoibi, “Ba ñí truwe, ba he chiğa ná dju dadügyedañe dawdo daña, seyo se i djua, dju bá he i dawene dügyedaye?”

³ I ná trutcho, “No je djó ñu a dzüjome; nó trujo dawewe

⁴ Yohañ ichi Baptisma djüw ye Soğgo go ma mo nuna yo ma?”

⁵ Sündawñe nağüтчü zeği, “Se ñí chebammeje, ‘Soğgo gobabi,’ süñchewñe i chetchojo; ‘Sünameje djo idru ge hado umso mavyeña?’

⁶ Seyo ñi chetchojobi, ‘Nuna yo me chetchobamme,’ se vyew na ñidru ge kunu trüjobi, hado cheme i umsow go danghudabi, Yohañ i ñihow cheñe.”

⁷ Dañdañlye na tru, “Ñi madanghume, se i djuchi go jema.”

⁸ Seyo Jisu i ná che, “Nameje no je djo matrujome no he chi ná dju dügyeñe dadama.”

Bolu mau vi daw nuna i lağüşhi truw

⁹ Sese i se nuna ná he ana zeğaw go tru, “Nuna a ye anggur zugua, sündalye vi daw ná howeñe bo ve seyo şüpo uwalaw kuw utro ñetrü ge jitrükrallye.

¹⁰ Bomdrü sese i vi daw nachi ge kulo a ki, se vi yo kakülyedaw anggur üje ibó je djüweñe cheñe k, sé vi daw na í gümoamdo gümoañe ufo kadügye.

¹¹ Sündawñe i kulo a ye kitcho, sé na se í je güтчolyebi zeaşe zeameñe ügzü ufo kikutchó.

¹² Sündatchowñe i ülye dzü kitcho, seyo na se í je dzüтчüzew gimoañe lahuag.

¹³ Sündawñe se anggur go vi übraw ye che, ‘No há dajobabya? No nó saw í kijobaba, asha na í chew dzüw dujojeşoma.’

¹⁴ Sese vi daw na i hohulyebi nağüтчü poği, ‘He i bó üsaw ye ba; age djebya, ñi í shibow, sündañe he na ñichi lyajobi.’

¹⁵ Seyo na í se anggur vi yo lahuañe shiag: sündada vi übraw i nadra ha dajobabya?”

¹⁶ “I kakuñe se anggur vi daw nuna ná damütrajo, seyo vi ye utro ná djüjo.” He í dzühulye na che, “Tawgyewwa ana djuda.”

¹⁷ I nachi ge hulye che, “Se he ye ha ğida:

‘Ha kunu ye ñe dasüw na ha madağiwñe süñeadama, Se i ukutru go dakrükye se i lyada.’

¹⁸ “Djudamje se kunu ge gaahima se i ganüajobamme, seyo djudru ge i gahima, se í ğünü-ğüğajobamme.”

Shi-ñu zekyew nañe Mügaw sawlyiw na lütsa

¹⁹ Seşügudo ye Shi-ñu zew nañe seyo Mügaw dew na í külyijoñe vye, hado cheme danghula dabi, i nabó magow ñu zeğaw yo tru, sešo í ná büğedañe vye.

20 Seyo na í hokrübabiñe seyo ichi ge hotumuw ki, se had-owo cheme i alyamo alya ye shi-ñu trutroameje sese ñustu kigojoñe, se í nugo ichi ge trutroadame che djüfijoñe.

21 Na í ana dzü, “He dadrüwwa, ba mülaw truiñe ñi danghudame, Seyo dadrüw je darüi, Seyo djubó go goñeje mache; Semome Tawgyew ichi ġabo ye umsow trufijo.

22 Hawa ñi Kesar í patso djümeje ujoma, mo mowma?”

23 I ná budzu yo dzüi ye dzüsülye che,

24 “Bosüñ a nó shejo daw. He a djuchi ġiġe düdama seyo dju ñiñ duma?” Na che, “Kesar ichi.”

25 I ná chetcho, “Se Kesar ichimeje í djüwe, seyo Tawgyewchimeje í djüwe.”

26 I nuna ñisa a se ñu ye madzüsüla, semome ichi ñu hutrodaw se i yo mavyenghuatsü.

Güdrakosksüwñe gzü

27 Sündatcholye Saduki i chew ye, nuna dzüw na kenghuaaje maüşhüjome, naġi yo nuna üchea na ichi ge jikuñe dzü.

28 “He dadrüwwa, Musa i ñibó ana ġidawa, ‘Se djuchi damje üyalyo a ichi ufum ye saw-sam malaluye dzütrükralyemeje se üñuw ye se mim üyañedra i gzü datchowe, seyo üyalyo íbó agü mulo sakülyewe.’

29 Sünda ye alyoñuw mro duw, üyalyo nugowfow ye agü je masakülyelubi ye dzütrükralye.

30 Sefum yo ye je,

31 Seyo seladzü kiġiw ye je se mimdra í gzü daladabi. Se ana dadañe namro mamro agü masakülye dzümdzoaha.

32 Se nafum se mim ye je dzüase.

33 Se a na üshükülyemeje se mim ye djufum lyijowa, hado chemeje i na mro mamro üdra gzü datsüwdabi.”

34 Jisu i ná che, “He ñefo go shüdaw agü na gzü daibi,

35 Se dju nuna damje ana lyifikülyemeje, sé ñeto go dzüdaw nuna na üshükülyetchojo lyifime, namko ai gzü madafijo.

36 Se i dzü je madzüjo; hado cheme i sorgomuko vyedujo, seyo güdrakoşksüw yo agü üshükülyemeje Tawgyew ichi je agü lyijo.

37 Seşo he ñu ye dzüdaw na je üshütchoi, Musa je shoñ ge süna folakülyeda, i Tawgyew í ‘Abraham üsa, seyo Isahak üsa, seyo Yakub üsa ana chelyew.

38 Tawgyew ye dzüw nachi mow séşo üshü nachi Tawgyew: hado chemeje ubo yo vyew na üshütsü.”

39 Sese na se í dzühulye Shi-ñu zekew küña duma na che, “He dadrüwwa ba uw chejejeba.”

40 Seyo bó na í ha madzülöfibi.

Jisu Dawud üsawma mo Dawud ichi Tawgyew ma?

⁴¹ Sündatcholye Jisu ná dzütcho, “Masi í Dawud üsaw cheñe kúndañe cheña?”

⁴² “Dawud í üsaw Masi i kako ge cheda:

‘Tawgyew i nochi Tawgyew í cheda,

Nochi südzüvopsügi ge gyowe,

⁴³ No bá fugulu ná bashitrü ai malakyeğitsülu kuw.’ ”

⁴⁴ “Dawud bó í Tawgyew chew; se sünameje i í üsaw kúnda cheña?”

Shi-ñu zekyew nüna zew madzüw ná Jisu í trüdrü

⁴⁵ Vyew na dzümkoï sese, i í shürhaw ná che.

⁴⁶ “Shi-ñu zekyew na yo hochiğiwe, dju shedra psüw sheñe kahi w vewma, seyo ná bodzağ ge gaga daw, seyo küğüw ñegru ge psüga dew ge gyoyo uw vyejome.

⁴⁷ Na müjem nachi ge tsaw jiñe seyo bühodañe uwalaw kuw küğüw dawme, he na süpyo mau ñe ge gajome.”

21

Haje ñiw müjem ichi umsow lapsü djüw

¹ Sündatcholye Jisu i ñni yo lapsü dzüw nüna na nudzoğ nudzoğ lapsü í lapsügyebyo ge trümkoï hohu.

² Seyo i haje ñiw müjem a ye je i sayo sa a bosüñ ksü trümyoajew hohu.

³ Sese i che, “No djó umsow chejome se i ye he haje ñiw müjem ye fow trümoabajeme.

⁴ Hado cheme nabó nachi nudzoğ nudzoğ lapsü yo me trüje, sešo i í shüda yo küña dusama vyew trümdzoajebi.”

Ñefo i mudzoajo go hosüw daw

⁵ Küña nüna na ñegru ufo go chemkoï ye, se i küña kunu howsa yo seyo gañ yo chibra daida, se i che,

⁶ “Süna ñeto je kakujome, sese he na he i ba hohui na, namko ye ha yo ha a kunu udru ge kunu je matrajome.”

⁷ Na í dzütcho, “He dadrüwwa, he na kye dajowa? Seyo he ñu na dajobi sese, ha chi hosüw dujowa?”

⁸ I chetcho, “Chitchügiwowe, dju dzüşeawe, hado chemeje şüpyo nüna na nó ñiñi lañe chejome, no se ibamme; seyo he i damdrü kakudamme: djo se nafum djukasejo dawe.

⁹ Seyo djo psegi-lugi daw süna nafo go dzühulaimeje, dju gejo dawe; hado cheme he na uvromashü davzüjowbamme; sešo se ñeto kutcho mamütrajome.” Süna ñeto je kakujome, sese he na he i ba hohui na, namko ye ha yo ha a kunu udru ge kunu je matrajome, Süna ñeto je kakujome, sese he na he i ba hohui na, namko ye ha yo ha a kunu udru ge kunu je matrajome,

¹⁰ Sündawñe i ná che, “Gübye yo gübyeğütchü seyo ñetrü yo ñetrüğütchü psegi jome.

11 Seyo ñeğüzüw je dew dew dajome, seyo ñetrü ñetrü sapseañe seyo ñañemu kajome, seyo ñedzü ge ñiğeñiw ñu seyo dew dew chi shejome.

12 Séšo he ñu na madaluye na uvro nó ñiñi yo kigovzüjome, seyo maw-uw ze dajome, seyo ñegru ge djüjome, seyo pache ge shüjome, seyo ñetrü ge ñetrü ñubyu natrü ge lajikujome.

13 Se he na babó ñu truvomdrü kakülejome.

14 Sündada nudzoğ nudzoğ drü-lu ge pyogo vyejo dawew, no vrogomdo trufijo se í duhu madadañe.

15 Hado cheme no bá ana chejo seyo ana budzu djüjome, se bá mau zeñe zeaşe zeame dai na madafijo.

16 Seyo bachi awu-añ seyo ñuw-ñum seyo ñeşüğ-ñepyeğ, seyo draw na je tsüladügyejobamme; aña kuw dajome, djomkoye şüpo na dzüdügyejome.

17 Seyo no ñiñi yo badra mau dajome.

18 Séšo bakyetrü umu a je matrüafijome.

19 Ba nudzoğ drü-lu ye ğüdzüw yo şütrüñe vyejo dawew.

Jerusalem í mütrüw

20 “Ba kyedamje Yarusalem í rhünokew na yo jığşığiahuw hohume, sese ichi mütrüjo üñisabammeñe danghujo dawew.

21 Sese dju Yahudiya ñetrü ge duma se na pu udru ge djetralyewe, seyo dju Jerusalem ulung ge duma se na djehuaje dawew; seyo dju ñetrü ge duma se na süge djujijo dawew.

22 Hado che se i dutruğijo ana ñeto kujome, sese ñu ğiñe vyelyedaw na vyew lyitsüjobamme.

23 Se ñeto ge dju agü ñiw seyo agü apu tudügyeima, se nabó tui! Hado cheme se ñeto ge no nağütchü dağijo seyo se a ná şüpyo ñiku-ñisüw lyijo.

24 Na vyetsü ürhü yo süğüajome, seyo vyew ñetrü drü-drü ge mubyo na lakuzeğiatşüjome, seyo utro sama nachi ümdrü vyew makulu kuw, sese Yarusalem í utro sama yo dashiğiajome.

Jisu i kakutchojo chitruw daw

25 “Seyo dru seyo hubye seyo lütsü se na ge chi shejome, seyo nomñew ñetrü a je, ñetrü drü-drü go nuna ná chitruw dajome; hado cheme na sütüğülü ichi hu rhaw yo lamo ğetsüjome.

26 Seyo ğew yo druguw-drulyiw a trüw kakujo se í hohuñe nuna üşhüjoñe je mavyejome, hado cheme ñedzü go gokew ye je ğüdü-ğüdüjome.

27 Sese na nuna üsa í lüşüw-lübaw mumudrü ge gow kalai hohujome.

28 He ñu ye trumkoi sese, ükye ye gudow dañe udru ge hotrojo dase; hado cheme bá solutoajo üñisame.”

Tawgyew ichi ñetrü ñubyu üñisabamme

²⁹ I ná zeḡaw je a tru, “Lufuje üyaññe vyew shoñ na howe.

³⁰ Ichi übatra kakülyebyo kalyeḡyowñe, se í ba hohulyeñe balvyo danghulaibi ñeshü kalaibiñe.

³¹ Sünambó vyeduw ba he ñu na kye hohuima, sese danhu-lababise Tawgyew i ñetrüḡüfo kakujo üñisababiñe.

³² No bá umsow trujome, he ḡhei ñu na madalu kuw he ñefo ayo shüdo nüna na kyeje lüshüw mapajome.

³³ Ñedzüñe No naksü kaltruḡidamje, sešo nochi ñu kye je makatrujome.”

Shüwa Dashütrüvojo dawe

³⁴ “Sündada ufu je ksü üñi je ksü da ḡyowe, ya ba badrü balu ye he druguw drulyiw ayo dashüw ge daḡea kiḡeañe, shüjo djojo ge vyeḡeañe da ḡyomkoñbai ye jia, ñe se badru ge kyegüdü-ñiḡi kakugme.

³⁵ Hado chemeje i he añawa nomñew ñetrü ayo ḡyodo nachi ge ana vyeduw dañe kakujobabi.

³⁶ Sündada chiḡiñgudrujo dawe seyo küḡüñgudrujo dawe, he ana a kyegüdü-ñiḡi kakudamje ha madaw ḡaksüfisejoñe, seyo nüna üsaw i vro a gudzufiwjo lyijo dawe.”

³⁷ Seyo se ñeto ge ñegru ge shi-ñu tru süna dawse; Seyo ñegi ge i nopsü ge jihuañe Jetun pudru ge ḡyoñgudru.

³⁸ Seyo na je süzüw ye tralye ichi ge jikuñe shi-ñu truw ye dzüjoñe ñegru ge jikuñgudru.

22

Jisu i shijo go küla

¹ Odje oḡüme se i na ofo rhano chew, üñisa dabi.

² Seyo müḡaw dew nañe shi-ñu zew naksü shüwa í kúndañe shijoma se í kadang hotumu, sé na nüna nayo ḡew.

Yahuda Isküriya ichi umsokulyu

³ Seyo mütü Yahuda ge kamyoa, djú Iskariyoti chew sünda í shürhaw ülgü ḡü yo ksü namko ge i je duw.

⁴ I jiñe Müḡaw dew ñe kulow kyew hotumuw nadra chitru, Tawgyew í kúnda lügyelajoma sena.

⁵ Na lüshülag, Seyo í na bo djüjome cheñe müdaa.

⁶ I je embi che, sündalye hotuma-hotumuhi, se í usso ge ñu majodügyew lügyeladügyejoñe.

Fasa í dashütrüw

⁷ Sese odje oḡüme daw ñeto kakudabi, sese Fasa ge fugulu üsa ye che küḡüw kijobabi.

⁸ Sünda Jisu i Patrasñe Yohañ naksü i ana cheñe ki, “Djeñe ñibó Fasa ge tsajo-tujo dashütrüvowe.”

⁹ I í dzütcho, “Ba nó hange dashütrüvoweñe tsüda?”

¹⁰ I ná che, “Howe, ñetrü ge kaakubyo-kakuğyowñe nūna a ye hu guw kolo lodow tūvajome, dju ñe ge i jihima; ba ifum jisajo dawe,

¹¹ Seyo sé ñe go übraw í chewe, ‘Dadrüwwa bá chemkoime; se tumóna ná ñe hagewa sa a no nó shürhaw nadra Fasa tsajo ye?’

¹² Bá i howsa yo dagüdravodaw üğüñ dew a shejome; süge dashütrüvowe.”

¹³ I jikubanda, i kūna chedama sūnabyo-sūnağyo duvobi, sūnda í Fasa í dashütrüvo.

Tawgyewchi mülüñ drüpsü

¹⁴ Damdrü kuwñe, Jisuñe i shürhaw na nadra tsajobiñe ġyo.

¹⁵ Sündalye i ná che, “No nolu ge šüpyo ana vyewme, duhu makakulu kuw djodra ye ülya ana ũša ġyoñe ava tsajoñe vyewme.

¹⁶ Hado cheme no djó chemkoime, he i Tawgyew ichi nogo ge vyew makulu kuw no se í keje matsajome.”

¹⁷ Sese i bekasa lañe dru-lu yo šüvzüw gañe che, “He í lalyeñe djoğütchü ge habrağijo dawe.

¹⁸ Hado cheme je no djó chemkoime, Tawgyew ichi ġadzü madalu kuw no ayo dalalye keje he shejehu matujome.”

¹⁹ Sündatcholye i odje la, seyo üdrü-ulu yo küğüñe takuğia, seyo ná ana cheñe djü, “He i nó usso me, ha yé djobo djüwma: nó vyehuñe he ana dajo dase.”

²⁰ He ana dambo i tsaw tsafialye bekasa je ana cheñe la, “He i nochi sé šü yeme he i djobó fuadaw yeme ñu ükünüme.

²¹ Sé hojo dawe, nó kigoladügyejo ichi ügzü ye nodra a dume.

²² Hado chemeje nūna ũsaw ye bó ibo kūna dawewñe dadama, sūnambó dajobabi, séšo tui se nūna idru ge, djubó sa a í kigoladügyejoma!”

²³ Sündawñe na nağütchü dzüği-hoğingkoibi, “Ñimko a djuwa, he chiğa dajo ye?”

Djú dewñe vyefijowa?

²⁴ Namko a ana ñu che zeği; ñimko a dju dew vyefijowa?

²⁵ I ná che, “Utro sama nago nugo na nadru ge shotuko joi; seyo dju nadru ge shotuko jofijo daima, se ná povow nūna chewme.

²⁶ Séšo ba ana djulyiwe; mowme djomko a dju nugow dama, se i angasa vyeduw seyo dju ye ñubyu ma se i kulo vyeduw lyiwe.”

²⁷ Hado cheme dyew ye djuwa; se i buğo ge ġyodaw yeme, semome se chiğa damkoi yema? Hawa se i je mowma se tsawdra ġyodaw ye? Séšo no djodra a kulo vyeduw bame.

²⁸ “Sešo djo se na me, dju nodra ñiku-ñisüw ge je nodra duwsaw na me;

29 Seyo sünambo vyeduw nochi Awu i nóbó ñetrü ükún a davyedama, sünambo no je djóbó davyejome.

30 Se i ye hadowo cheme djo nodra nó buğotrü ge tsawetuweñe; se psüga a gyoñe Israyel nachi go gýbye gýyoksü í zegüdralawe.

Patras i hujonoğyow ñihohuw

31 “Simon, oi Simon, djó mütü ye prüdame pu í dambo güjoñe.

32 Séso no djóbó küğüwme, djódrü-djolu go umsowñe vyedaw ye kyeje mañoajo seyo djo kakume djó nudzoğ alyo-ñuw na je güdükewe.”

33 I í che, “He Tawgyewwa, no badra pache ge damje kasejo semome dzüjoje dzüfijobame.”

34 I che, “Oí Patras no bá chemkoime, yow jo külyiwñe sese ba nó ülye dzü mahosüw chejome.”

Duhu gijo ye dashütrüvowe

35 Seyo i í che, “Bá no dzulngasa seyo kapüga seyo shita je ñiw ufobüla kimkoi ge ba hama a mapu mavyaw dadama?” I chetcho, “Ha chi go mowme.”

36 I í che, “Séso djuchige dzulngasa дума se na se i lawe, seyo sünambo kapüga í je, seyo djuchi ge kyeği ñima ná nachi gye na damje drütülüalye lawe.

37 Hado cheme no djó chemkoime, he gido ye, ‘Se i truw nüna ge ngüjobamme,’ se i nódrü ge dajoye krükrüwbamme; hado chemeje nogru ge küna dajoñe dadama se na datsüjobamme.”

38 Na che, “He Tawgyewwa, howe, he a kyeği ksü duwa.” I ná chetcho, “Şüpyo dume.”

Jetun pudru ge Jisu i küğüw

39 Sese na ñepsü ge jihuañe na dadaw basha yo na ge Jetun pudru ge jitsü, seyo shürhaw na nafum jisa.

40 Süge jikuñe i ná che, “Küğüjo dawé, djo zeğaw ge maga-joñe.”

41 Seyo i na yo utroga kunusa a josajombuaña ge jiñe, seyo üshipyu dugoñe küğümyomkoibi.

42 “He Awua ba tsübameje he bekasa ye notrü yo latrülyewe, sedamje nó husü yo mow bá husü yé dadzowe.”

43 Sese soğgo go sorgomuko a í sa yo sa a hohu dju í zego dawma.

44 Seyo babiye i şüpyo vyemülüañe vyemoañe küğükülyejebi; seyo ichi úfu ye no ge şü fuw vyeduw tra tra dzuamkoi.

45 Sese i küğüfialye gudzulye ichi shürhaw nachi ge kakuñe hoholye vyew na drumutsüdaw hoñe duhu da.

46 Sündalye i ná che, “Hado drumuiya? Pülyibya, küğübya, na zeğow ge magajoñe.”

Jisu í tsülaw

⁴⁷ Jisu i süna chemkoi sese, howe upu a djelai ná, seyo se gü yo ksü namko a ye dju ñiñi ye Yahuda chewma i uvro uvro djekelaibi, i Jisutrü ge djeku, í bubu dajoñe.

⁴⁸ Sé Jisu i í che, “Oi Yahuda, hawa ba bubu dañe nuna üsaw í kigoladügyejoma?”

⁴⁹ Idra yo na idra ha dajoma í hohuwñe, sünda che, “He Tawgyewwa, ñi kegi dzofijoma?”

⁵⁰ Seyo namko ayo a ye mügaw dew ichi kulo nadru ge kegi yo dzohiñe ufu fuvo go dzoga.

⁵¹ Sé Jisu i che, “Sayo sa a damudoabe.” Seyo sa a ichi ufu ye kiñe dagyoi.

⁵² Sese Jisu i mügaw dafow na seyo ñegru ge hokrüvwow go mükyefow na seyo kew se na ídru ge lyikülyedaw ná che, “Hawa djo nó ñiguduñe danghuñe kegi ñe shalbo ñe lañe jikuma?”

⁵³ No djodra ñegru ge muhu-muhu djodra duw sa je sesüge djo nó gzü a je maki; sé hesahe djochi ümdrübamme, vatagüsagiahuw yo vatagüsagiahuwme.”

Patras ichi hujonoğyow

⁵⁴ Sündatcholye í na tsülalye la kakye, seyo mügaw dafow sawlyiw ichi ñe ge lañe kaku seyo se Patras i üga-üga djega djegañe ifum-ifum djese.

⁵⁵ Seyo na nopsü ge mi pyeñe tchü üša ghyomkoi sese Patras je namko a gyoa.

⁵⁶ Seyo se a kulom a ye í mi müsaw ge ghyokülyedaw hohulye seyo í usu yo hopafi hopañe chemkoibi “He i je üdra yo baba.”

⁵⁷ Séso i ana che hujonoğyow, “O mimya, no í madanghuwe.”

⁵⁸ Me uwalatchowñe utro a ye hotcholye chetcho, “Ba je nadra yo baba se.” Patras i che, “Oi nuna, no mowhoje.”

⁵⁹ Me uwalatchowñe nuna a ye dügago hoñe chengkotchoibi, “He i je nadrayobabiša; umsow cheme he i Galilibabi.”

⁶⁰ Sé Patras i che, “Oi nuna, no madanghuwa ba cheijema.” I süna chemkoi sese jo je külyijebi.

⁶¹ Sündawñe Tawgyew i tcholtruğiañe Patraschi ge ho, sündawñe Patras i Tawgyew i ñu chedo ye vyehu i ha chedama, “Yow jo makülyilu uvro ge ba nó ülye dzü kuw madanghuw cheñe hujonoğyoajome.”

⁶² Seyo i ñepsü ge kahualye şüpyo ku ku kuw kse.

Jisu i mülakulyuw

⁶³ Dju nuna ye Jisu í kigo dama, na í mülakulyuñe gümyomkoibi;

⁶⁴ Seyo ichi iñi ye pyelyeñe í dzü, “Ñiholye trubya bá dju güima.”

⁶⁵ Seyo ana şüpyo nomñew zeaşe-zeameñe í maw-uw ze.

Kyew nañe seyo melye dew gzu

⁶⁶ Ñetoahuwñe nañi yo kyew seyo müga dew shi-ñu zekyew-kikyew se na vyew keğitsü, sündalye í na melye dew gudo ge lakuñe chi dzü,

⁶⁷ “Sünameje ba Masimeje, ñi trujo dawel!” I ná che, “No djó trumsome djo nó umsow mavvejome.

⁶⁸ Seyo dzüdamje, matrufijome.

⁶⁹ Sešo ayo dalalye nuna üsa no sawlyiw Tawgyew ichi upo südzügo gow dañe gyongudrujobi.”

⁷⁰ Süñchewñe vyew na chetsü, “Sünameje ba Tawgyew üsawma?” I ná che, “Djo cheñşoiwa, hado chemeje nobabi.”

⁷¹ Sese na che, “Yabó no truvojioje ha matsübi; hado cheme no bó nobyo no dzühuladabi.”

23

Pilatus i Jisu í ñu dzüw

¹ Sese vyew keğidaw nuna na gudzutsüñe Jisu í Pilatus ichi ge la jiku.

² Sündalye na ana cheñe ídruge külü jo, “Ñi i nuna ná zeğow seyo Kesar í patso i madadügyew seyo nudzo í Masi seyo nugomeñe chew dzühudame.”

³ Pilatus i í dzü, “Ba hawa Yahudi nago nugoma?” I í tru, “Sebó ba cheşoiwa.”

⁴ Süñchewñe Pilatus i mügaw saw-lyiw nañe se nuna ná che, “No he nuna idru ge ha je külü mahohume.”

⁵ Séšo nabó süñchewñe seyoje şüpyo mügzüw yo chemkoibi, “He i Galili yo dalalye age kuw Yahudiya ná vyew shi-ñu tru truñe truğolatsüdame.”

⁶ Süna dzühulye Pilatus i dzü, “Hawa he nuna ye Galili ñetrü goma?”

⁷ Seyo he í danghula i Herodes ichi shotuko ulungo nuna dabi, í Herodes itrü ge kitcho, hadowo cheme sé ñeto ge i je Yarusalem ge duvo.

Jisu í Herodes ichi ge kiw

⁸ Herodes Jisu í hohulye şüpyo lüshü, hadowo cheme şüpyo uwalaw gomdo í hoğofñiw vye: se i ye hadowo cheme ifogo dzühuda, seyo ichi chi ashama asha ye sheweñe ve.

⁹ I í şüpyo ha ha ñu dzü, se i í ha je matru.

¹⁰ Seyo se müga saw-lyiwñe shi-ñu zekyew naksü ulung ulung ge í ze.

¹¹ Sese Herodes i ichi nuna nadra ye í zeaşe-zeameñe zekütso zemürhü, seyo iği ğiguw gye ye sheisalye ge Pilatus ichi ge kitülütcho.

¹² Sehu ñeto yo Pilatusñe Herodes naksü üdraw lya. Ana madalu. Sevro ge naksü mahoğiw.

Pilatus i Jisu í shiweñe düm takyao

¹³ Pilatus i mügaw saw-lyiw í seyo nüna na balañe ná che,

¹⁴ “Djo he nüna í nüna ná zeñoime cheñe nochi ge lakuda, seyo holañoa, no djó how a í dzü howşobi, se djo ha ñu yo iso ge külü joima, se ñu yobó no hasaje ichige külü mahohu;

¹⁵ Ge Herodes je mowbi, hado cheme i í nochi ge djültrutchodabi: seyo holañoa, i düm takyolaje shimdojo ana haje mada.

¹⁶ Sündada no í shidzü trabañebi”

¹⁷ Pilatus i rhanomko a nüna a tsüla vyedaw ye kihuajobabiñe lya.

¹⁸ Sündawñe vyew na şogzutsü, “I damtrüabei, seyo ibó Barabba i trajodawe.”

¹⁹ I ñetrü a ye pseği-luğiñe, shiw-law dadaw ubo go pache ge shüñe vew.

²⁰ Seşo Pilatus i Jisu í trajoñe vyeñe nüna ná che hopüñetcho.

²¹ Seşo nabó şogzuñe che, “Í kuros ge külyiwe, kuros ge!”

²² I ülye dzü kuw ná che, “Hado cheme i ha mau damdoda? Nobó í düm takyoñe shimdojo lalo daw mahohubei! Sündada no í gidüñe trabañebye.”

²³ Seşo na şogzu-şogzuñe zetsü, í kuros ge külyimdowne, sünda ná şozuw ye foajebi.

²⁴ Ha madanghulye: Pilatus i dügyeaha, na ha cheima sei dzülye daw cheñe.

²⁵ Seyo i se nüna vyesvye-vyemdolalye nüna shido í pache ge şüdaw ye, seyo djú í prüwma í trase; seyo Jisu í na nalu ge ha vyedama süna vyew apyew kuw djüki.

Jisu í kuros ge külyiw

²⁶ Na í lañe kakemkoi sese, Simon cheñe Kureni a ye ñetrü go kanglai sa a, í kigo lalye shokru giñe Jisuchi ge lakuñe ifum ifum la kake.

²⁷ Seyo nüna ye gumtchubabiñe ifum ifum kase: seyo şüpo upu mim na je, dju ibó üldjetchü gü gü kseñe ksekuğiladjew.

²⁸ Jisu i nachi ge tcholtruğialye che, “He Yarusalem ayo sam nawa, nóbo djuksejoda; seşo djo josa seyo djó nudzoğbó ksejoda.

²⁹ Hadowo cheme se ñeto kakujome, seyosa a nüna na chejome, ‘Şüvzüwme se na dju ügüzbümma, seyo dju saw-sam masakülyema seyo dju agü apu manuma.’

³⁰ Se ümdrü ge

‘Na pu naje chejome, ñidru ge gaabe, Seyo noğüfo yo ñi muşuiwe.’

³¹ “Hado cheme na shoñ djüw nadra ana damkoibi ye, krow nadra küna ha dañjema?”

32 Na seyo nūna ksü ije lalo datruw go idra ye shijoñe la jikye.

33 Na se Kopri che Noğûfo ye jikuwñe, na sayo sa a í seyo se lalo datrudo ksü ye je, a ye ichi südzü go seyo a ye ichi fuvogo ge süna kuros ge külyiñe vye.

34 Sündawñe Jisu i che, “He Awuwa, ná muchoaiwe, hadowo cheme he na madanghume na ha dangkoima?” Sünda na kako ge ği veñe i gye í habrağia lastü.

35 Nūna na gudzu-gudzu hoğyo, seyo nugo na je zeaşe-zeameñe ze ğyo, “I utro na ğaksülaw, i Tawgyew ichi Masimeje, seyo ichi dzulawmeje, nudzoğ ğaksülajo dawew.”

36 Rhünokyew naje í trow uhu ye í nuñe zeaşe-zeameñe che.

37 “Senameje ba Yahudi nachi go nugomeje, ba bá nudzoğ í ğaksülalabya!”

38 Seyo idru ge truw a chedalubi; “He i Yahudi na go nugome.”

Shokru ge dru-lu vyegüdolaw lalobraw

39 Ha lalobraw ye shokru ge külyi suntchadama, namko a yo a ye í zebze-zeğeñe che, “Hawa ba Masi moma? Sünameje ba balvyo ğaksüñe seyo ñiksü i je ğaksüila!”

40 Süñchewñe utro a ye í zeñe che, “Hawa ba Tawgyew í je mağewbama? Ba je süna pabaibi,

41 Seyo ñiksü bó shotukobasha yo pangkobabi, hadowe cheme ñibó ñi chiğa ha dadama süna shishü pangkobi; séšo i haje mau chiğa mada.”

42 Sese i che, “He Jisua, ba bá ñetrü kakuwñe nó je dju koşoawe.”

43 Í che, “No bá umsow chemkoime yow yo ba nodra sorgo nogo ge dujome.”

Jisu i lutukyohuw

44 Seyo muhumdzu yo dalalye me apyew djüdualai kuw ye vyew ñetrü na nukuğuatşüdabi,

45 Seyo dru müsaw yebó je kañoahibi, seyo ñegru go gyeña bó je ulumko toñe-meñe yo gağaa Jebi,

46 Seyo Jisu i şüpyo gow yo şogzuñe che, “He Awuwwa, no nó ğulo ye bagzü ge trahime.” Seyo i süna chelye ulvyu sese lutukyoaha.

47 Ğyokrüw nūna ye sa a ha dadama se na holye i Tawgyew í tro, sündalye che, “He nūna ye güdraşobi.”

48 Seyo upu na he í hojoñe keğitsüdaw na, he şoboşulyw dadaw í holyeñe nalüjetchü ge güñe kalütrü.

49 Seyo ichi hosüw-holüw küña duma vyew, seyo mim na je dju dju idra Galili go jikusedama vyew, üğa ge gudzuñe se na ho ğyo.

Yusufi Jisu í iyo ġuahuw Arimitiya go nolu ge

⁵⁰ Seyo süge, Yusuf cheñe yo nūna a ye se rhano dew ge du, dju ye uw seyo chi danghuw muhu.

⁵¹ Seyo ichi vyéw seyo ichi chiġa daw yo malüşhüw; seyo i Yahudi na ñetrü go Arimitiya ge ġyow seyo Tawgyew ichi nogo ye ġyokrüw nūna.

⁵² I Pilatus ichi ge jiñe Jisu ichi ñimo ye prü,

⁵³ Seyo í lagaalye gyelüdü yo daw gyeña ge vaşüñi, seyo nuġu a ye vye, se i ye kunu ge chido süna; seyo süge keje dju je mavyewlu.

⁵⁴ Se i ye dashüwtrüw ñeto, seyo ġyogow rhano damivrojo ümdrü ge.

⁵⁵ Seyo se mim na dju idra Galili go jikusedama, ifum, ifum jiñe se nuġu ye ho seyo uso je ho í daw basha yo da vyedaşomañe.

⁵⁶ Seyo kakultruñe şowsa chi seyo şonuw dashütrü; seyo ġyogow ñeto ge bó i je daw basha yo ġyogo.

24

Jisu í üshükülyew

¹ Sopta uvro ge, saġa-müġa na nuġu ge şowsa şow gañ-miġi lañe jiku.

² Sünda na kunu í ġühuadaw hohu.

³ Sünda ulung ge jemyongkoi ge, na Prabu Jisu usso mahohubi.

⁴ I he ñu yo mavenghuañe ġyoñbaiye, muhu ksü ye lütsü-lütsüw gye sheñe ütrü iñisa ge gudzu.

⁵ I ġeñe, sünda nodo ge ukrumro i pelye; sündawñe i í che, “Ba üshü í dzüw namko ye hado tchüwwa.

⁶ I ayo a ñimme, séšo üshükülyedamme. I djo Galili ge ha trudama vehujodawe.

⁷ ‘Umsogo je nūna üsa í lalobraw nagzü ge kigo ladügyejobamme, sünda kuros ge tükegojome, sünda ñegi dzü ye üshükülyetchojome.’ ”

⁸ Sünda i í ñu í vehuag,

⁹ Sünda nuġu go kangkoi ye i se ġüyo a ná, sünda utro naje, he vyow ñu ná truzeġiatsü.

¹⁰ Dju he ñu í şürhaw ná trudama, se na Mariam Magdalini seyo Yoana, seyo Yakub üyañ Mariyam sünda nadra ye utro mim naje duw.

¹¹ Séšo na ñu trudaw ye ná shipyew truw veduw velada sünda na ná umso mave.

¹² Sündawñe Patras i gudzulyiñe nuġu ge gyo dje, sünda gye ufobüla hohubadabi, sünda hadadama, se yo mavenghulyaha, í nudzo ñe ge kaltrutcho.

Imawus ġabo ge shürhâw na how

¹³ Sehu namko ye nûna ksü ye Imawus cheñe ñetrü ge jiiingkoï, Yarusalem yo kilo mitar mro kuw üga.

¹⁴ Sûnda naksü se vyow ñu ná, hadadama se na naksüġütchü chitruñe ji.

¹⁵ Sûnda naksü se ñu na naksüġütchü ge truġiñe dzüġiñe jingkoï ye, Jisu i iñisa jikuñe naksü üdra jisa.

¹⁶ Séso nañi ye ana veduw mütrüdaw ye í mahosülañi.

¹⁷ Jisu i ná dzü, “He ha ñuwa, djoksüġütchü ge truñe jiiye.” I duhu dañe ġudzu.

¹⁸ He í dzühulyeñe, namko ye Kilyupas ñetrü go nûna a ye che, “Haña ba Yarusalem go ba akasa tüvaw jiw nûnabamma, dju he ñeto ge hadadama se na se i madanghu.”

¹⁹ I í dzü, “Ha ñu ye wa?” Na í che, “Nazret go Jisu ibo dju Tawgyew seyo nûna nabo chiġa dawma sûnda shi-ñu truw go ñihow truw.

²⁰ Sûnda mügaw kew na seyo ñi dümbraw dakyew na í kigo-ladügyeñe, shibeñe dügyeaha; sûnda kuros ge sümtchadügye.

²¹ Séso ñi vyeksüwso, i Israyel í mutchoaijo che, sûnda he ñu na tralye, he soboşulyuw dajew ye ñeġi dzü kujebi.

²² Sûnda jimko ye je mim üchea na ñi mavenghuadügyeda, dju saġa-müġa nuġu ge jidama na.

²³ Sé usso í mahohuwñe, sorgomuko nadra í üshüdame cheñe ñu truw che djekuda.

²⁴ Sündawñe ñimko yo a ye nuġu ge how ji, sûnda mim na küna trudama, süna tchülada; séso í mahohu.”

²⁵ Sündawñe Jisu i ná che, “O madzühoave dañe ġyodaw nawa, seyo ñihow truw ná ñu ge üdrü-ulu yo umso dzüngahu nawa!

²⁶ Ana dajo mowma, Masi i duhu gilañe nudzo lüshüw ge kalyitralyejo?”

²⁷ Sûnda í ná ibo go kako ge ha ġidama se ye Musa ichi yo dala-lyeñe vyow ñihow truw nachi ge ġidaw na, i ná danghudügye.

²⁸ Aña sa a na hange jingkoïma, se ñetrü jikujebi, sûnda í dawyo na ana danghuda, i ayoje uvro ge jijolu cheñe.

²⁹ Sé na í ana cheñe ġokrüdügye, “Ñidra ġyosajodawe; hado chemeje djüdu lyañe aña uwaladabi.” Sûnda i ulung ge nadra ġyosaw kamyoa.

³⁰ I nadra ava tsajoñe ġyosangkoi ye, i odje í lañe gaġüzü djü, seyo í takuġiañe ná djü.

³¹ Sündawñe nañi hojükyeñe í hosülag, sûnda na iñi how yo müşü.

³² Na naġütchü ge che, “Ñidrü-ñilvyu ge mi madzoma, i ñi ġabo ge kako ge ġidaw ná truñe jomkooi ge?”

³³ I sa yo sa a gudzülyiñe Yarusalem ge katrükralye, sûnda i se ġüyo a seyo nadra a yo na üşaka ye keġidaw hohu.

³⁴ Na che, “Tawgyew umsogo je üshükülyetchoda, sünda Simon i hohu.”

³⁵ Sündawñe i ná ġabo ge chitru jidaw na ná tru seyo he je tru, i ná kúndañe odje í takuġiañe tsadama.

Jisu i í nudzo shürhaw nadra

³⁶ Na he ñu í trumkoi ye, Jisu í husü yo namko ye gudzukülye; sünda ná che, “Djo ġüdzüw pawe.”

³⁷ Séso na mavenghuatsüg, seyo ġeatsüg, sündañe na velatsü, ñi mütü hohungkoi.

³⁸ I ná che, “Hado mavenghuatsüña? Sünda djulvyu ge hado mavenutsüña?”

³⁹ No gzü seyo noshi na howe, no sebamme; no kiñe hohodawe; hado chemeje ñeġulo nachi uso üġübye ñijo nochi ge hohumbo.”

⁴⁰ Ana chelyeñe ná i ichi ügzü ishi na she.

⁴¹ Ná lüshüw yo seyo umsojemañe veñe, seyo lümashü ve, sündawñe i ná dzü, “Haña djochi ge ava duma?”

⁴² Na í psekrow tchükro üsüla a djü.

⁴³ I lañe na how sa a tsag.

⁴⁴ Sünda i ná che, “He na no ñu name, no djodra ġyosañe truwmme, Musa í shotuko ge seyo ñihow truw kuw na seyo kako ge nobo go ġidaw na umso kakülyejome.”

⁴⁵ Sünda i na ükye-ümüñi í güdraw ñu ġidaw dzüsüdügyejoñe voiha.

⁴⁶ Sünda ná che, “Ana ġidame Masi duhu gilañe seyo ñegi dzü ye dzüñe üshükülyetchojome,

⁴⁷ Sünda Yarusalem yo dalalyeñe vyow ġübye geg vetrüw seyo lalo daw na iñiñ yo lañe truzeġiatsüjo.

⁴⁸ Djo he ñu na hohusawme.

⁴⁹ Sünda djuchi traşüġa no awu i dadama, se ná no djo lakülyaijome sünda udru go gow mapamdolu, süña kuw djo he ñetrü ge ġyokrüjo dawe.”

Jisu i ñedzü ge katcho

⁵⁰ Sünda i ná Betniyah kuw ñepse lañe jekülyasa, sünda ügzü i lañe ná gaġüzü djü;

⁵¹ Sünda ná gaġüzü djüshüñe i na yo utro lya seyo ñedzü ge kalyitralye.

⁵² Sünda na mraañe í şüpo lüshüw yo Yarusalem ge katrükralye.

⁵³ Sünda ná ñegru mamuduw keġiñe Tawgyew í troñe seyo gaġüzüwe.

Philemon iñiñ güdraw Polus üsam

Ĝiw

He kako í ĝiw braw ye Polusme. He kako ha a Polus i Filemon í i Unesimus i ichi ge kitchojomeñe che sünda Kulu 4:9 ge Unesimus i Tukikus üddra Kulusse ge jimkoi sese Tulukus i Filemon i Polus ichi kako i djü. He ye šüvzüw ñume Polus i he kako i nudzo ügzü yo ĝidaw ichi gō vyow na shetsüjoñe.

Ĝiw übraw ichi dzaga

Oje 60 kuw.

Filemon í he kako ĝingkoi ñeto ge Polus i Rom go pache ge shü veda.

Lajovo

Paulus i he kako ye Filemon í ĝida, Arkippus í girja ñe ge sünda ñi ñum Apphia í. Kako ĝidaw í holyeñe vemeje he kako ye Filemon í ĝibadabi.

Ha ma a vew

He kako í ĝiw ge Polus i Unesimus í i übraw ye ichi ge lakutchoweñe ve ĝidame (Unesimus ye Filemon ichi kulo tsak-sulalye kaksudaw ye) sünda í sojai djudjüwe. (10-12, 17). Sünda sesüyo, Polus i Filemon í kulo veduw mowdaye “nudzo uñuw” veduw veweñe veda. (15-16). Unesimus i yaje Filemon ichi bo-luko ubo go lubi seyo Polus i ubo ĝabo davoĝoñ ve hado chemeje Filemon í lajovowene veñe. Polus i shi-ñu truw ubo sa Unesimus i Tawgyew i ĝaksüla. (File. 10).

Ñustu gow

Kahuahuw.

Udrüla

1. Abiwadan ____ 1:1-3

2. Abarokti ____ 1:4-7

Unesimus ubo ñu chegüdraĝiw ki ____ 1:8-22

Damdzualai shi-ñu ____ 1:23-25

Dašüvzüw

¹ Polus ichi go bó, se Jisu Masi ichi pache ge shüdáv nuna, seyo ñuw Timotiyus ichi ve go ñichi nülvo chiĝadam Filemon,

² Seyo ñum Afiya seyo ñidra yo shipashi Arkipusñe Filemon ichi ñe go ñešü na ñiñi.

³ Ñichi Tawgyew awuñe Tawgyew Jisu Masi naksü naksüchi vye go ĝüdzüw ye bá pangudruwe.

Šüvzütroi ñe Kûĝüw

⁴ No shüwa Tawgyew í šüvzütrojome; seyo nudzo kügüilai ge je bá vyehuwme.

⁵ Hado cheme no bachi sé nülvo seyo vyemso chi shi-ñu na dzühulye, se Tawgyew Jisu dru ge seyo vyew güdraw nüna nadra.

⁶ No kügüjome se vyemsodaw ge bachi üdra ayo na hadamje uw ñu ge danghusajo dawé ha ye Jisu Masi ichi yo ñidra dusama.

⁷ Hado cheme noñuwwa, nó bachi nülvo yo šüpyo lüshüw seyo güdzüw padame, sündada, ba yo dañe güdraw nüna nadrü-nalu hu je adjüdjüw no je aġimiw pajome, uñuw nawa.

Unesimus ibó kügüw

⁸ Sündada sedamje noje Jisu ge šüpyo bolu duda, se ha ñu ye udama, se í bá dügyejo.

⁹ Sedamje no vyeduw mukro Polus i se yabó Jisu Masi ibó pache ge ġyow nüna babi, se ayoje šüpyo nülvo yo ibó kügüjolu.

¹⁰ No nosaw Tawgyew go Unesumus ibó no yo nochi sülyeñtchü ge sakülye dame no yo kügüime.

¹¹ Se ibó ahuge ha madaġiw a ba, se yabó ba ñe seyo nochi dew chiġa tsüwbaba.

¹² Se í ñe seyo dju nolu ge kadama, no se í bachi ge djütülütchowba.

¹³ Í no nochi ge vyejoñe vyehomacha se í bó bachi vye go shüdabi shi-ñu ibó yo sülyeñtchü sumbo, nó datunowe.

¹⁴ Sé no ba mahusüw haje madaġoñ se bachi he nülvo djüdo ye datüdalüw yo mow lüshüw dawé.

¹⁵ Hado chemeje ha danghuñda i ba yo ksühua dzühua kuw he ibó utro lyadawa shüwa bañisa ge ġyojoñe.

¹⁶ Sešo ayogo kulo mavyeduw, kulo yo je dewfo, seyo ñuw vyeduw ġyowe se nochi drü-lü ge duw süna nülvobó sešo, se yabó usofu ge je seyo ġulo ge je, bachi je drü-lu ge sünda Tawgyew ge.

Filemon ichi dügyew dzüw lüshüljow

¹⁷ Senameje ba nó bachi nudzoġ dakyetunowñe vyedameje, se na vyeduw yo shutrolajodawe.

¹⁸ Chemeje se nó bachi ha damje damdalyoama semome sa a bachi ha damje a kakuw, se í nochi üñiñi ge ġiwe.

¹⁹ Polus no nó gzü yo ġijome, se i no bá ġigujome; seyo ichi chejoje ha madaġi, se no añaawa he daado na badru me se i babamme.

²⁰ He no ñuwwa, he lüshüw nó bachi Tawgyewwa nó bachi go pawe, Tawgyew ge nodrü nolu ye hu je adjüdjüw no je aġimiw daiwe.

²¹ No bachi dügyew dafiw dajo umsow vyyeñe, bá ġimkoime seyo he ana danghuwme, se no ha cheima, ba se í foje lübzüw daijo.

²² Seyo he i je, nobó ġyojo buġo dashütrüvowe; no süna umsow vyedame, se bá küġüw trüdu yo noje no bachi ügzü ge djüjome.

Mülüñ süyzüw

²³ Ifras se Jisu ge nodra pacheshüw ge

²⁴ Seyo se Markus ñe Aristikurs seyo Demas seyo Luka seyo no chiġadam.

²⁵ Ñichi Prabu Jisu Masi nülvow ye bachi ġulodra duwe. Amin.